


Aka (Hrusso) Bible



Hruso: Aka (Hrusso) Bible (Portions) for India

Aka (Hrusso) Bible

Hruso: Aka (Hrusso) Bible (Portions) for India

copyright © 2024 Bridge Connectivity Solutions Pvt. Ltd.

Language: (Hruso)

Contributor: Bridge Connectivity Solutions Pvt. Ltd.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

- You include the above copyright and source information.

- If you make any changes to the text, you must indicate that you did so in a way that makes it clear that the original licensor is not necessarily endorsing your changes.

- If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025
6ed36eea-a167-5ded-a2d7-08d8d10b8e3c

Contents

Luka	1
Filemon	54

Luka i shi-ñu

Ġiwbraw

Bżüga go kako ġiwbraw na vyow vew a vetsü se ye he kako ye Luk i ġiw cheñe, sünda he kako yo danghuda i galyiw ksü go veksüw Kristan cheñe. Ñom-niti go homeje, i utro ġübye küġüw go da. I Tawgyew i shi-ñu truw nüna. I Tawgyew i shi-ñu seyo Tawgyew i shürhaw ná kako ġida. Ije Polus idra ye Kristan na chiġa daw Tawgyew ichi chiġa daw nüna (Kulu. 4:14, 2 Timu. 4:11; 11:1).

Ġiwbraw i djaga

Odje 60-80 kuw.

Luka i he kako i Kesriya ge ġilyeñe seyo Rome ge kakuñe ġimdzoadabi. Kako ġidaw dzaga na Betlehem, Galil, yahudiya seyo Yerusalemjo du.

Lajovo

Luka ubo yo Tawgyew i shi-ñu ye Tiyufilus i ġilyeda. Tiyufilus chemeje “Tawgyew i nülvo daw.” I Kristan i küġüw ma mo i lyaġoñ dawma se ye usu-pa yo madanghume. Luka i ġidaw ge i “Dyewfo” cheñe 1: 3 ge ġidaw i homeje i Roman gow babu dyew vedujo a du. Añe ge kako ngüdaw ná holaimenje he ye utro ġübye gojo du. Ichi ġidaw ge ana vedufodame, “Tawgyew i nüna” seyo “Tawgyew i ġadz” (Luka 5:24; 19:10; 17:20-21; 13:18).

Ha ma a vew

Jisu iñiñ lañe trumkoige, Luka i Jisu i “Nüna üsañe” cheda. I Tiyufilus i ana ġida, i ha ñu ná dadrüdama se na se i uw yo danghulafijodawe (Luka 1:4). Luka i ñiku-ñisüw djüngkoi ge i ġiw yo i kristan nabo hado chemeje Tiyufilus i danghulajobi Tawgyew i shürhaw na nüna mauw mow cheñe.

Ñustu gow

Jisu - Nüna uw a.

Udrüla

Jisu i saw seyo ichi kutcho shüw __ 1:5-2:52

2. Jisu i nüna nabo chiġa daw __ 3:1 - 4:13

3. Jisu ġaksüivo übraw __ 4:14-9:50

4. Jisu i kros ge jiw __ 9:51-19:27

5. Jerusalem ge Jisu i lüshüw paw, dzüw seyo üshükülyetcho __ 19:28-24:53

Luka i galyiw

¹ Ñimko a ha ha lyilyedama, se ná nüna añe na galyiw ġipüñejoñe dada.

² Sünda he ñu ná dju nudzoġ iñiyo hohusedama se naje, seyo, Tawgyew i shi-ñu truñe kahisedaw se naje, se ñu ná ütrüyomdo ñi trukuida.

³ Sünambo, no je ütrüyomdo, he na he i, usupa yo hoksüñe kalyisedaw no, süvzüw Tiyofilus bábo, he na he i magabolyiw ġi vyeimeje ujoñe vyeda.

⁴ Hado cheholye, bá ha trudrülyedama, se ná umsowgo ba danghuweñe no vyedame.

Dzakariya ñe Elizabet

⁵ Nugo Herodes i Yahudiya ñetrü go ñetrü nugo dañe shüi ñeto ge ana lyikülye: Abiya müga go Jakariya cheñe mügaw a du. Üfum ye, mügaw Arö yo samtolyiw namko yo a, iñiñi ye Elishiba.

⁶ Sündá se naksü Tawgyew uvro ge chiñifoñe, seyo Prabhu ichi shotuko dügyew ná je da shüw. Úgü dadrülyedaw ná je madatruw-makitrüw da shüw.

⁷ Sündá Elishiba í ügübzümdá naksü agü je ñiwbi. Sündá se naksü kewje keahubi.

Sorgomuko i yo Yohañ í sakülyew ñihowtrü

⁸ Dzakariyas í í ñeşü ná dağań kuwñe, Tawgyew uvro ge, í ñegru ge müga chew daw.

⁹ Sündáda mügaw ná daw basha yo dañe kako dzulaw ge iñiñi kakülye, Tawgyew í kügüw ñegru ge jiñe shobrovzü foweñe.

¹⁰ Sündáda shobrovzü fomkoi sese vyew na nopsü ge kahuañe kügütsü.

¹¹ Sese Tawgyew ichi sorgomuko a ye shobrovzü fodaw südzüvyepsüg vyego psügañe ge gudzukülyedaw ye, í hohu.

¹² Sündá Jakariya í hoglye şüpo lamosha, sündá í ğew vyeahua.

¹³ Seşo ye sorgomuko í í che, “Jakariya, djuĝejodawe hado chemeje bá kügüdaw ye dzühujemme sündáda bafum Elishiba yo babó saw a sakülyejome, sündá ba se iñiñi ye Yohañ ñe ñijodawe.

¹⁴ Sündá ba agü saahuñe şüpyo lüshüñe, lüshümfoajome seyo şüpyo nüna na agü sadabi cheñe lüshüjome.”

¹⁵ Hado chemeje í Tawgyew üvro ge sawlyiw chiñifofojome; seyo tsü keje matujome; seyo iyañ ulhu ge duluge yo ğulo güdraw yo güdraavojobi.

¹⁶ Seyo Israyel yo naje şüpo nüna na Tawgyew ichi ge kakultrujome.

¹⁷ Í ñihow Eliya í ğulo seyo küña dafidama dañe üvro üvro kutrojome hado chemeje awu na na üdrü-ulu ye agü nachi ge tchodügyeje; seyo zew chew madzüw na Tawgyewchi ge chiñidrüñe lakujo sündá Tawgyew ibó dafimsofiw dashütrüvojo.

¹⁸ Jakariya í sorgomuko í dzü, hei no kúnda danghujowa; hado chemeje nobó mukroadabi seyo nofum boje mukromyadabi.

¹⁹ Sorgomuko í í trutcho, “No Gebriyalwa, Tawgyew ichi mukow kewwa sündá üdra gudzusaw ye wa; sündáda nó badra chitruweñe seyo bá he ñu ye truweñe kiadaw yewa.

²⁰ Seyo hojo dawe, he ñu ye umsow makalu kuw ba mulyo ğyoyome, sündá mazefijomme, hado chemeje ba nó ñu ye, í ke damdrüñe dafiajoma, sei umsow mavye.”

²¹ Nüna na Jakariya í ğyokrütsü, sündá mavyenghuahuw lyatsü, hado cheme ñegru ge aña kúnda uwalajemañe? Vyeñe.

²² Sündá í ñopsü kahuadabi abó ñu mazefibi, sündawñe na danghuladabi í ñegru ulunge hama ñita homadadañe, sündá í sei vyeĝelalye seyo mulyo lyadabiñe.

²³ Sündá í sehu datunofiahuñe í í ñe ge katcho.

²⁴ Setasaĝa yo ifum Elishiba somafobi, sündá hubye pom kuw í nudzoĝ ana cheñe müşüñe vye.

²⁵ “Nüna nafo ge nó bümazeamedañe nobó Tawgyew í he ñeto ye ana daidawa.”

Sorgomuko i mariyam itrü a jiku

²⁶ Elishiba agü ñiw yo hubye ğe kuw sa a Tawgyewchi go sorgomuko Gebriyal í Galilí iñiñi Nazrat ñetrü ge,

²⁷ Mimsa nano makaw a ichi ge kiku. Djú Joseb cheñe Dawud í ñeşü go Muhusa a idra ğulo daida, se nano makaw mimsa iñiñi ye Mariyamwa

²⁸ Sündá Sorgomuko i ichi ge ñelunge jimyoñe che, ba hu je adjüdjüw no je aġimiw lüshütukoaiwe, Djú Tawgyew í nülwov tukoaidama! Tawgyew i badrašome.

²⁹ I se ñu yo šüpyo ġelamoag, sündá vyemche, hei küna ñu a djüjemma?

³⁰ Séšo Sorgomuko i í che, Mariyamya; djuġejoda, hado cheme Tawgyew í nülwó bá tukoaidawa.

³¹ Sündá hojodawe, ba somafojome, sündá ba saw a saküleyejome, ba iñiñi ye Jisu ñe ñijodawe.

³² I šüġlyiġjome; seyo bá Soġgro-yaloñe üsaw chejome; sündá Tawgyew i í awu Dawud i psüġa ye í djüjome.

³³ Sündá i Yakub í ñešü ge shüwa nugo da shükejome; sündá í ġadzü da shükyew ye keje mamütrajome.

³⁴ Mariyam i Sorgomuko í che, “Hei künda lyijowa? Nobó muhuje madan-ghulubi.”

³⁵ Sorgomuko i í trutcho “ġulo ġüdraw ye baso ge kamyojome, seyo Toġgroyama í Ġagra ye badru ge duñgudrujome; Hado chemeje í ġulo ġüdraw yo sakülyalaibi, Í Tawgyew üsaw chejome.

³⁶ Sündá hojo dawé, bá ñešüġ go Elishiba i je mukromyadabi a saw sakülyemkoiba, hei ichimsoba í na Üġübzüm chebabi, i so mafow hubye ġe kudaba.

³⁷ Hado chemeje Tawgyew ichi ge ha ñu je madafiwo che ñiwmé.”

³⁸ Mariyam i che, “Howe, no Tawgyew i chiġadambabi, bachi ñu trudo trüduyo dubroñe nodra ana lyimeje.” Sese sorgomuko ye itrü yo katrükralye.

Elizabeth ichi ge Mariyam i jiw

³⁹ Sündaw se ñeto Mariyam i kutcho yo gudzuñe pufo go Yahudi na ñetrü a ge ji.

⁴⁰ Sündá Jakariya iñe ge jiñe Elishiba í gagañe da.

⁴¹ Elishiba i Mariyam ichi gaga chewye dzühuhuwñe, sešügudoye ulhu go agü yeje gog, sündá Ilishiba i ġulo ġüdraw yo tukoa.

⁴² Sündá i gow yo šogzuñe che, ba mim naġi yo süvzüfowmme, seyo balhu go sheje ye šüvzüw me.

⁴³ Sündá noje hango yo nülvojema, no Tawgyew üyañ ye notrüġañ a jikuda.

⁴⁴ Sündá holabya bachi gaga chew ye nofu ge dzühubyo dzühuġyowñe sešügudo ye nolhu go agü yeje lüshülye gogje.

⁴⁵ Sündáda seiye šüvzüwmme, se í djujo umsow vyeñe Tawgyew ichi go, ha ñu ye idra chedama, sei damsojebi.

Mariyam i Tawgyew í troi.

⁴⁶ Sese Mariyam i che, “Nodrü-nolu yo Tawgyew i troime.

⁴⁷ Sündá noġulo ye, nó gudraw choakejo Tawgyew yo lüshü damme.

⁴⁸ Hado chemeje i í chiġadam idru ge nülwó hoida, sündáda holabya, ayo dalalye shüwa shüw pumnüshüġi kuw nuna na nó šüvzübram chejome.

⁴⁹ Hado chemeje se bolugobraw Tawgyew i nobo chiġa dew dew daida, sündáda iñiñ ye ġüdraw me.

⁵⁰ Sündá i nülwó ye se nadra jome, dju í ġeima, saltso saltsow daw kuw sünañgudrujome.

⁵¹ I í bolugow ye sheiwa, seyo dju nudzo drü-lu ge dafowšoñe daima sena daame-kiamé vye.

⁵² I shotuko dümbraw na psüġa go dügaaha; Sündá nülvodaw i udruda vye.

- ⁵³ Luhushümgraado na gañ uwyo da djü, séso dzomo-külyimodaw na ügzü ufobüla lyadügye.
- ⁵⁴ I í nudzoğ aki-awu na, kulo Israyel na ġaksüla, hado chemeje se nülvo ye bñvyesüdañe.
- ⁵⁵ Shüwa Abraham ñe i saltsoahuw nadra shüwa duñgudrujo, I küna ñi bupye-ñipyenadra chedama süna.”
- ⁵⁶ Mariyam i hubye dzü kuw idra ġyoselyeñe, i ñe ge katcho.

Yohañ Baptisma djüw i sawfo

- ⁵⁷ Sese Elishiba i samdrü kudabi, sünda i saw sakülye.
- ⁵⁸ I ġafopsüğ-ğampsüğ seyo i ñeşüğ-ñepeğ na sei dzühulye, Tawgyew i idru ge şüpyo nülvo dadañe, idra ye lüşhütuno.
- ⁵⁹ Sündalye ana a dadawa ñegi şügzü kuwñe se agü í fyuw ñeto kudabi sünda i ñiñi ye ichi awu Jakariya í iñiñi ye ñiweñeda.
- ⁶⁰ Séso iyañ i che, mowwe; i ñiñi ye Yohañ ñe ñijo dawe.
- ⁶¹ Sünda na í che, bá ñeşüğ ge ana üñiñi djuchije ñiwa.
- ⁶² Sese i ichi awu i damcheñe dzü, ba iñiñi í ha ñiğonña?
- ⁶³ Sündawñe i ġijo kako prülañe ġiag, iñiñi ye Yohañ me, sündawñe vyew na mavyenghuatsüğ.
- ⁶⁴ Sündawñe ichi umdzu ñe zebüla naksü seşügudo ye zefikülye; Sünda i ñu zehuahuw ye Tawgyew i trokülye.
- ⁶⁵ Sündawñe iñisa ye ġyodo na vyew ġemoatsü; sünda se ñu ye vyew se Yahudiya nachi ñetrü üñisa üñisa naje şüğeatüsü.
- ⁶⁶ Sünda vyew dzühudo na nudzoğ nudzoğ drü-lu ge vyelatsü che, “He agü ye kñajojeshoma?” Hado chemeje Tawgyew i ügzü ye idra dubi.

Dzakeriya i ñihow

- ⁶⁷ Sünda iyaw Jakariya i ġulo güdraw yo tukoa, sünda ñihokülye.
- ⁶⁸ Israyel go Tawgyew í şüvzüwe.
- Hado chemeje i í nudzo nuna ná hokrüvo,
- Sünda ná ġaksüivo,
- ⁶⁹ Seyo i kulo Dawud i ñe ge ñibo muchoaijo hosüw üşüvzü a lahuaida.
- ⁷⁰ Sünambo i bzüga yomdo güdraw ñihow truw bupye-ñipyenayo, dju ñedzü üña no üña gomdo dulyisema, senayo trulyeida.
- ⁷¹ Chemeje ñi vyeñiw-vyeğaw nayo, seyo ñi homsüsew nagzü yo ñi muchoaida;
- ⁷² Sei ye ñi bupye-ñipyen na nülvo dañe nudzoğ güdraw ñu i vyesüweñe,
- ⁷³ Seyo se trasğa sei, se í i ñi awu Abraham yo todoye,
- ⁷⁴ I ñi hei djüjo, sei ye ñi vyeñido nayo kahajoñe,
- ⁷⁵ Ivro ge chiñiw seyo güdraw ġabo kaw ge şüdzowkuw mağew ichi chiğa dañgudruweñe.
- ⁷⁶ Seyo ba ye muhusa agüsa, Toğgroyama i ñihobraw chejome, hado cheme ba Tawgyew ichi ġabo dashütrüvojoñe uvro uvro kutrojome,
- ⁷⁷ Sei ichi nuna na djumuchoawe, dju, ná lalo yo güdraw pawma.
- ⁷⁸ Hei ñi Tawgyew í nülvo dado yo lyijome, seiyo ñidru ge udrugo yo müsaw a dzüto-rünokülyejo.
- ⁷⁹ Sei ye nukuğuw seyo dzüjo ġabo ge ġyodo na müsaw djü, seyo ñishi í lüşhüw ġabo gudow lakutrokewe.
- ⁸⁰ Seyo se muhusa angasa ye Yohañ, shülyifi shülyi seyo ġulo ge gokülyefi gokülye seyo Israyel ge kakujo ñeto kuw i bye ge ġyo.

2

Betlehem ge Jisu i saw

¹ Se ñeto ge ñubyu Kesar Agastas ichivye gow shotuko-kunu kihua, vyow Druguw-Drulyiw gow ġadzü-ġaġi nañiñ ġimyoweñe.

² He uvromashü iñiñ ġimyow ye ñubyu Keriniyas í Siriya gow dümbraw dadaw ñetow ge daw.

³ Vyew na nañiñ í ġimyoyoñe nudzo-nudzo ñetrü ge katsüküġatsü.

⁴ Sünda: Joseb je Dawud i ñeşü go üşü umu, sündada i Galili go Nazrat ñetrü yo kañe Yahudiya ge Dawud i ñetrü Betlehem ge ka.

⁵ I iñiñ ġimyow, í goidaw Mariyam dju so mafoma idra jisa.

⁶ Na Betlehem ñetrü ge dulu ge, i agü sajo ümdrü kuadabi.

⁷ Sünda i agü üsaw samkyo a saa sündañe í gyeka ge ġüşhüñe káko ge zua ve, hado chemeje nabo süge ñe ġoyojo mapa.

Fugulu ġokrüw nabo soġgomuko í ñu kidaw

⁸ Seyo se ñetrü a küña fugulu ġyokrüw дума, se na ñegi ge vi ge ġyoñe ná hokrü ġow.

⁹ Seyo Tawgyew i sorgomukow a namgkow ge gudzukülye, sünda Tawgyew i ġagra namgkow ye dubrokülyeg, sündawñe na şupo ġeatsüġ.

¹⁰ Sündawñe sorgomukow i na che, “Dju ġejo dawe; Hado cheholye chemeje, howe, no tuġu-tumo vyow nabo şupo lüşhüw ñu a trujome.

¹¹ Yow ñubyu Dawud i ñetrü ge djobo muchoaijo a sadame, sünda se i Prabhu Masime.”

¹² Sünda se ye ba chi shewme, sei ye ba agü a ye gye ġüşhüñe seyo káko ge zuw hohujome.

¹³ Sündawñe sorgomuko a üdra ye soġgomuko upua a Tawgyew i iñiñ la troñe ana chew hohuda,

¹⁴ “Ñedzü ge Tawgyew í ġüdzüw sünda no ge se tuġu-tumo na ġüdzüw djüwe djü ñedzü Tawgyew i uw veima.”

Fugulu ġaksüw na Betlehem ge jiw

¹⁵ Sorgomuko i natrü go soġgo ge katralyewñe, fugulu ġaksüw na ġütchü cheġi, “Tchow, ñi Betlehem jiñe he ñu chedaw i, seyo Tawgyew i trudaw í, hobo.”

¹⁶ Sünda na mekutcho djeñe Mariyam ñe seyo Joseb naksü ütrü ge anga i káko ge vedaw hohu.

¹⁷ I holyeñe na se anga ufo gow na ha trudama se ñu chedaw na truzeġiatsü.

¹⁸ Seyo vyew dzühutsüdaw na fugulu ġaksüvw na ñu trudaw yo mavenghu-atsüġ.

¹⁹ Seşo Mariyam i he ñu na üdrü-ulu ge veñe vemchepüñe.

²⁰ Sünda fugulu ġaksüw na ná küna trudama, sünambo vyew dzühuñe hohuñe Tawgyew i troyeñe lüşhüñe katsütcho.

Jisu ichi fyüñe seyo iñiñ ñiw

²¹ Ñegi şüzü kufiahuñe, seyo i Jisu i mükraksüw fyumdrü kuadabi, sünda iñiñ Jisu ñe ñi, he iñiñ ye sorgomuko i uluhudrü ge mañilugomdo djülyedabi.

²² Sünda Musa í shotuko dalyedaw yo Mariyam i güdraw ġyow ye ġomdzoahuñe sünda Joseb ñe Mariyam naksü í Tawgyew uvro ge shew Yarusalem lañe jike.

²³ Tawgyew i shotuko ge ġimbo: “Vyew saw samkyo na Tawgyew ibó güdraw vyejome.”

²⁴ Sündä Tawgyew i shotuko dalyedaw go chemeje, “Ašüm osa ksü, momeje pağusa üsasa ksü lañe küğüwe.”

Simon i ñi-how

²⁵ Se ñeto ge Yarusalem ge Simon iñiñ yo nuna a duw, sünda i güdraw nuna seyo Tawgyew i küğüw nuna, sünda Israyel ge güdzüjo i gyokrü, seyo gulo güdraw üdra dusa.

²⁶ Sünda gulo güdraw yo truhua, ba Tawgyew i saw Masi í mahohulu, ba madzüzvüjome.

²⁷ Sünda í Gulo Güdraw i ñegru nopsü ge jidügye; sünda iyaw ñe üyañ naksü se agüsa Jisu íbo, ahugo shotuko na dajoñe veñe lajikedaw sesse,

²⁸ sünda Simon i angasa í lolalyeñe, Tawgyew í troñe ana che:

²⁹ “He Tawgyewwa, ba ñu chew kudabi, bá kulo í ba güdzüw yo kadügyejodabe;

³⁰ Hado chemeje noñi yo ba muchoadügyedaw ye hohudamme.

³¹ Djú ba vyew druguw-drulyiw gow nuna na hovow sa a dadrü kikülyadama.

³² Í utro sama nabo umsow truhoahuw müsaw da kakülyajome, sünda Israyel go djo nuna nabo lüshü-lübajome.”

³³ Sünda üyaw ñe üyañ naksü ubo gow ñu chedaw yo mavenghuatch-eseñgudru.

³⁴ Sündawñe Simon i í gağüzü djüñe, üyañ Mariyam í che, “Howe, i Israyel go na gaañe seyo pülyidügyejo go, seyo ana a chi shedügyejoñe gyokrüdügyeda, seifo go ñu zeğijome.

³⁵ Sünda ba gülo je vetsü yo vudüga-vudüga dajome. He yo šüpo na drü-lu ge vedaw na truhuañjome.”

Hanna i yo trudaw ñu

³⁶ Sünda Asher gübye go Fanual üsam a duw iñiñ Hanna, i ñihow trum: I šüpo mukrombi, I ülshi dzüwñe üdra gzü daw yo odje mro kuw shüfisawba.

³⁷ I odje sügzügütrü psügi gow müjem: sünda ñegru keje matrahaw ñegiwnetow drüpsü-ñilyi mañiw seyo küğüñe gyonggudruwba.

³⁸ Sünda i sehu ñeto süge jikuñe Tawgyew i drü-lu yo uw che, sünda vyew ná, dju Yarusalem i yo muchoajoñe gyokrüvodaw na, ifo go ñu trumyokülye.

Josep ñe Mariyam naksü ñe katcho

³⁹ Sünda na Tawgyew davyedaw shotuko ügü ye vyew damdzoahuwñe sese Galili ge nudzoğ ñetrü Nazrat ge katcho.

⁴⁰ Sünda angasa ye nugow lya, sünda bolu dukülyebi, seyo patsü-sholu tukoaha, sünda Tawgyew i nülvo üdra sa dusa.

Angasa Jisu ñegru ge

⁴¹ Üyaw ñe üyañ naksü oje drü-drü Yarusalem ge Fasa rhano ge jinggudru.

⁴² I oje güyo ksü kuwñe, na rhano ge gidaw ñom í daw Jerusalem ge ji.

⁴³ Sünda na vyew ñegi gyomdzolye sese katcho, se angasa Jisu Yarusalem ge gyotralye; sei üyow ñe üyañ naksü madanghu.

⁴⁴ Na ana veñ, i upu jiw nadra dusamada, ñegi a kapseajebi: sünda na í nadraw seyo na ñešü nangko ge tchüpñe.

⁴⁵ Sé matchülawñe na tchü-tchüñe Yarusalem ge katcho.

⁴⁶ Seyo ñegi dzü sefum ye na í ñegru nopsü ge dadrüw nangko ge gyosañe, ná ñu dzüñe seyo naje i chi dzü gyodaw hohu.

⁴⁷ Seyo küña na i ñu truw dzü gýodama, se na vyew í danghuw yo seyo i ñu hutrow yo mavenghuatsü.

⁴⁸ Sündawñe na í holyeñe mavenghualyeñe seyo üyañ i í che, “No sawwa, ba ñidra ana hado dañä? Howe, baw ñiksü ba tağaw na veduw tchü ñegiaha.”

⁴⁹ I í che, “Ba no hado tchüña? Hadoma madanghuma, no nó awu i ñe ge dujobabi cheñe?”

⁵⁰ Sešo i í ha ñu chedama, i se i madzüsüla.

⁵¹ Sündawñe i üdra kasa, sünda Nazrat ge kaku, sünda na chew dzü gýosa; sünda üyañ i he ñu ye üdrü-ulu ge ve.

⁵² Seyo Jisu i patsü-sholu seyo udru ge lyifilyi sünda Tawgyew ñe nüna naksü ubo yo go shülyi.

3

Yohañ Baptisma djüw ichi shi-ñu.

¹ Nugo Tibiriyus Kesar ñetrü nugo dañe oje gütürpom kuw sese, seyo Pontus Pilatus i Yahudiya go ñetrü nugo da shüi sese, seyo Galili ge Herodes, sünda üñu Filip Ituriya seyo Trakonitis go nugo da shüw sese, sündalye Abilene ge ye Lisaniyas go nugo da shüw sese.

² Seyo sese Anasñe Kefas naksü müga gow, seta-seğa Tawgyew ichi shi-ñu ye, ge bye ge Jakariya ichi üsaw Yohañ ütrü ge dzühuku.

³ Sündalye i Yordan hu itrügañ go vyew ñetrü-ñetrü ge jiñe, lalo muchojoñe drü-lu ye vyegudoweñe baptisma ifo ye truzekülye.

⁴ Yasaya i ñihow trulyedaw shi-ñu kako ge gídaw ye:

“Bye ge shogzükülyedaw nüna i gúksüwme he i:

“Tawgyew i gábo dashütrüvowe, i gábo í gudow davowe.

⁵ Kaguguahuw küñama kazeğiyijome,

Seyo púsa je lüñew daajo;

Seyo üküngüw ná gudojo, lüvzüw lüñew gábo

Sena gábo rhugro lyijome.

⁶ Seyo uso duw chebiw ye vyew Tawgyew i muchoaihuw hohujome.’ ”

⁷ Dju upu dyam na ichi ge baptisma lajoñe jihuañe jikutsüdaw na, se na i che, “He byu üsa nawa, djó dju truda, he kalai lusuvyuw yo gë jehuatsüwe che?”

⁸ Drü-lu vyegudofilaw kuw sheje lakuwe: seyo nudzoğ-nudzoğ drü-lu ge ana djuvyelajo dawé, se ñi aki-awu ye Abrahameñe; hado cheme no dju chengkoime, Tawgyew i he kunu yo je Abraham ibo mulo lakülyefijobame.

⁹ Seyo ya bo puğje ye shoñ ükrütrü ge vyedabi, sündada ha shoñ ye sheje uw yo majema, se na poskealye mi ge foahuebabi.”

¹⁰ Seyo nüna na í dzü, “Sename ñi ha dajowa?”

¹¹ I ná tru, “Djuchi ge polu ksü дума, se djuchi ge ñima se i djüwe seyo djuchi ge tsajo дума, se naje süna datsüwe.”

¹² Seyo patso-law na je baptisma law jiku, seyo í dzü, “He dadrüwwa, ñi ha dajobya?”

¹³ I ná trutcho, “Dju djóbo gýokrüima, se í fojelüzbüw patso djulajo dawé.”

¹⁴ Seyo rhünakew na je í ana dzü, “Ñi ha dajobya?” I ná chetcho, “Djudru ge je külü djujowe, seyo mülaw-mütraw djufojo dawé, seyo nudzoğ chiğa dadaw ge lüshüjo dawé.”

¹⁵ Sünda nüna na se í vyeksüñe gýomkoi sese, seyo vyew na nadrü-nalu ge Yohañ ifo go vyemkoi, haña he ashá he i Masi mošomachañe.

¹⁶ Sündawñe Yohañ i vyew ná che, “Nobó djo hu yo baptisma djüwbame, sésoye i kalaime, dju nó cheje saw-lyiw bolufowme; no ivro ge ichi shita udro tashaijoje ugō ñiw sünabame, se i djó ġulo ġudraw seyo mi yo baptisma djüjome.

¹⁷ Ichi chiaġi ye ichi ügzü a me; seyo i í ñetchü ye uw yo dagüdrajosome; seyo pulgü tcholadaw na üšaka lakeġijome, séšo üġüтчü na ye mi ge foajo se mi ye keje madzoñoajo.”

¹⁸ Sündalye i nūna na dadrüñ-dadrülye shi-ñu uw je trusejome.

Herodas i Yohañ í pache ge kiw

¹⁹ Sešoye i psüġimko yo ñetrü a go nugo Herodes í iñuw Filipus ufum Hirodias ifo go, vyew lalo datruw nafo se na sei í dadaw na fokülye.

²⁰ Sündada Hirodes i vyew naġi yo je i fow lalo je datru, Yohañ í pache ñe ge šü vyewe che.

Yohañ yo Jisu í baptisma djüw

²¹ Vyew na baptisma latsüwñe, seyo Jisu je baptisma lalyeñe küġü ġyo, sündawñe ñedzü müsaag.

²² Seyo ġulo ġudraw paġusa veduw ye uso dañe idru ge ġudrokülya, sünda ñedzüdru go ñu zekülye “Ba nó sawme, ba yo no šüpo lüshüdame.”

Jisu i galyiw

²³ Jisu i shi-ñu trukülyewñe, sese i oje dzüġü kuw. I Joseb üsaw (nūna na ana vedabi), seyo i Eli ichi,

²⁴ Seyo i Mattat üsaw, seyo i Lewi ichi, seyo i Malki ichi, seyo i Jannai ichi, seyo i Yusuf ichi,

²⁵ Seyo i Mantiyah ichi, seyo i Amos ichi, seyo i Nahum ichi, seyo i Asaliya ichi, seyo i Naggai ichi,

²⁶ Seyo i Mat ichi, seyo i Matiyah ichi, seyo i Simi ichi, seyo i Yosek ichi, Seyo i Yoda ichi,

²⁷ Seyo i Yohañ ichi, seyo i Resa ichi, seyo i Jarubbabel ichi, seyo i Shaltiyel ichi seyo Nari ichi,

²⁸ Seyo i Malki ichi, seyo i Adi íchi, seyo i Kosam ichi, seyo i Almadam ichi, seyo i Er ichi,

²⁹ Seyo i Jisu ichi, seyo i Aliyejer ichi, seyo i Yorim ichi, seyo i Mantat ichi, seyo i Lewi ichi,

³⁰ Seyo i Simon ichi, seyo i Yahuda ichi, Seyo i Yusuf ichi, seyo i Yonan ichi, seyo i Eliyakim ichi,

³¹ Seyo i Maleyah ichi, seyo i Minnah ichi, seyo i Mantat ichi, seyo i Natan ichi, seyo i Dawud ichi,

³² Seyo i Yise ichi, seyo i Obed ichi, seyo i Boj ichi, seyo i Salmon ichi, seyo i Nason ichi,

³³ Seyo i Amminadab üsaw, seyo i Arni üsaw, seyo i Henson üsaw, seyo i Peres üsaw, seyo i Yahuda üsaw,

³⁴ Seyo i Yakub ichi, seyo i Isahak ichi, seyo i Abraham ichi, seyo i Terah ichi, seyo i Nahor ichi,

³⁵ Seyo i Sarug ichi, seyo i Rawu ichi, seyo i Peleg ichi, seyo i Eber ichi, seyo i Šilah ichi,

³⁶ Seyo i Kenan ichi, seyo i Arafzed ichi, seyo i Shom ichi, seyo i Nuha ichi, seyo i Lemek ichi,

³⁷ Seyo i Matushilah ichi, seyo i Hanok ichi, seyo i Yirid ichi, seyo i Mahallel ichi, seyo i Kenan ichi,

³⁸ Seyo i Enosh ichi, seyo i Shet ichi, seyo i Adam ichi, seyo Tawgyew ichi üsawwa.

4

Jisu í purkya

¹ Sünda Jisu i ġulo ġüdraw yo tukoañe, Yordan hu go kakutchu; seyo ġülo yo bye ge laġüşhi laġüşhi vye;

² Seyo ñegi piġü kuw mütü na dakütso-kikütso ho. Se ñeto ge i haje-haje matsa-matuw seyo se ñeto kamdzohuñe, sese i luhuşüku.

³ Südane mütü ye í che, “Sünameje ba Tawgyew üsawşommeje, he kunu ye cheha odje lyaweñe.”

⁴ Jisu i í trutcho “Ġidame, nuna na odje yo aka mashüjome.”

⁵ Sündatchowñe mütü ye í la djeketcho sündalye lügañe pu udru gow vyew druguw-drulyiw go ñetrü ná shemdzoa.

⁶ Sündalye mütü chetcho, “No he na he i vyew bá übraw daweñe djüjome, sünda no ġagra djüjome, hado cheholye he na braw nobabi, seyo no dju djügoñdama djüfijobame.

⁷ Sündada ba nó küġümeje, he na vyew bachi lyajo.”

⁸ Jisu i í chetcho, “Ana ġidame: ‘Ba bá nudzoġ Tawgyew í gaga dawe; seyo í küġüjo dabawe.’ ”

⁹ Sündatchowñe i í lalye Yarusalem go küġüw ñegru ñelütsü udru ge lalyi vye, sündalye í che, “Süname ba Tawgyew üsaşommeje, babraw bá nudzoġ he ayo üla ge gaawe.

¹⁰ Hado cheme ġidabi, ‘I bábo í sorgomuko ná babo ġaksüweñe dügyejome’

¹¹ Seyo ‘I bábo ügzü yo lolajobame, hado chemeje bá gaañe kunu ge bashi í mapadügyeñoñe.’ ”

¹² Jisu i í chetcho, “Ana je chedame; ‘Ba nudzoġ Tawgyew í dafimsoima djuhojo dawe.’ ”

¹³ Mütü ye í dafiyima madafima da hopüñemdzoahuñe, sündawñe memja kuw ütrü yo kahatrükralye.

Galili ge Shi-Ñi trukülyew

¹⁴ Sündatchowñe Jisu i Ġulo Ġüdraw yo tukoañe, Galili ge katcho, sünda ífo go ñu ye üñisa üñisa yo küña ñetrü duma vyew dzühuzeġiatsü.

¹⁵ Seyo i süge Tawgyew i küġüw melye ñe ge truw ñe ge shi-ñu truñgudru, sünda vyew na í trotsüküġatsü.

Nasrat ge Jisu í maġoñiw

¹⁶ Sündalye i Nazrat ñetrü ge jiku; hayo sa a í dalañe shükyedama sese; seyo í nudzoġ daw üġü dajo ge ġyogow ñeto kuwñe küġüw ñegru ge jiñe kako ngüjoñe gudzu.

¹⁷ Ñihow Yasaya í ġilyedaw kako ye í djü, sünda i kako ye tahalye, hayo sa a ġidama se i lakülye:

¹⁸ “Tawgyew i ġulo ġüdraw nodra dume, Sündada i sapse na shi-ñu truweñe nó lakülyedame, Seyo nó ana daweñe kiadame, külyidaw ná shaaweñe, Seyo üñi ġew ná hofidügyeweñe shi-ñu na truñe, Seyo dügrülyadaw na lahuaiweñe,

¹⁹ Seyo Tawgyew ichi lüshü ġyojo oje í shi-ñu trujo.”

²⁰ Sündalye i se kako ye pyelyealye í shürhaw ügzü ge djü, sündalye gyoag: seyo se kügüw ñegru yo nuna na í homdzoatsü.

²¹ Sündawñe i ná che, “Yow he gídaw ye djovro a damdzojemme.”

²² Seyo vyew na í umsolyeñe vyeatsü, seyo ha shi-ñu ye i umdzu yo zehuahima, se na í djühulye vyengatsü; sünda ná ubo chetsü, “Haña he i Joseb üsaw mowma?”

²³ I na chetcho, “Djo nó he anabo zeğajobamme, ‘He mügawwa, nudzoğ í uw dagyolatchowe! No hadamje ñu dzühudaw ye ba Kafarnahum ge dadaw ná age nudzoğ ñetrü a je dawe.’”

²⁴ Seyo i je chetcho, “No djó umsow cheime, djú ñihow je yow kuw nudzoğ ñetrü ge ügö mapawme.

²⁵ No bá umsow cheime, Eliya í ñeto ge oje dzü kuw ñedzü ye pyelyeatrülye, ana lyladjew vyew druguw-drulyiw ge luhuşümoatsü, sese Israyel ge şüpyo müjem kadā dutsü.

²⁶ Séšo Eliya í se namko ye djuchi ge je maki, Sidon go Sarfat ge Jewishñim mo müjem a ichi a aka ki.

²⁷ Seyo ñihow Elisha i şüi ñeto ge Israyel to şüpyo gogo naw kadā, séšo Naman ñidaw Jewish mo Siriya go nuna yé tralye vyew na so güdraw madaw kadā.”

²⁸ He ñu ye dzühubyo-dzühuğyowñe küña na se ñegru a duma, se na vyew lusvyumfoatsü.

²⁹ Sündalye gudzylyitsüñe í na se ñetrü yo lahua, sünda ha pudru to í ñetrü gýodama, se pudru ulodza ge la jiku, í seyoşü üla ge dügaajoñe.

³⁰ Séšo i nalumko yo kahulalye katrükralye.

Ğulo ma uw í ñepsü ge lahuahuw

³¹ Sündatcholye i Galili ñetrü go Kafarnahum ge jiku, sünda gýogow ñeto ge nuna ná shi-ñu tru.

³² Se na í shi-ñu ye dzülye mavyenghuatsü hado chemeje í ñu ye dügyebyo-dügyegowdra du.

³³ Melye ñe ulunge nuna a du, djuso ge ğulo mauw kamyó gýodama. Se i şüpyo gow yo şogzukülye,

³⁴ “He Nazret go Jisua, no bá ha tsünghu? Haña ba no damtrüajoñe jikuwma? No bá danghuwşowa ba djuma? Ba Tawgyew ichi güdraw üsaw ñe sakülyedaw yewa!”

³⁵ Jisu i í züñe che, “Mazüda gyo sünda i yo kahuag!” Sündawñe se ğulo mauw kamyodaw ye ilungo haje ma uw madalyew kahuag.

³⁶ Sei hulye vyew na aañiñe vyeatsü, seyo se na nağüтчü ge ñu truğiñe che, “He i ye küna ñu bajeşoma? I se ğulo ye ñigudu yo mağew dügyebyo-dügyeğyoiwa, sündawñe se i je kuhuabai.”

³⁷ Hangge je hangge je imdo í kadang ifo truğitsüabaibi.

Patras ichi apyeñe utro nuna na dagyow

³⁸ I ñegru yo kahuañe simon í ñe ge ji, süge se Simon (Pirat) ichi apye ye uso şüñe nala. Sündada i íbo i küğütko.

³⁹ I ichi üñisa a gudzylye se usso şü nadaw í züg, züwñe sese usso şüw ye gabruag sünda uwabyo-uwağyowñe i süge age da í datunotcho.

⁴⁰ Dru guamkoi sese dju-dju sama-sama yo nomñew yo so natsüdama, se na ichi ge la jikutsü, sündawñe í ügzü ye nadru ge a a dañe vyeñe na dagyotsü.

⁴¹ Sündawñe ġulo mauw na šogzuñe che, “Ba Tawgyew ichi üsawwa,” šüpyo nachi go kuhuatsü, séšo i se na züñe seyo ñu mazüdügye, hado chemeje na danghudabi, i Masi cheñe.

Galili ge shi-ñu truw

⁴² Sündä ñetoahuwñe i namko yo kahuañe ġüdzüw ge katrükralye, sündawñe upu na í tchüsetcho ichi a kakusetcho, sündä í dügoħa, nachi go djuka-trükralyewefñe.

⁴³ Séšo i ná chetcho, “No ñetrü utro ge je Tawgyew ichi shi-ñu trujo dulumme, hado chemeje nó he í dawefñe kiabadamme.”

⁴⁴ Sündä i Galili ñetrü go ñegru ge shi-ñu tru.

5

Jisu ichi shürhaw

¹ Upu na ichi ge gapulotsüñe, seyo Tawgyew ichi shi-ñu na dzütsüküġütsü, sündä íbó ge Gannesrat go huġülyi üdza to gudzu, sese ana a da.

² Sese i huġülyi üdza ge lü ksü vyedaw hohu, seyo tromaw-dzükrüw na ná tromaw na tchegüdramkoi.

³ Se lü namko ye a ye, se Simon ichi ye lyimyoalye, i í hudza ge me latrülyewefñe küġüñe che, sündawñe i lü ge ġyolye i nüna ná shi-ñu trukülye.

⁴ I ñu truñahuwñe, sese i Simon i che, “Ġyuw ge la jikewe, seyo tchü lügyejoñe bá tromaw ye majo dawe.”

⁵ Simon i í chetcho, “He Tabrawwa, no yakülyi ñegimütrü kuw koġiw dawye ha malügyelafibi; sedamje ba ñu cheda, tromaw mamkoime.”

⁶ Se i süna dawñe, ichi tromaw ye tchü aña-šüťchüw tromaw gaġalajew malgrula.

⁷ Sündaw i í draw utro lü ge gyodaw na, age djeñe latunoweñe naje damche: seyo se na djekutsüñe, se lü ksü ye gudze-gulüšüahuw lagu vye sündä lü yeje müłajo ladjew latchuġyo vye.

⁸ Se na holyebi Simonñe Patras naksü Jisu üshitrü ye gaañe, seyo che, “He Tawgyewwa, notrüġañ yo katrülyewe, hado cheme no lalo nüñabame!”

⁹ Hado chemeje aña šüťchüw tchü lügyeladaw í holyeñe i seyo üdra ayo na mavenghuatsüdabi;

¹⁰ Seyo sünatchombo Jabdi í üsaw Yakub ñe Yohañ naksü je, dju Simon í shürhawma, mavyenghuatsü dawñe Jisu i Simon i chetcho, “Djuġejodawe, ayogo ba nüna ná üšhü tsüłajo dawe.”

¹¹ Sündawñe na lü ye hudza ge lakulye seyo sa a tralye ífum ífum kase.

Ġoġo í güdraw daihuw

¹² I utro ñetrü ge dulu sese, se süge ġoġo yo tsafoahuw nüna a ye jiku, sündä i Jisu i hohulye uvro ye gakülyea, sündalye küġüñe che, “He Tawgyewwa ba dagojoñe vyedameje nó ba muchoadügyefiġosome.”

¹³ I üġzü ye djüñe dadülye che, “Bá muchogüdrawefñe, no vedame.” Sündawñe ichi se ġoġo tsadaw ye sešügudo ye kagüdrüatsü.

¹⁴ Sündawñe i í trudrüse, “Djusaje djutruwe, séšo kañe babraw ba müġaw na shewe, seyo ba kända güdraw mucholawma se fo ye, se hadamje Musa i djüvyelyedama se í djüwe ifo gow truñjoñe.”

¹⁵ Séšo íbo gow ñu šüpyo tüġa-zeġitsü, seyo šüpyo nünapu ye ichi ge shi-ñu dzüjoñe seyo sonaw na dagyolajoñe ichi ye keġitsü.

16 Séso i nūna ñiw ge utroga kagañe kûgûñgudru.

Jisu i külyi-ğüdjew naw í dagyo

17 Ahua ye ana a datcho, i shi-ñu trumkotchoi sese, Farisiñe dakyew kikyew na sa a ġyoda, dju Galili seyo Yahudiya go kûña ñetrü duluma sego na, seyo Yarusalem go jiku; sūnda naw na dagyoijoye Tawgyew í ġagra gokyew ye idra ye duse.

18 Seyo howe kagua na külyi-ğüdjew naw nūna a ye, ñelütsüdrü ge lalyi, seyo na í ġütrü ge la jikuñe lamyoañe seyo Jisu ivro ye vyejoñe daahi.

19 Seyo na upu mutchusübyeñe ñelunge la majimyofiwni, na ñelütsü udru ge lyilyiñe seyo ñeltsü tahalye, í ġütrü nadra ye Jisu uvro ge ulungko ye kikülyeaha.

20 Jisu i na umsow lutuksüw vyedaw ye holyeñe che, “He nūna bá lalo ye muchoajemme.”

21 Sündawñe shizew-ñuzew nañe Farisi nağüтчü cheġi, “He i djubajema, Tawgyew í mow uw zehi ye? Tawgyew í tralye dju lalo na muchoifiwa?”

22 Jisu i nalu ge vyedaw danghulye ná che, “Djo djolu ge ha vyemkoiya?”

23 Hado vyedoañe? Ana chejoma, ‘Djo lalo ná muchoadama,’ semome ana ma ‘Gudzuñe seyo kutro djeg?’

24 Séso ye ana dadá djo danghujo dawwe nūna üsaw í druguw-drulyiw ayo lalo muchoaifiwme.” I se külyi-ğüdjea nado í che, “No ba chemkoi me, gudjuwe seyo bá ġütrü ye lalye ba ñe ge la kabi.”

25 I jeañe ütrü a gudzu, seyo hayo sa a í gudru dama se í lolalye, Tawgyew í troye í nudzoğ ñe ge kajebi.

26 Sündawñe vyew na mavyenghuatsüñe Tawgyew í trotsü, sündalye şüpyo ġeñe che, “Yow ñi sama a ñu hohujemme.”

Matti í balaw

27 Seyo sefum a i ñepsü ge jihua, seyo Leviñe ñidaw a ye patso-law nūna ye patso ñe ye ġyodaw hohu, sūnda í che, “Nófum kasewe.”

28 Sündawñe i vyew tratsülye ífum kase.

Lalo nadra tsasaw

29 Sünada Levi i í ñe ge ava tsaw rhano a djü; seyo sūnda se patso-law nañe seyo nūna utro a upua nañe üša ġyoñe ava tsa, şüpyo upu dyam.

30 Seyo Farisi nañe seyo shizew-ñuzew nañe í şürhaw ná ana cheñe zekütso-zemrhü “Djo patso-law seyo lalobraw nadra hado ġyoñe üša tsa-tu daiya?”

Luhuşüw-lukrow ġyow ge Jisu i dzüw

31 Jisu i na chetcho, “Müga ñachi ge so manaw na majijome, séso sonaw na jijome.

32 No nūna güdraw na mowme, lalo duw ná nadrü-nalu lagudoijoñe balaw kakuwme.”

33 Seyo na í chetcho, “Yohañ í şürhaw na ye şüpyo uw yo matsa-matuw kûgüñe ġyoiwa, seyo sünambó Farisi nachi go na je, séso bá şürhaw na ye tsa-tuiwa.”

34 Jisu i ná chetcho, “Hawa ba name gzü jiw nūna ná gzübraw ye nadra dulu sese, matsa-matudügyefijoma?”

35 Séso se ñeto je kakujome, sayo sa a gzübraw ye nayo utroga dajome, sese na se ñeto ge matsa-matuw dajome.”

³⁶ Ná i zeḡaw a ze tru, “Dju nūna yo gye ũkūn ye taḡañe dju matũpsũwme, semome ũkūn ye taḡajobabi sedamje se tũpsũdaw ye je gye ũme ũdra makamyoḡijo.

³⁷ Seyo dju je tsũhu ũkūn ye dzaḡi ũme gye mapyujō, semome tsũ ũkūn ye se dzaḡi ũme yebó byoḡalye kasuajo, seyo dzaḡi je mau lyajo.

³⁸ Séso anggur uhu ũkūn ye dzaḡi ũkūn ge pyujo dume.

³⁹ Kagua nūna na tsũhu ũme ye tulye ũkūn ye matuḡoñjo, hado chemeje na truibī, ũme ye ufomdodašo cheñe.”

6

Jisu Sabbat go Tawgyew

¹ Sũndalye ḡyogow ñeto sehu i vi gošũ dañe kamkoi sese, seyo í shũrhaw na pu ye trũkũlyelalye, ũgzũku yo shũkrũñe tsa-tsa ka.

² Sese Farisi namko yo na hadamje chekũlyetcho, “Djo sũna chiḡa hado dawwa hai ye ḡyogow ñeto ge madafiwjoma?”

³ Jisu i ná trutcho, “Hawa djo he í mangũma, nugo Dawudñe ũdra ayo na luhušũda sese ha dawma?”

⁴ I kũndañe Tawgyew ichi ñe ge jima, seyo lapsũ djũdaw go odje na lañe tsa, se na bó mũgaw ná tralye djusaje matsafijo, seyo idra yo naje djũdalubi?”

⁵ Sũnda i ná chetcho, “Nũna ũsaw ye ḡyogow ñeto ge je Tawgyewbamme.”

ḡyogow ñeto ye sonaw ná dagyow

⁶ Sũnda ana dañ ahua ye ḡyogow ñeto kuw sese i ñegru ge jiñe shi-ñu trutchoñe da ḡyo; seyo sa a nũna a duw ye ũgzũ fuvro go krosdzũada.

⁷ Shizew-ñuzewñe Farisi na í hadamje zeñe ñu jojoñe hoksũ ḡyo, i ḡyogow ñeto ge dagyoahima madagyoiima hojoñe.

⁸ Séso ibó nalu vyedaw dāhuñda; sũndada i se ũgzũ kroadaw nũna í che, “Pũlyiñe, umko a gudzug.” I pũlyiñe gudzu.

⁹ Jisu i í chetcho, “No djo he dzũime ḡyogow ñeto ge ha dafijowa, uw dajo veima mo mau dajoma; shũw ná ḡaksũjoma mo maḡaksũjoma?”

¹⁰ Seyo i vyew ná hozeḡiatsũlye, se nũna í che, “Bagzũ ye vro ge djũwe.” I sũnda da, sũndawñe ũgzũ ye muchoañe uw lya.

¹¹ Séso se na ñepsũ ge kuhuatcholye lusvyuñe naḡũtchũ poḡitcho, ñi he Jisu idra ha dañelye?

Shũrhaw ḡũ yo ksũ

¹² Seyo se ñeto bó i pudru ge kũḡũw katrũkralye, seyo akũlya ñetow Tawgyew í kũḡũ ñetoaha.

¹³ Ñetoahuwñe, i í shũrhaw ná balalye namko ye ḡũ yo ksũ ye pola, sũndalye ná shũrhawñe che.

¹⁴ Sũnda se na heimme; Simon í ñiñi ye i Patras ñe je vye; seyo í ñuw Andriyas, seyo Yakub, seyo Yohañ, seyo Fillipus, seyo Bertulme,

¹⁵ Seyo Matti, seyo Tomas, seyo Halfais í saw Yakub, seyo Simon dju í Jeletes je chewma,

¹⁶ Seyo Yakub í saw Yahuda, seyo Yahuda tcho Iskariyoti, se i í tsadrũahuw lyikũlye.

Jisu i nũna ná truñe dagyow

¹⁷ Sũndawñe na idra kagalaye no ũpra a ye gudzutsũ, sũnda ichi shũrhaw na upu mutchu, seyo vyew Yahudiya na, seyo Yarusalem, seyo Sor seyo Sidon go sũtũḡũlũ ũda ge kũña ñetrũ ma sego šũpyo nũna upu na je,

¹⁸ Dju í shi-ñu truw í seyo ġulo ná muchoaġne dagyojoġne ichi ge jikutsüdama, süge dütsü. Seyo chigüje na maw da vyedaw na je uw dagyo.

¹⁹ Seyo vyew na í kidüġyoñ vyetsü, hado cheme íso go ġagra na kahuaġne ná muchoahi.

Gaġüze shi-ñu

²⁰ Sündawġne í í shürhaw nachi ge hoġne che,
“Šüvzüwme bá, ñeto daw ye,
Hado cheme Tawgyew ichi ñetrü ye bachime.”

²¹ “Šüvzüwme bá je, dju luhušüdama,
Hado cheme ġaksüjome,

Šüvzüwme bá, dju ksei ma;
Hado cheme tchüjome.”

²² “Šüvzüwme bá, dju nüna üsaw íbo

Bá mau dajome,
Seyo bá lahuaajome, seyo bá tchüġo-hoġojome,
Seyo bá ñiñi danghulye vyetsü djojome.

²³ “Sehu ñeto lüshüġne gyojo dawwe, hado cheme hojo dawwe, babó soġgo ge lapsü dume. Í bupye-ñipyen ñihow kew nadra je süna dawbamme.”

Dzüngawhuw shi-ñu

²⁴ “Séso tui me djo, dju bo-luko duma,
Hado cheme djo djolu vyew apyew pajebi.”

²⁵ “Tuime djó dju hesahe ġaksüwdadama,
Hado cheme luhušüjome.”

“Tuime djó, dju hesahe tchüima,
Hado cheme duhu pajome seyo ksejome.”

²⁶ “Tui me djó, nüna na djodruge uw chejome,
Hado cheme ná bupye-ñipyen na mülaw ñihow nadra je ana dawbamme.”

Vyeñiw na je nülvowe

²⁷ “Sešo dzüvodo djó no chei me, bá vyeñido na nülvow dawwe; bá dju mau daiba sena uw dajo dawwe.

²⁸ Bá dju chemui ma, sená gaġüzü djüjo dawwe; bá dju zeamei ma, senábo kügüijo dawwe.

²⁹ Dju bákrumo ge tcheima, ichi ge krumo a go je djüwe; seyo dju bachi ġüfaw laġaima, se í bá polu djulawe djuchewe.

³⁰ Dju damje bá prüima sená djüwe; seyo bachi gañ laġaimeje, í djuprüwe.

³¹ Seyo ba nüna ná bá küna dawweġne vyedama, baje ná süna dajo dawwe.

³² “Sešo ba ná nülvow dai ná akasa ba nülvow dame je, ba ha dew dawwa?
Hado chemeje lalo dado na je, ná dju nülvow daima na je sená nülvow dašoi.

³³ Ba bá dju uw daihi ma sená akasa uw daijobame, bá ha dew chejowa?
Hado chemeje lalo daw na je süna bó dašoi.

³⁴ Sešo ba í chí gudzumeje, nachi go patchojoġne vyemeje, bachi ha uwwa?
Hado cheme lalo daw naġüťchü je chí bó gudzušoi.

³⁵ Sešo bá vyeñido nadra nülvow dawwe, seyo uw dawwe, seyo patchojoġne mavyew chí gudzujo dawwe; seyo babó dew lapsü lyijome; seyo ba Tawgyew í üsaġne chejome, hado chemeje í se nabó dju mašüvzüdüġejome, dju kew nadru ge nülvoi me

³⁶ Baw küna nülvosüwma, sünambo ba je nülvojo dawwe.

Udru ge dju truchoaawe

³⁷ “Külü dju jowe, sündame badru ge je külü majojome; trudañe djuchewe, badru ge je truda machejome; aloijoda, sündameje bá je alojome.

³⁸ Djüjo dawwe, sündame bá je djüjome: nüna na düsdzü-düsdzüñe seyo so-soñe seyo gusuañe badru ge sui jome, hado cheme ha chi yo ba tsoima, se chi yo babó je seiyo tsojome.”

³⁹ Sündatcholye i ná zeğaw a yo chetcho: “Hawa ñiğew ye, ñiğew í ġabo trufijoma? Hawa naksü noğu ge magaa joma?

⁴⁰ Shürhaw na nudzoğ chi dadrüw na yo madewfojome, sešo djudamje dagro dama, i í chi dadrüw imbó vyedujome.

⁴¹ Ba bá ñuw ichi iñi go gashüsadow shobosa í hado hoiya, seyo bá nudzoğ bañi go sholbosa duw ye maholama?

⁴² Seyo ba bá nudzoğ bañi go sholbosa mahomeje, ba bá ñuw ichi í kúnda chefi jowa, ‘No ñuwwa, mola bañi go gashüdaw ye lahuajoma?’ He dakulyutçüwba, uvromashü bachi iñi go sholbosa lahuavzüwe, sündameje sese bachi üñuw ichi iñi go gashüdaw ye hohulye lahuahifijome.

Shoñ í hosüjo ye üje yo

⁴³ “Ha shoñ uw a je ñime, dju sheje ha madağiw jewma, seyo ha madağiw shoñ je ñime, dju shejo uw jewma.

⁴⁴ Shoñ küña duma, nudzoğ üje yo hosüwme; hado cheme nüna na gralye go lufuje mapyowme, seyo küfsüje go angur mapyofijome.

⁴⁵ Nüna uw na nudzoğ lu go ñu uw chehuahi; seyo nüna mau na nudzoğ lu go mau ñu na mau yo chehuajome; hado cheme lu ge ha gudama se i namdzu go kahujome.

Ñe daw nüna sama ksü yo duw

⁴⁶ “Ba nó ñu chew ná madzüjomeje, sünameje hado nó ‘He Tawgyewwa, he Tawgyewwa,’ cheiya?

⁴⁷ Dju damje nochi ge jikuima, seyo nó ñu í dzühulyeñe zew dzüima, no djo trujome, na dju vyeduwma?

⁴⁸ I se nüna i vyeduwme, dju ñe damkoi sese nogüdzü ye ġyuw chigalye kunu ge ñekrü dzuñe, seyo hutçuğö-ğölüşü ye idru yo da kaa, sešo í madañifijome; hado chemeje i lyow yo dada.

⁴⁹ Séšo dju dzhutcholyeñe zew madzüma, se i se nüna i dambo vyeduwme, dju nogüdzü ye ñekru lyow madaw dadama. Se udru ge hutçuğö-ğölüşü kame, i sebyo-seğyo ngüañe seyo se i gaañe ganü-gağaa.”

7

Kulokyew ichi umsow vyedaw ye Jisu i vyelamoa

¹ I í ñu ná nüna na trumdzoalyeñe Kafarnahum ñetrü ge jiku.

² Sünda mükaw a ichi kulom djü i, í ñeşümbö veduw vewma, usso nañe dzüjo veduw lyada.

³ Jisu iñiñ hutraw-notraw dzühulyeñe Yahudi ñetrü go nugow na ütrü ge í kulo í jikuñe dagyoiwe cheñe ki.

⁴ Na Jisu ichi ge jikuñe ishitrü ge gaañe ana che, “Ba ibo he i daijo dawwe

⁵ Hado chemeje i ñi ġübye na nülvo daw, sünda ñi melye ñe ije i daihu.”

⁶ Jisu i nadra nadra hutro jisa, sünda i ñe yo aña üğa ñibisa sa a, mükaw i üdraw na yo ana cheñe ki, “He Tawgyewwa, ba ñikuñisüw djudajodawe, hado chemeje nochi ge übadzü ñime, ba no ñelütsü pudaw ge jimyojo.

⁷ Sündada nudzo no bachi ge jikujo übadzü duñe mavemme, sé ba bá ñu i truñe no kulo usso dagyoiijodawe.

⁸ Noje nūna na ũla yo nūnabame; sūnda shipashi na nogzū geme, sūnda nūna a í 'Kab' chewñe se nūna ye kaw, sūnda ũtro a í 'age kab' chewñe i kaku; sūnda no kulo na 'He i da' chewñe na se chiğa i daag."

⁹ He ñu í dzühulye Jisu i lumashūw vea, sūnda i ufum ge nūna upu kalasalai nachi ge tcholtruğiañe cheñ, "No djo he trungkoi heme, Israyel ge je no ana veksūw mapame."

¹⁰ Sūnda nūna kidaw na ñe kaku hobanda, kulo usso nadaw i dagyovodabi.

Dzūdo í shūdūgye

¹¹ Me ñegi fum sa a i Nayan cheñe ñetrū a ge ji, ichi shūrhaw nañe seyo nūna upu ũdra jisa.

¹² I se ñetrū gow fūta ũtrū iñisa jiku, hojodawe, nūna na ñimo a í ñepsū ge la kahuangkoi; se ye ũyan ũsaw akasa ba, sūnda i mūjem: sūnda ñetrū gow šūpo nūna añe ũdra dusa.

¹³ Í hoñe Prabu ũdrapra-ulupra na, sūnda i cheñ, "Dju ksewe."

¹⁴ Sūndawñe i iñisa ge jikuñe ñimo vedaw i ki; sūnda gidaw na ġogog jebi, sūndawñe i cheñ, "O muhumya, No ba chengkoime, pakūlyejodawe."

¹⁵ Sūndawñe se dzūdaw ye pakūlye ġyo, sūnda ũtrū zekūlye: sūnda i í ũyañ i djūlye.

¹⁶ He yo vyew na ġeatsū, sūnda na Tawgyew ibo gow troñe ana che, "Ñimko a šūpo dyew ñihow truw a kakūlyadame, sūnda Tawgyew i í nūlvow i nūna na she."

¹⁷ Sūnda ibo gow ñu ye vyew Yahudiya seyo iñisa gow vyew ñetrū ge truzeġiatsū.

Yohañ Baptisma djūw í dzūw

¹⁸ Sūnda Yohañ i í shūrhaw na he ñu na trutsū.

¹⁹ Sūndawñe Yohañ i í shūrhaw nangko yo ksū i balalyeñe Prabu ichi ana dzūw ki, "Kakujo ye babamma, mo no utro na ġyokrūjoma?"

²⁰ Na ichi ge jikuñe cheñ, "Yohañ baptisma djūw i ñi bachi ge ana a dzūw kidame, se ye kakujo ye babamma, mo no utro ġyokrūjoma?"

²¹ Sa yo sa a i šūpo na usso naw yo seyo duhu yo lahuaida; sūnda mūtū kamyodaw seyo šūpo iñi ġiw na iñi djū.

²² Sūnda i í che, "Djo ha ha hohuñe dzūhudama, kañe Yohañ i trujo dawe; iñi ġyew hohungkoimme, ũshi lyew kahingkoimme, ġoġo nadaw i dagūdrajemme, ufu vaw dzūhungkoimme, sūnda dzūdaw ye ũshūkūlyejemme, sūnda sapse na Tawgyew i shi-ñu trujeme.

²³ Tawgyew i šūvzūw djudra duma na ushi mahūtrūjome."

²⁴ Yohañ i kidaw nūna na kawñe, Jisu i Yohañ ubo gow nūna na ana tru, "Djo bye ge ha how jiña? Ha, ñedzūlyiw yo age ngūa sūge ngūa daw müsū ġi?"

²⁵ Nameje djo ha how jibaña? Ha, nūna gye howsa shedaw í? Howe, dju gye-ġuvo uw sheima sūnda ñe uw ge gyoima, na mahal ge ġyowwa.

²⁶ Nameje ha how jimdbobaña? Ha, djuma a ñihow í? Am, no djo trungkoime, ñihow truw ije dyewfo.

²⁷ He ye seabamme, djubo ġidama: 'Howe, no muko í bavro bavro kijome, dju bavro ge kañe ġabo gudow davojome.'"

28 “No djo trungkoime, mim naluhu yow sadaw na, namko ye Yohañ i dyewfo djuje mome sé dju Tawgyew i ñe ge imisafo dama, i se ije dyewfo me i.”

29 Sündä vyew nüna na seyo patso-lavow naje dzühuñe Yohañ ichi gow baptisma lañe Tawgyew i umso ve.

30 Sé Farisi seyo shotuko-kunu davow na ichi baptisma malañe Tawgyew i ġabo shedaw i madzü.

31 “Sündada: no he shülsongkoi gow nüna na ha üdra tsojowa? Na ha veduda?”

32 Na se angasa na veduw dju bajar ge ġyoñe naġüthchü ġuksuġiñe ana cheġiw, ‘Ñi babo bzüva viw, se ba ñuksu je mada, sündä ñi duhu dawgeje ba kseje makse.’

33 Hado chemeje Yohañ baptisma djüw i odje je matsaw kakülyada seyo tsü je matuw kakülyada, sé ba cheiye, usso ge mütü du.

34 Nüna üsaw na tsa tuñe kakülyahume; se ba chewye, ‘Howe, tsaġotüw sündä tsü tujetchüw nüna nawa, patso-law üdraw seyo lalo ġifuġuw nadraw.’

35 Sé patsü-sholu ye nasaw nachi í umsoñe da veda.”

Simon Faresi ichi ñe ge lalobram í muchoahuw

36 Sündä Farisi a ye í üdra ava tsasaweñe bakuda; sündawñe: i se Farisi i ñe ge jiñe ava tsajone ġyoha.

37 Süge se ñetrü yo lalobram a ye, i Farisi i ñe ge ava tsaw jikuñe ġyoda che danghulye, kunulübzü yo daw shüve a ge šowsa šow uhu lajikuda.

38 Sündä üshi ütrü ge, fum gow gudzüñe kseñe üshi i üñišü yo daġüñe sündä nudzo ükye gow ükyetrü yo düğüdra sündä üshi ge umdzu yo tsa tsañe, šowsa šow uhu yo šüi.

39 He í holyeñe, se Farisi dju í baladama, üdrü-ulu ve vemche, “I ñihow truw nünan meje i danghujobi, dju i kingkoima, se ye djuma seyo kûna mimma cheñe? Hado chemeje ibo lalobrambabi.”

40 He í dzühulye Jisu i hutrolañe cheñ, “Simonña, no ba hadamje a chejome.”

41 “Bo djüw a ichi gudzuvaw ksü duw, a ye lumu yo bosüñ fo pom, seyo utro a ichi ge lumu yo bosüñ pomġü duw.

42 Ichi ge domġütchojo ñiahuñe, sündawñe i naksü maksü i ujobammeñe traaha. Sündä: naksümko a dju í nülvo fo vejowa?”

43 Simon i cheñ, “no vew ge, i djü añe traafodama.” I í cheñ, “Ba uw vebadamme.”

44 Sündä se mim ichi ge tcholtrüñe i Simon i che, “Ba he mim i homa? No ba ñe ge jikuwbi sé ba nó üshi chejo hu je madjü, se i noshi i iñišü yo dagzüida, seyo i nudzo ükyetrü yo düğüdraida.”

45 Ba no umdzo yo bubu matsa, se no jikuw yo i noshi i umdzo yo bubu madamdu.

46 Ba no kye ge tel je mašüi; se i noshi ge šowsa šow uhu šüida.

47 “Sündada no ba chengkoime; i lalo šüpo duw ye, muchoihumme, hado chemeje i šüpo nülvo dada; sé djuchi mesame muchodama, i nülvow je mesame dawba.”

48 Sündä i mim í che, “Ba lalo muchoajemme.”

49 Sündawñe üdra a ava tsaw ġyosadaw na, nadrü-nalu ve vetsü, “He lalo na muchoihu ye djubajema?”

50 Se i mim i che, “Ba küġüw ye ba ġaksüi damme, lüshüw yo kajodabe.”

8

Jisu ichi shürhaw na

¹ Se yo na ñetrü ñetrü shi-ñu tru ka, seyo Tawgyew í ñe gow shi-ñu na truñe kahi, sündá i nadra shürhaw ġü yo ksü duse,

² seyo mim üchea naje djuso gow mütü na lahuañe so naw na dagyodama, se iñiñ ye Mariyam Magdalini chewme, djuso gow mütü mro kahuadama.

³ Seyo Herodes i hokrüvow Kuja ufum Yoanañe Susana seyo šüpo mim na í ná gañ-miği yo na kulom na hotunovow.

Iği truw ichi zeraw

⁴ Nüna upu jikyeğiasüwñe, seyo ñetrü ñetrü gow na je ütrü ge jikutsüwñe, i zeğaw tru:

⁵ “Üsü traw nüna a ye üsaw traw jihua: trangkoi ye üsü üchea ye ġabokutru ge gaa, sündá dügrüprag, seyo ñedzü gow musu na pilag.

⁶ Seyo üche ye kunuka udru ge gaa, sündá shükülye, séšo hu gzüw mapawtro graha.

⁷ Üchea ye tsü namko ge gaa, sündá tsü na üša üša shüsañe i shümüla.

⁸ Seyo üchea na no uw ge gaada, sündá shülyilyeñe sheje fuğua dzaw djüda.” Ana chefialyeñe i gow yo ñu che, “Djuchi ge dzüjo ufu duma dzüsawe.”

Zeğaw yo trüdrü

⁹ I shürhaw na i dzü, “He zeğaw ichi hawa?”

¹⁰ I cheñ, “Djo Tawgyew i ñe go ñu na dzüsüdügyewbi, se utro na zeğaw go trujome, hado chemeje na hohuñe mahohujome, seyo dzühuñe je madzüsüjome.”

¹¹ “Zeğaw i chemeje ana me: üsü ye Tawgyew í ñume.”

¹² Ġabo üdza ge ġyodaw na dju dzühudama; sündawñe mütü na jikuñe nadrü-nalu gow Tawgyew í ñu i lañe katrükralye, hado cheme ana malyajošoma na Tawgyew i küğüñe na ġaksüw pajo.

¹³ Kunnu udru ge duw na, dzüñe lüshüw yo shi-ñu bo lašoi, séšo ükrü ñiw tro ye na umso mesame kuw ve, sündá muchow ge gaaha.

¹⁴ Dju kusu ge gamyoadama, se na, dju dzüi na, sé vro ge kañe vesumow seyo bo-luko seyo shüng-dongkoi ge duhu ge gamyojome, sündá na sheje mañujo.

¹⁵ Sé no uw gow na he me, dju shi-ñu lu-drü lümyew yo dzüñe veima, na se yo sheje lakufijome.

Mitrü yo zeğaw

¹⁶ “Djuje müsaw tchüholyeñe boğtom yo pelye mavejo, seyo buğo ufum ge mavejo, sé mütchü ubo ge vejo, hado chemeje nüna jikudaw na müsaw pajo.

¹⁷ Haje mamüşüme, ha ye matruhoajoma; seyo haje trumšüw ñime, se ye madanghujome sündá müsaw mapajoma.

¹⁸ Sündada ġüdzüw ġyowe, ba ha vego dzüngkoima? Hado chemeje djuchi ge dumañe vedama, i djüpyojolume; seyo djuchi ge ñima, ichi gow se ije lağajome, ha ye ichi nudzoğchiñe vedama.”

Jisu ichi ñešügmüsaw

¹⁹ Üyañe uñuw naksü ütrü ge jiku, sé nüna añe duw tro sa í matüvafilye.

²⁰ Sünda í tru, “Bañe bañuw naksü ba tüvajoñe ñepsü ge gudzudame.”

²¹ I í ñu i hutrolañe che, “No añe no ñuw he bamme, dju Tawgyew i shi-ñu dzüñe seyo umso vewma.”

Śiw-lyiw law kaw í dağüdzüahuw

²² Sesüyo ahua ye i seyo i shürhaw na lü ge gyolyi, sünda i ná cheñ, “Age djebya, hu dügepsü ge jibo.”

²³ Sündawñe: na lü í shaa.

²⁴ Sündawñe na jiñe í dapüñe, sünda cheñ, “Tawgyewa! Tawgyewa! Ñi mauwfimauw lyangkoimme. Sündawñe i pakülyeñe ñedzü śiw-lyiw seyo hu i lashüraw i miği sündawñe na damudoañe ġüdzüw lyaha.”

²⁵ Sünda i na che, “djo küğüi ye hanga?” Se na ġeaglye seyo mavenghuañe nağüтчü cheği, “He djubajema, ñedzü śiw-lyiw seyo hu naje dügyeiye, sünda na i chew dzütsü.”

Ġuló mauw na lahuahuw

²⁶ Sünda Giraseni na ñetrü ge jiku se ye süge pseğ ge Galili hu ütrü iñisa ge.

²⁷ I hudza ge jikuwñe, se ñetrü go nuna a í tüva, djuso ge mütü kamyodama. Seyo śüpo üğaluw gomdo gye-ğuvo je mashew seyo ñe ge je mağyow nuğu ge aka ġyow.

²⁸ I Jisu i hoñe šogzu, sünda uvro toi gaañe gow yo ñu che, “He Toğgroyama Tawgyew üsaw Jisu! No badra ha dajo duwa? No ba chengkoime, no ñiku-ñisüw djudjüjodawe.”

²⁹ Hado chemeje i mütü í se nuna usso go kahuaawe cheñe dügyengkoi, sündada i üdra gow lyanggudrulai. Sünda nuna na í sülyeñтчü seyo sülyebu yo vogo vew, sedamje i se sü na gokyooaha, sünda mütü ye i sümbye ge sagañgudrudügye.

³⁰ Jisu i í dzü, “Bañiñ hawa?” I cheñ, “Upu,” hado chemeje śüpo uğulo na usso ge kamyolödabi.

³¹ Sünda i í cheñ, “No noğu ge djukadügyejowe.”

³² Süge puge vo upulo dyew a tsamroñe ġyoda, sünda: i í cheñ, “No nalung ge kamyodügyewe.” Sünda: i í kamyodügye.

³³ Sündawñe se uğulo ge nuna usso go kahuañe vo usso ge kamyoağ sünda se vo upulo ye ġo ge ġüañe husu ge gamyoñe gamüla dzüag.

³⁴ Fugulu ġyokrüw na se dagjew i holyeñe ġe djeshükralyetsü, sünda ñetrü ñetrü ge kañe he ñu i trutsüküğa.

³⁵ Sünda nuna na se dajew i how jihuatsü, sünda Jisu ichi ge jikuñe dju nuna usso go uğulo mauw lahuadama se ye Jisu ishitrü ge gye sheñe ġyodaw i hohuñe ġeag.

³⁶ Sünda hohusadaw nuna na ná tru, se uğulo mauw ye nuna i ñiku-ñisüw da vedaw í kúndañe uw dagyodama.

³⁷ Sündawñe Giraseni ñetrü üñisa gow nuna na Jisu i cheñ, ñichi ayo kahuağodabe; hado chemeje na ġemğekyoatsüdabi. Sünda: na lü ge gyolaye katrükralye.

³⁸ Djuso gow uğulo mauw lahuadama se nuna ye í che, no badra ġyokyejodawe, séšo Jisu i kadügyelye cheñ.

³⁹ “Bañe ge kañe nuna na truwe, Tawgyew i kúndañe babo aña śiw-lyiw chiğa dadama.” I kañe vyew ñetrü ge trüzeğiatsüğ, Jisu i nobo küña śiw-lyiw chiğa dadama.

Sonaw mim seyo dzüdaw mimsa naksü dashüтчo

⁴⁰ Jisu i Galili ñetrü go kalai sa a, nuna na lüshüw yo i tüva; hado chemeje na i ġyokrüñe ġyow.

⁴¹ Sündañe howe, Yayir cheñe nūna a iñiñ dju ñegru go dyewma, i jikuñe Jisu ishitrü ge gaañe cheñ, “Noñe ge jisawe.”

⁴² Hado chemeje ichi oje ġūyo ksü yo ūsam akasa a duw ye dzüasalaibi. I jingkoï ge nūna ishitrü ge gaatsü.

⁴³ Sūnda mim a dju oje ġūyo ksügomdo šü lu ġyowma sūnda dju nudzo shüw-duw na so naw dagyow nadru ge tratsüdabi sedamje djugzü gow je i madagyofibi,

⁴⁴ fum gow jiñe i gye üdza ge kig sündawñe sešüġdo a i šü luw ye lumudoag.

⁴⁵ Se yo a Jisu i cheñ, “No dju kidüġña?” Vyow na makitsüñe chetsüwñe, Patras seyo üdra ayo dusaw na cheñ, “He Tawgyewwa, bá he nūna fupulodaw na düñe badru ge gaiwa.”

⁴⁶ Séso Jisu i cheñ, “Djudamje a no kidawa hado chemeje no danghudabi nochí gow mu kahujewa.”

⁴⁷ Mim ye holyeñe no mamušufijobañe vewñe, usso somsokyo jikülye, sūnda ishitrü ge gaañe vyew nūna navro se trukülye, i hado kima, sūnda kūndañe mekutcho dagyogdama.

⁴⁸ I í cheñ, “Nosamya ba küġüw ye ba dagyodašoñe, lüshüw yo kajodawe.”

⁴⁹ I trungkoibalubi ye, ñegru go müġaw i nūna a jekuñe che, “Basam dzüdamme: müġaw i duhu djujuwe.”

⁵⁰ Jisu i dzühuñe cheñ, “Djuġejodawe; küġüjodabuwe; i basüjošome.”

⁵¹ Ñe ge jikuñe i üdra ye Patras, Yohañ, Yakub seyo mimsa üyow-üyañ na tralyeñe djuje ütrü üñisa ge majidüġgyew da.

⁵² Sūnda vyew na ubo kse-ñiġitsü, séso i cheñ, “Djuksejodawe; I madzüme, i drumabadame.”

⁵³ Nūna na i dzüdabi che danghuñe, i chedaw i dzüñe tchüg.

⁵⁴ Sé i ügzü í kigolañe ġuksuñe che, “He akoa pakülyebi.”

⁵⁵ Sündawñe ġulo üshükülyeñe pakülyeg; sūnda i na dügye í tsajo hadamje djüwe che.

⁵⁶ Üyawñe üyañ naksü mavenghutsüg, sé i ná cheñ, he ha dajema se i djuje djutruwe.

9

Shürhaw ġūyo ksü ná jidügyew

¹ Sündatcholye i na ġūyo ksü shürhaw na balañe ná ġuló mauw seyo so naw na dagyow dajo gow bó vye.

² Sūnda ná Tawgyew i ñe go shi-ñu uw truw, seyo so naw na dagyowe cheñe ki.

³ Sūnda i ná che, “Jiw ge haje djulawe: shobo je djulawe, kapüġa je, odje je, bo je seyo polu ksü ksü djulawe.

⁴ Seyo dju ñe yedamje ba ġyogoiima, se a ġyojodawe; sūnda se yo kahujodawe.

⁵ Dju bala maġokyema se ñetrü yo kahuañe ishigo ñelümo na pafiajodawe, hado chemeje nadru ge na je truksüfijo.”

⁶ Sūnda: na jihuañe ñetrü, ñetrü shi-ñu uw tru kaahi, seyo nūna ná djuje djuje dagyoñe kaahi.

Herodas í velamow

⁷ Seyo ñetrü go psüġi fum yo nugo Herodes i he í dzühulyeñe mavenghuag, hado chemeje küña nūna na trudabya, Se i Yohañ dzüdo go üshükülyetchoda cheñe.

⁸ Sūnda kūña nūna na he i, se Eliya i hohuda: utro na ana je chetcho, ahugo ñihow truw mūgaw namko yo djuma ūshūkūlyetchoda.

⁹ Sešo Herodes i che, “Yohañ ūkye bo no poskeadūgyembi, he ye djutchoa, djufo go ana ñu dzūhumkotchoiya?” Sūnda i í hoğōñikūlye.

Nūna hadza pom ná gyew

¹⁰ Sūnda í shūrhaw na kakuñe na ha ha dalyedama ná í truatsū. Sūnda i ná utro ge lagañe, Betseda cheñe ñetrū a ge lañe kakyē.

¹¹ He i danghulyeñe nūna na ufum fupuloatsū, sūnda í ná lūshūw yo tūvatsū, seyo ná i Tawgyew i Nogofo shi-ñu truckye, sūnda djū dagyodūgyeğōñidama, ná dagyo.

¹² Ñeto kapsealaibi a, se í shūrhaw ġūyo ksū jikuñe che, “Upu na kadūgyejodabe, kañe na ñetrū ge ná ġyojo seyo tsajo būhohidame, hado chemeje ñi ġūdzūw ñetrū ge dume.”

¹³ I ná che, “Djo ná tsajo djūbalabya.” Na cheñ, “Ñichi ge odje pom seyo tchūkro ksū yo haje ñime; sé ñi jihuañe vyow nabo tsaw-tuw prūlameje, se ye dujome.”

¹⁴ (Hado chemeje sa yo sa a muhu fo pom kuw du.) Sūnda i í shūrhaw na che, “Ná pom ġū, pom ġū dañe ġyodūgyewe.”

¹⁵ Na sūna dabadába, seyo vyow ná ġyodūgye.

¹⁶ Sese Tawgyew i ūlgū odje pom seyo tchūkrosa ksū í la, seyo ñedzūdru ge hotroñe na gağzūz djū, sūnda tchekuġi, tchekuġiñe í shūrhaw na djū nūna na hawe cheñe.

¹⁷ Sūnda: vyow na tsalyeñe tsaşelatsūdabi, seyo godza daw yo mo ġū yo ksū guw trūgula.

Patras i Jisu í Tawgyewñe vyew

¹⁸ Se i akasa ġūdzūw ge kagañe kūġūmkoi sese, seyo idra ye ichi shūrhaw na idra dusa, sūndawñe i ná dzū, “Nūna na nó ha cheiya?”

¹⁹ Na che, “Yohañ baptisma dju i ye, seyo kagua na mūgaw Eliya, seyo kagua na chew ye ahugo ñihow truw mūgaw nangko yo a ūshūkūlye da.”

²⁰ I ná dzū, “Sešo djo nó ha cheiya?” Patras i che, “Tawgyew i ūsaw Masi.”

²¹ Sūndawñe Jisu ná zūpsūgeñe che, “He ana djúje djuchewe.”

Jisu i í nudzo dzūjo í ñihow tru

²² Sūnda i che, “Nūna ūsaw í duhu paketrajobamme, seyo dasūñejome seyo kew mūgaw na seyo mūgaw sawlyiw seyo shizew-ñuzew na í hosūgaw vyeñe shijobamme, sūnda i ñegi dzū ye ūshūkūlyetchojome.”

Jisu ufum kasaw ye

²³ I vyow ná che, “djuma no fum kasajo vedama, nudzoġ yo makasajoñe trawe seyo shūwa nudzo shokru i gilañe no fum kasajodawe.

²⁴ Hado chemeje dju yo nudzoġ shūw ye fupojome vedama na shokru í moajome, sé djudamje nobo nudzoġ uluvyu takyoima se iyo í fupojome.

²⁵ Nūna na vyow druguw-drulyiw í patsūlameje, seyo nudzoġ uluvyu ye takyoame, semome ñiku-ñisūw pa, se yo ha palajowa?

²⁶ Djudamje no yo seyo no ñu yo ñimtchūñjema; nūna ūsaw ye je ichi seyo i awu ichi sūnda ġūdraw sorgomuko ichi lūshūw pawñe, ije ñimtchūñjome.

²⁷ No djo umso trungoime, dju ayo ha a gudzudama, namko he a ūchea na ana dame Tawgyew i ñetrū mahohumdoluyē, na dzūw ye kūnama madan-ghujome.”

Musa ñe Eliya naksüdra Jisu

²⁸ He ñu na chelye ñegi šügzü fum sa a Patras, Yohañ seyo Yakub na üdra kügüw pu a ge lañe jike.

²⁹ I kügüngkolui ye, ukrumro utro a lya, seyo i gye ye grobülašüksüne lüna-lünakülye.

³⁰ Sese, muhu ksü se ye Musa ñe Eliya naksü üdra ñu chitrunγκoi.

³¹ Na ġulo ġüdrawdra hohu, sünda i džüjo go ñu poġi, se ye Yarusalem ge dajo.

³² Patras ñe üdraw na drumuġoñatsüdabi, sünda na pakülyewñe, i ġulo ġüdraw; seyo se nüna ksü ye dju üdra gudžüsadama, hohu.

³³ Na ichi yo kajoñe dawñe, Patras i Jisu í che, “He übrawwa, ñi ha a ġyow ye uwme: sünda: ñi lañe ulüġü dzü dajome, a ye babo, a ye Musa ibo, seyo a ye Eliya ibo.” I madanghu, i ha chengkoima.

³⁴ I ana chengkobaiye, ná mumu yo boshiġiag, ná mumu yo bolyanγκoi ye na ġeatsüġ.

³⁵ Sünda se mumu yo ana ñu a zekülye, “He ye nosaw seyo no i golawme, i chew dzüwe.”

³⁶ He ñu i džuhunγκoi ge, Jisu i akasa hohuda; sünda i mazüda ġyoda, sünda ha hohudama, se ñu í se ñeto ge djuje malakülye.

Muhusa í ġulo mauw yo lahua

³⁷ Seyo se draha na pu gošü kagaahuñe, upu dyew a í jiñe tüva.

³⁸ Südawñe, upumko yo nüna a ye šogzuñe che, “He dadrüwa, no ba chengkoime, nosaw i nülwov hoiġodawe; hado chemeje i nosaw akasame.

³⁹ Sünda howe, ġulo mauw a usso ge kamyo, sünda i ülya akaye šogzukülyeg; seyo i se í ana ġüşhülyiġiada, se i üga ge üzetcho fegükülye; seyo í ana damgzüw yo ñiku-ñisüw da tra.

⁴⁰ Seyo no bachi shürhaw ná che, í lahuawe; séšo na malahuafi.”

⁴¹ Jisu i che, “He maküġü seyo bolu datchüw shürhaw nawa, no djodra küña kuw ġyofisajowa, seyo djó daw na vejowa? I muhu i cheñ, basaw i age la jekuha.”

⁴² I jimkolai ye ġulo mauw ye í lola padubug, sé Jisu i ñišgzüñ ġulo í miġiñe seyo muhusa í uw dagyoñe uyow ügzü ge djü.

⁴³ Südawñe vyow na Tawgyew i gow yo mavenghutsü. Sé vyow na í ha ha chiġa dadama se na trongkoiye, sese i í shürhaw na che.

⁴⁴ “He ñu ye djo djofu ge vejodawe, hado chemeje nüna üsaw í nüna nagzü yo kigo ladüġeyjome.”

⁴⁵ Sé na he ñu i madzüsü; se i í madanghdügye; seyo na he ñu ífo go idra dzüjoje ġetcho.

Vyow namko yo dyewfo djuwa?

⁴⁶ Sünda shürhaw naġütchü ge ñu a kakülye, se i ye nangko a dju dyewfoma?

⁴⁷ Sešo Jisu i nalu ge vedaw í danghula, sünda muhumsasa a í lañe idra a gudžudügye,

⁴⁸ Sünda i che, “Dju damje noñiñi yo he muhusa i hutroima, se i nó hutrolawme; seyo dju nó hutroima, se na nó kidaw na je hutrolawbamme, hado chemeje djomko yo imisa yo imisafodama, se ye dyewfobamme.”

Dju maveñisama, na udrašome

⁴⁹ Südawñe Yohañ i che, “He übrawwa, ñi nüna a ye bañiñi lañe ġulo mauw í lahuahuw hohudame, sündada ñi í gohame, hado chemeje i ñidra ñisañe bafum makasa.”

⁵⁰ Jisu i ná che, “Í djugohajo dawé; hado chemeje dju djo mauw madama, na djodra dujome.”

Jerusalem ge jiw

⁵¹ Se í sorgo ge lalyimdrü ñeto kakusalaibi sese, sündawñe i Yarusalem ge jijoñe vye.

⁵² Seyo i ivro ge mukow ki: i Samariya na ñetrü a ge ji, ibó ġyojo dashütrüivojoñe.

⁵³ Sé na i magyogadügye, hado chemeje i Yarusalem ge jingkoida.

⁵⁴ Se i hoñe í shürhaw Yakub ñe Yohañ naksü che, “He Tawgyewwa; ba ha tsüda, se i ñi dügye, se i ñedzü go mi gaañe ná damyawewñe ma?”

⁵⁵ Séso i tcholtruġiañe na ze, [Seyo che “Ba madanghuwa ba ha uġulo yo ma. Hado chemeje nuna üsaw ye nuna nachi luvyu ye damütrajoñe madaw se í ġaksüijoñe kakuwme.”]

⁵⁶ Sündalye iñe i shürhaw na ñetrü utro ge jitrükralye.

Jisu ufum kasaw chemeje

⁵⁷ Se i ġabo jimkoi ge, se djuma a ye í che, “Ba hange hange jiyima, no bafum kasajome.”

⁵⁸ Jisu i í che, “Şelü ichi uksu seyo ñedzü go musu nachi üdrü duwme, sé nuna üsaw ichi ükye vejo je ñe ñime.”

⁵⁹ I utro nuna a i che, “Nofum jisawe.” I che, “He Tawgyewwa, nó uvromashü kadügyevzüwe, no awu í ġuavzäjome.”

⁶⁰ I í che, “Dzüdaw na ná nudzoġ dzüw í büġudame, sé ba jiñe Tawgyew ichi ñetrü go shi-ñu trujodawe.”

⁶¹ Utro a ye je che, “He Tawgyewwa, no bafum kasajome; sé uvromashü nó kadügyevzüwe no nochi ñe go nuna na yo mülüñ kajoñe.”

⁶² Jisu i í che, “Djudamje nudzo ügzü i luksungkuġu ge kiñe fum ge homeje, i Tawgyew i ñetrü ge ġyofiwjome.”

10

Shüraw mroġü ná kiw

¹ Seyo he ñu nafum sa a Tawgyew i nuna mroġü lapyo, sünda ha ha ñetrü ge i jijoma, süge ksü, ksü dañe ivro kibraġitsü.

² Sünda i ná che, “Rhamu kiw añe dume; séso chiġa daw mesame duba sündada vi übraw i küġüwe chejodawe, se i í nudzoġ vi í tcholajo vi nuna kiwe.”

³ Jiwe; howe no djó fugulu vyeduw dañe fumsu namko ge kijome.

⁴ Sündada dzulngasaje djulawe, kapüġa je, seyo shita je; sünda ġabo ge je nuna ná dju je gaga djudawe.

⁵ “Dju ñe ge jihima, uvromashü chevzüwe, ‘He ñe ge ġüdzüw djuwe chewe.’”

⁶ Süge djuma ġüdzüw pafiwo dumeje, ba ġüdzüw djüdaw ye üdra dusajome, momeje bachi ge kakutchojome.

⁷ Se ñe ge ġyowe, sünda ichi go ha paima, se í tsa-tuwe, hado chemeje chiġa daw nuna na ná shishü patsüw; ñetro-ñetro djukahijodawe.

⁸ Seyo ha ñetrü ge jiyima, sügow nuna na hutrovowñe, se bavro a ha vedama se i tsajodabuwe.

⁹ “Sügow sonaw ná dagyojodawe: sünda ná chewe, ‘Tawgyew í ñetrü ye batrü iñiñisa ge kakudamme.’”

¹⁰ Sé ba ha ñetrü ge jimyoima, seyo sügo nüna na bá mahutrovolaime, ná bodzağ ge jeñe ana chewe,

¹¹ “Djo ñetrü yo ñelümo naje, ñishi ge güdrüsadow na, ñi djovro a paf-amkoimme, sedamje he í danghujodawe, Tawgyew í ñetrü djotrü iñiña se kakulaimme.”

¹² No djo trungkoime, se niyay ñeto se ñetrü ye Sodom ñetrü í je mofokaw gijo lyajome.”

Üdrü-ulu mavvegudow ná tui

¹³ “Tui Kurajiña! Tui Betseda! Dju dyew chiğa dafiw ye djo ge dadama, sese í Sor ñetrüñe sidon ñetrü ge dameje, na ke ge gye güpañe seyo kütsesüpu ge gyoñe na kye ge dru-lu vyegudoñjemma.

¹⁴ Sešo, melye gzuñe chegiyi sehu bafo vyego yo yeje Sor ñe Sidon naksü vyego ye vyeksufofijome.

¹⁵ Seyo Kafarnahum ñetrü, hawa ba soğgo kuw lüvzüw dalyijoma? Ba bó noğu üla ge kuw üla kaajome.”

¹⁶ “Dju ba chew dzüima, se í no chew dzüjo, sünda ba dju mauw daima, noje í mauw dajome; seyo dju no mauw daima, se ye no kiadow í je mauw dajome.”

Shürhaw mroğü na kakuw

¹⁷ Se shürhaw mroğü yo ksü na lüshüw yo kakutchoñe che, “He Tawgyewwa, ba üñiñi yo se gúló mauw na je ñichi pudu-puña ulunge pumódame.”

¹⁸ I ná che, “No mütü í ñedzü lüğaw veduw ñedzü go gaahu hohuime.”

¹⁹ No djó byu na seyo mütü güdzü na dügrüdzagofijo djüwme, seyo vyeñiw nachi go vyew mau dafiwo ná madafijo pudu-puña djüwme; seyo ha gañ yo je djo naw madafijomme.

²⁰ Sé sünašo cheñe djulüshüwe, se gúló mauw na djo pudu-puña yo pumoda cheñe, sešo djo lüshüjo dawe se djo ñiñi Ñedzü ge gi vyedotro yo.

Üsaw udru yo uyow í duw

²¹ Sa yo sa a í gúló güdraw yo dañe lüshüdzoolye, seyo che “He Awa, Ñedzü ñe No í Tawgyewwa, no ba ulu yo uw cheime, se ba he ñu na danghu-kinghuw nüna seyo vyesü-vyelüw na yo müşüñe veda, sünda angasa natrü ge duda. Am, he Tawgyewa, hado chemeje bá he í uw veda.

²² No awu í nó vyow nodru ge traadamme; seyo djuje madanghu se saw ye djujema, awu aka danghuba seyo awu djujema se je dju madanghu, se í ye sawchi gemdo aka seyo se djudru ge saw í dujoñe vyedama.”

²³ Seyo í shürhaw nachi ge tchoñe akasa ge che, “Süvzüwme se iñi ye, se he ñu ná se ba hoiwa hoiye,

²⁴ Hado chemeje no djo chemkoime, şüpo ñihow truw na seyo ñubyu na tsüdaw ye, se ba ha ñu ye hoima howe; sé maho seyo ha ñu ye ba dzüima dzüwe, sé madzühu.”

Samri nüna uw a í zeğaw

²⁵ Sündawñe nüna a gudzülyi; sünda ana cheñe í küna daima hopüñew che, “He shotuko-kunu go dadrüwa, shüwa shüw shüjo ibo ha dameje ujowa?”

²⁶ I í che, “Shotuko-kunu ge ha gida? Ba künda ngüña?”

²⁷ I trucho, “Ba Tabraw bá nudzoğ Tawgyewich go vyew nudzoğ drü-lu seyo nudzoğ krâse seyo nudzoğ budzu vyew se nadra nülwov vyejedawe; seyo nudzoğ gağopsügi-ğampsügi go ná nülvojo dawe.”

²⁸ I í che, “Ba umso chedaba, he ana dabya sündame üşü gyojome.”

²⁹ Sé í nudzo í usu dajoñe veñe Jisu í dzü, “Nameje nochi ġafopsüġi-ġampsüġi na djuwa?”

³⁰ Jisu í che, “Nüna a ye Yarusalem yo Jeriko ge jimkoi ye ñigudu tsaġaw na djeshiġiaña i gye í na shalügülag, sünda gü-shü dañe atrü dzüw datralye katrükralye.

³¹ Sünda ana da, se ġabo ge mġaw a kamkoi, séšo í holye ġeaglyeñe djetrükralye.

³² Ana vedumbo Lewi a ye je sešü katcho, ije í holyeñe ġeaglye djetrükralyetcho.

³³ Séšo djudamje Samari ñetrü a go sa a kakükülye, sünda í hohulyeñe nülvo vyela.

³⁴ Sünda itrüġaň ge jikuñe seyo ichi üshi ge luvuhu seyo tsühu prüñe gyeche-gyelye yo pyogo, seyo í güġedru ge gyodügelyeñe ñe ġyow ge lajikye sünda í uwyo hoivo.

³⁵ Se draha í lumu yo bosüň ksü lahuañe se ñebraw i djüñe che, ‘I uwyo hoivojodawe, seyo bachi go küña kapyoima, se ye no kakuwñe doajome.’ ”

³⁶ Hesahelu he ba vyew ge se na ñigudu-tsaġaw süna ge lyalahado, nadzüngko a dju ichi ġafopsüġi ġampsüġi go na ñe veiya?

³⁷ I che, “Se i dju í nülvodama.” Jisu í che, “Kai, baje kañe süná dajodawe.”

Marta ñe Mariyam

³⁸ Sündatcholye Jisuñe i shürhaw na jimkoitchoi ye, se i ñetrü a ge ji, seyo Marta cheñe mim a ye í iñe ge balada.

³⁹ Seyo Mariam cheñe uñum a duw, i Tawgyew ishitrü ge ġyoñe i shi-ñu dzüw.

⁴⁰ Sé Marta chiġa da dañe mavenghua sünda itrü iñisa ge jikuñe che, “He Tawgyewwa, ba haje mavema, noñum í no akasa chiġa dawene traadaw ye? Sündada í chetcho, nó datunowe.”

⁴¹ Tawgyew í i trutcho, “Marta O Marta; ba šüpyo ñu ha vejema venglyeñe seyo mavenghu lyaha.”

⁴² “Séšo ñu a ye umsoma, seyo se chiġa uw í Mariam i golame; se i ichi go malaġafijomme.”

11

Tawgyew Küġüw í dadrüw

¹ Sündatcholye ahua ye i nolu a ye küġüngkoi. Seyo i se küġüfiahuwñe, ichi shürhaw namko yo a ye í che, “He Tawgyewwa, Yohañ í i shürhaw ná küna veduw küġüdrüdama baje ñi süna veduw küġüdrüwe.”

² I í che, “kye damje djo küġümkoime, sese chejodawe: ‘He Awa,

Bañiň güdraw vejome, ba ġadzü kakülyawe.’ ”

³ “ ‘Ñichi muhu muhu yo tsajo-tujo í ñi djüijodawe.’

⁴ ‘Seyo ñi lalo na muchoaijo dawe, Hado chemeje ñi je, ñi mauw dado na muchoaijome, Sünda ñi mauw uw dajo yo ġaksüiwe.’ ”

Prünggudruwe

⁵ Sünda Jisu í ná che, “Djumko ye üdraw a duw ye djuwa, sünda í ñegimko ge pakülyeñe ichi ge ji í chewe, ‘He drawwa; nó odje üka dzü djüwe.

⁶ Hado chemeje, kasew-biſew go draw a ye nochi ge jikuda, sūnda ivro ge vejio nochi ge haje ñime.’ ”

⁷ Sūnda i ulung goſū ñu tru, se nó afafsūw djudjūwe; yabó ñegüdrüşü je dugoadammje, sūnda nosa ye nodra buŕo ge ġusadame, sūndada no bá pakülyeñe haje madjüfjomme.

⁸ No ba trungkoime, se ũdraw duñ sese je í pakülyeñe haje madjüfisabamme, sedamje i ñimtchüñ ye tralye prūdo ye í kũña tsūdama sũña pakülyeñe djüjoſo.

⁹ Sūnda no djó cheime; prūmeje, djo djüjome; tchūmeje djo pajome; dūmeje, djobo voajome.

¹⁰ Hado chemeje dju prūima, ná pajome; sūnda dju tchūima, na pajome; seyo dju dūima, nabo voajome.

¹¹ Djomko ye dju ana awu duwa, se ũsaw ye odje prūme, se í kunnu djü, seyo sūndalye tchü prūmeje, se tchü madjüw byu djü?

¹² Semome jeje prūlaime, se í mütü ġüdzü djü?

¹³ Sūnda, ba maulyeñe je basa ná gañ uw djüo danghumeje, se djo ñedzü go Awu, i ichi nudzoġ nūna prūi ná hado ġulo ġüdraw madjüjowa.

Jisu ñe mütü na go dyewfo

¹⁴ Sūndatcholye Jisu i ũgadow ġulo mauw a í lahuatcho; se ġulo mauw ye kahuahuñe, ũgadodo ye ũtrü zekülye; sūnda nūna na mavenghuatsü.

¹⁵ Séso namko ye kũña na cheda, “Í bó ġuló mauw nachi go dyewfow mütü ichi datunow yo lahuabaiwa.”

¹⁶ Utro na í dafidama hojoñe í ñedzü udru ge hadamge sheweñe cheshew shewe che.

¹⁷ Séso Jisu i, nadrü-nalü ge vedaw i danghulyeñe, na che, “Ha ha ñetrüġüfo ge braġidama, se ñetrüġüfo ye mütrüajome; sūnda ha ñe ye braġidama, se ñe ye je mümyajome.

¹⁸ Seyo sūnda mütü ye í nudzo íbo magotchow dame, se ichi ñetrüġüfo kũndañe dujowa? Hado chemeje djo nofo go ana cheſoibi, se mütü i datunow yo se mauw ná lahuabaibi cheñe.

¹⁹ Senameje no mütü i datunow yo ġuló mauw ná lahuabaimeje, se djó agü na dju tunow yo kakülyebaiya? Sūndada ná djo niyay djüw nūna chejome.

²⁰ Séso no Tawgyew udruyo ye uġulo mauw na lahuameje, Tawgyew i ñetrüġüfo ye djotrü ge kakujome.

²¹ Nūna gow na nachi ñe i ġaksüw chiaġi pyogoñe ñe í hokrüimeje, se ichi gañ-miġi na ġüdzüw dujo.

²² Seſo ije gofotchow na djuma a í tumuvojoñe í dafoahuñe, í se chiaġi na ha ye i veksūdama, sena laġalag seyo ichi gañ-miġi na laġañe habraġiame.

²³ Dju nodra ñima se i no mavyewme, seyo dju nodra dukyeġiyima se i trabraġiajome.”

Ġuló ñiſgzüñ ye ñe tchüw

²⁴ “Nūna usso go ñiſgzüñ ġulo kahuahuñe nokro ge ġyogojo tchüġijome, sūnda mapawñe i chejome, no ha ñe yo kahua dama se ñe ge kamyotchojome.

²⁵ Sūnda kakuwñe i ġümsa-ġümġañe howsa hohujome.

²⁶ Sūndawñe i idra ye i je mofokow uġulo mauw mro ye idra ye lakujome, sūnda na ilunge kamyoñe sayo sa ġyojome, sūnda se nūna ye uvro gow ije mokofow mauw lyajome.”

²⁷ Sese i he ñu i trungkoi ye upumko go mim a ye gow yo che, “Šüvzüwme se uluhu ye hayo sa a ba ġyodama seyo se apu ye ha ye ba mütsūdama.”

28 I che, “Am; séšo šüvzüzme i, dju Tawgyew i ñu dzüñe i chew dzüima.”

Ñedzü go ñu prüw

29 Se šüpyo upu kyeğipyo dawñe, i che, “He ñishü yo nuna na maume; na chishew tchünggudru; se ná Yona i chishew í tralye seyo haje chi mashejome.

30 Yona í kúna veduw Ninwe ñetrü go chishew vewma, sündambo nuna úsa ye he ñishü yo nuna na chishew vedujome.

31 Müdzavye go nugom niyay djüw se ñetomüdrü ayo nuna nadra gudzuñe, í datrüwñe chejome, hado chemeje i Suleman i ñu dzüjoñe druguw-drulyiw udza go jikuda, sünda holabya he ayo he a Suleman ije dyewfo a du.

32 Ninwe go nuna na Niyay djüw ñetomdrü ye hesalu yo nuna nadra gudzuñe, naso ge truchoaijome; hado chemeje na Yona i ñu tru í dzüñe nadra-nalu muchoagye sünda howe, age Yona ije dyewfo a dume.”

Usso go mütrü

33 “Dju nuna je bela ge mütrü tchühoñe ġumšü ge seyo ñeshü ge mavewme, sešo mütrü ubo ge dzugo vewme hado chemeje nuna jikui na hohujoñe.

34 Baso go mütrü ye bañi ye me, sündada bañi güdrameje, se basso naje vyow müsajome; séšo se ye maumeje, basso ge je nukuğujome.

35 Sündada ufu je ksü-üñi je ksü dañe ġyowe, se müsaw ye baso duweye nukuğuañeme.

36 Sündada baso ye vyow müsazeğjame, seyo se ichi hangeje manukrumeje, se sündame se vyow na müsajome, süna vyeduw ñeto ge dadawa, se mütrü ye ichi lünaw yo djó müsaw djüiwa.”

Mim na seyo Farisi na gohaw

37 Jisu i ñu trungkoi ye, djudamje Farisi a ye i che, se nochi ge jiñe ava tsawe; sünda í ñelu ge djemyoñe ava tsajoñe ġyoag.

38 Farisi na basha go na ava matsalu üshi-upo machew í holyeñe mavyenghua.

39 Tawgyew i í che, “O Farisi, ba bekasa seyo bela na udru udru go güdrawşo, séšo balung ge vyesbiw seyo mauw vyesumokradama.

40 Budzu ñiw nawa, dju ñepsü go vye ye dadama, hawa se i ulung go i madaima?

41 Am séšo, ulung go gañ-miği duw na chi djüajo dawwe, sündameje bábo vyow güdraw lyajome.”

42 “Se Farisi nawa, djo tui me! Ba pudina ñe sudab yo, seyo vyow ñomñow sheğe bağüdo yo ülye ġü tronguaña djüşoma, séšo Niay i seyo Tawgyew i nülvo í mahutroiwa; tsüwbo tsüda hena je dañgudru seyo sena je tratcho.

43 Farisia nawa, djo druge tui me! Djo ñegru ge nugo buğo uw vye seyo badzağ ge ye djó gaga tsüw.”

44 “Djo tui me! Hado chemeje djo se pelyado nuğu vedudame, süge nuna na udru ge dügrüñe kahi, se madanghuw nuğu du cheñe.”

45 Sündawñe mükyew a ye í che, “Dadrüwa, he ana cheñe ba ñi tchügoime.”

46 Jisu che, “Oi shotuko-kunu dakyew nawa, djoje tui me! Djo ana loje-malofi w gañ me, nuna nadrü ge joşoi sešo yabó djo djogzünsü a je madadü.”

47 Djo je tui! Djo se ñihow truw na nuğu chiw, dju djo aki-awu na shilyedama.

48 Sünda: djo truksüw nuna me, seyo djo aki-awu na dalyedaw yo uw vye; hado chemeje na bó ná shidabi sünda djo ná nuğu í daw.

⁴⁹ Sündada Tawgyew i patsü-sholu je chedame, se no nachi ge ñihow truw seyo shürhaw kiajome, seyo na nağiyo küña na shijojema seyo küña na daše-damejojema.

⁵⁰ Se i ye küña ñihow truw duma našü í he druguw-drulyiw í dakülyejobo a fualyedame, vyew na ġilyedo ye he ñefo ayo nuna nachi yo lajodawe.

⁵¹ Habil í úšü yo dalalye Jakaria í shiw kuw se psügañe mügañe naksümko ye shiw: no djo umso truime; ichi ġidoye he ñefo syo shüdo nuna nachi go lajome.

⁵² Shotuko-kunu dakyew djo tui me! Se djo je patsü-sholu veġiw bo ladašome, séso djo djoluvyo makakume, seyo kakujoñe dado na dugo vye.

⁵³ Sündalye i sa yo kahuahuñe, sese shizew-ñuzew nañe seyo Farisi šüpyo ifum kase seyo i dagtso-damrhüñe, ha ha ñu bütroluweñe da, se i šüpyo ñu ufo bütroluweñe

⁵⁴ sündana na i ha ñu chehualaima ġyokrü ġyo, se umdzu yo ha damje ñu zetruluhw ye kigolajoñe.

12

Ġivow seyo Farisi na dambo djulyawe

¹ Aña a sese hadzaġ-hadzaġ dzaw nuna fuguñe, aña ana kuw naġüтчü tcheġi-lügyeġi da, se i uvromashü í shürhaw ná che, “Farisi nago loġaloġe yo üġa ġyojodawe.

² Vyojo haje dümyoñe maveme, madanghujo haje müšüñe maveme.

³ Sündada ba ha damje nukuġuw ge chedo ye, se i müsaw ge dzühujome; seyo ñeġüñ ulung ge ufu ge ha ašesa yo chedama, se ye ñelütsü udru go yo trujome.”

Iyo ġewe

⁴ “Séso no djo trungkoime, nodraw nawa, dju usso i shifidama se na seyo ha madamñefijomme, ná djuġejo dawe.

⁵ No djo trumchemjome djo djú ġejoma, dzüwñe djú chigüje ge lañe djoafima, se í ġejo dawe; no djo trupangkoitchoimme, se í ġejodabuwe.

⁶ Hawa ajolya ksü yo sülyisa pom madrüafima? Sedamje Tawgyew i namko ye a ye je makošoa.

⁷ Bakye go vyow ükyetrü duw naje ngümdzo vedame, sündada: djuġejo dawe, ba sülyisa na dafowme.

Jisu í matsüñe chewye hama

⁸ “No djo chengkoime djudamje no nuna navro ge nó nošobiñe danghumeje na je nuna üsaw ye je Tawgyew i sorgomuko uvro ge ešobijome.

⁹ Séso dju nuna navro ge no hopseġiahima ije Tawgyew í sorgomuko uvro ye hopseġiajome.”

¹⁰ “Dju nuna üsaw ütüma mauw truima, i datrudaw í muchoaijome. Séso dju ġulo ġüdraw ütüma mauw trüima, í datruw í mamuchoijomme.”

¹¹ “Nuna na ba mügaw-ñegru seyo mükyew seyo damikyew navro lakuwñe, ba navro ge ha chemeje ujojema seyo küna chejojema se na djuvengüajodawe.

¹² Hado chemeje ġulo ġüdraw ba sayo sa a ha chejome zedrújome.”

Nuna nugo a ye veduw

¹³ Seyo upu go nuna a ye í che, “He dadrüwa, noñuw í awu í bo-luko ná noje hawe chejodawe.”

¹⁴ I í che, “Nuna nawa, nó dju niyay djüw seyo baġüġiw nuna boña?”

¹⁵ Sündä i í che, “Uw yo ho ġyodawe, seyo tsaġa-laġaw sündä yo basü ġyodawe; hado chemeje nündä na shüw ye dju bo-luko duw yo mashüwme.”

¹⁶ I í zeġaw a tru, “Tümbum nugo a í no ge rhamu šüpo kakülye.

¹⁷ Sündawne i ulvyu ge no hadajojemmañe ve, hado chemeje nochi ge bo no dakülyedaw rhamu na vejo buġo je ñi.

¹⁸ Sündä i che, ‘no ana dajobabi: no nó ñetchü í tashalyeñe dyew dalajo; sündä no rhamu seyo bo-luko na vyow süge vejo;

¹⁹ sündä no ġulo i chejo, ġuloa, bachi ge oje šüpo üġalaw kuw bo-luko vewme; ġyogowe, tsawe, tuwe seyo lüshüw yo ġyowe.’

²⁰ Sešo Tawgyew i í che, ‘Chi madnaghuw nündä! He ñegimdo ñegi a ba lutuw ye lutukyoaduġyjomme; sündawne ba küña dashütrüñe vedama, se ye djuchi lyajowa?’

²¹ Ana je nündä duwme dju nudzo ubo bo-luko dashütrüñe ve, sé i Tawgyew iñigzü ge nugo mo.”

Ha ñu yo je duhu djudajo dawe

²² Sündä i í shürhaw ná che, “Sündada no djo trungkoime, nudzo shüjodju ubo djuvewe, no ha tsajojemañe; seyo nudzo usso ubo je ha gye-ġuvo shejojemañe.

²³ Hado chemeje tsaw-tuw í shüw ye, seyo gye-ġuvo í dyewfo usso yeme.

²⁴ Pülġam na hojodawe; na zuje mazuw seyo ñetchü ge rhamu je mapaw; sedamje Tawgyew i ná tsakyewšo. Bá musu na fow go añe dufowme.

²⁵ Djomko ye dju duwa, dju vengaw yo nudzo i shüngkoi ge ganta a ña damje shafijo ye?

²⁶ Sündada ba imisa fo chiġa ġje madafimeje, hado utro ñu ná lañe vemy-oñña?

²⁷ Bye go shoba ná hojo dawe, na kündañe shülyima; na chiġa je madaw chitra je madaw; sedamje no djo chengkoime, Suleman je í küña übadzü gidama, namko ye ana veduw gañ a je magime.

²⁸ Sündada Tawgyew i no go suso-mütchü namaje yow gye sheida sündä draha ná boti shüw ge joañe, anambo gye-ġuvo sheñe veilhume; Tawgyew ge mesame veksüw nawa, djo künadañe añe masheijowa?

²⁹ Sündä djo ha tsajojema ha tujojema sündä ve djuġyowe, sündä meaje mavemyow djudajodawe.

³⁰ Hado chemeje he druguw-drulyiw ayo go vyow tuġu-tumo na he ana veduw bostu na tchünggudruwme sündä ba Awu danghudame djo he bostu na šüpo tsüda cheñe.

³¹ Séšo ichi ġadzü i tchüjodawe, sündameje, he bostu naje pajome.

Bo-luko ná hange dashütrüñe vejowa?

³² “Nündä imisa nawa, djuġejodawe; hado chemeje ba awu i bá ġadzü paweñe vedame.

³³ Nudzo ichi fuñ-voñ na draalyeñe tunoajodawe; sündälye nudzo ubo ana dalajodawe, ha ye üme malyajoma, sündä soġgo ge ana bo-luko dashütrülaajo dawe ha ye makaajoma, djutrü iñisa ge tsaksutchüw naje majikujo seyo bulu naje mauw madajo.

³⁴ Hado chemeje hange bachi bo-luko duma, badrü-balu he süge dujome.

Dashütrüjo ġyovojo dawe

³⁵ “Djotsü na pyogo vejo dawe, seyo dju mütrü na dzodügyejo dawe.

³⁶ Sündä djo se kulo na veduw dajo dawē, dju nudzo dadrū í gzū jiw go ke kakuojemañe ġyokrū ġyow veduw; i kakuñe ñegüdrüşü düwñe mekutcho djeñe voa.

³⁷ Gağüzewe se kulo í, djú dadrūw ye kakuñe madrumuvow hohudama; no djo umso trungkoime, i útsü ge pyogolañe ava tsajoñe ġyojo, sündä ũñisa jiñe í hoijo.

³⁸ I ñegi ge ũlye ksü seyo ũlye dzü ñepüñew ge je pakülyew hohumeje, se kulo ye gağüzebamme.

³⁹ Djo he i danghujo vejo dawē, ñe ũbraw ye tsaksutchūw na tsaksuw ke jikujoma se í danghubammeje, i pakülye ġyjobamme, sündä nudzo ñe ge majimyogyejome.

⁴⁰ Baje dashütrū ġyjobadawē; hado chemeje ha homoi ye jikujoñe mavew se homoi ge nūna ũsaw jikujome.”

Veksüfiw kulo djuwa?

⁴¹ Sündawñe Patras í che, “He Tawgyewwa, ba he zeğaw ye ñi aka bama mow vyow naje truwma.”

⁴² Tawgyew í che, “He veksüw seyo patsü-sholu hokrūw ye djuwa, djuchi dadrūw ye ná tsaw-tuw homai ge djüweñe kulo-kutro boñe ve.

⁴³ Se kulo ye gağüzeme, djú í dadrūw ye ana dangkoiye hohudama.

⁴⁴ No djo umso cheime; I í nudzo ichi vyow bo-luko ge zeğiw vejobamme.

⁴⁵ Séso se kulo ye ulu ge ana vemeje, no dadrūw ye ũğalaw ge kakujobañe veñe, sündä kulo seyo kulom na ġüñe seyo tsañe tuñe tukrañe ġyomeje.

⁴⁶ Se kulo i dadrūw ye ana ñeto a ye, i madanghuw ñeto a ye, i í mağyokrüngkoi ye, seyo i madanghuw homai ye, kakujo sündañe í sojai djüñe í usu maw ge ngüañe vejo.

⁴⁷ Seyo se kulo dju nudzo dadrūw í véw í danghuñe, seyo madashütrüvoñe seyo í vew kuw ge makasabammeje, šüpo tsalajobamme.

⁴⁸ Séso dju madanghuñe ġüw tsalajo chiğa dadama se ye me tsalajobame, sündada dju añe djüdama, í añe prujome; seyo dju šüpo boñe vedame, ichigo añe lajome.

Ġüdzüw dušome

⁴⁹ “No druguw-drulyiw ge mi dahow kakülyahume; sündä ha tsüdawa chemeje hesalu mi dzomzoaweñe!

⁵⁰ No baptisma lajome; sündä no malamadolu kuw no kūna mauw ñiku-ñisüw ge ġyojojema!

⁵¹ Ba vedaw ye no he druguw-drulyiw ge ġüdzüw kakudañe vedama? No ba chengkoime; mome, no dabrağiahuw kakülyahume.

⁵² Hado chemeje hesalu yo ñe ge nūna pom nağüтчü ge magağijome, dzü ye ksü üdra seyo ksü ye dzü üdra.

⁵³ Awu ye saw üdra, seyo saw ye awu üdra maveğijome; añ ye sam üdra seyo sam ye añ üdra, apye ye safu üdra, seyo safu apye üdra maveğijome.”

Ümdrū í hosüw

⁵⁴ Sündä i upu naje che, “Mumu ije druguw go kalyiw hohumeje, djeañe ñedzü šüjo chew; sündä süna dabaibi.

⁵⁵ Sündä müdza gow ñedzü lyiw hohuñe cheibi, ñedzü shüw lyijome, sündä süna dabyo-dağyotcho.

⁵⁶ Loğa-loğe nūna nawa, djo ñedzūñe no naksū í utroñe danghudameje, hado he shūw-duw ubo kūndañe madanghufia?”

Nudzo ñu duw ná chebruawe

⁵⁷ “Ba hesalu ba nudzo yo hado ñu mavelafia?”

⁵⁸ Ba bá fodaw nūna ūdra mukow ichi ge jingko ye, ġabo ge ñu chegūdrajo dawwe, momeje ba í mukow ichi ge šūñe lajikyefñeme, sūnda mukow í bá shipashi nagzū ge djūñe seyo shipashi na bá pache ge shūñeme.

⁵⁹ No djo trungkoime, ba ajolya ajolya dañe magimdzoalu kuw, ba makahuafijome.”

13

Vegudolawe mome mütrajobamme

¹ Nūna ūchea sayo sa a djeku, seyo Jisu í Galiliyo nabo go ñu dzūngkoi, djušū í Pilatus í í kūgūw ge djūasadamma.

² He í dzūhuñe Jisu í na che, “Djo ana veima, he Galili na utro Galili ná lalofoñe, hado chemeje nadru ge ana veduw ñiku-ñisūw djūda che?”

³ No djo trungkoime, mowme; séso djo djūdrū djolu mavetūlūmeje djo vyow he ñom yo mütratsūjobamme.

⁴ Mow djo ana vedama, Shilom ge nūna ġütrū šügzü djudrū ge post gaañe trūalyañe dzūdama: na vyow Yarusalem ge kūña tuġu-tumo shūtsūdama ná lalofoma?

⁵ No djo trungkoime, mowme; séso djo djūdrū djolu mavetūlūmeje djo vyow he ñom yo mütratsūjobamme.”

Lufuje ūyañ ūje majew

⁶ Sūnda í he zeġaw ije tru, “Djuchidamje anggur vi ge lufuje ūyañ a zuñe veda: í sayo sa a sheje thcūw jikuda, sé í mapa.

⁷ Sūnda í vi ġyokrūw nūna í che, ‘Howe oje dzū gomdo no he lufuje ūyañ go sheje tchūw jikungudru, sé keje mapa, he í chepyojo dawwe, í hado no í ġyokrūgejowa?’

⁸ Í ana che, dadrūwa, í oje a kuw ġyokrūluwe; no ūdza ūdza ge no chiguġuañe nobi sujome.

⁹ Sūndañe, drawha ge sheje jelaimeje uw; se molaimeje chepyojo dašobe.”

Mim utsubo kuw í dagyow

¹⁰ Ġyogow ñeto sehu Jisu kūgūw ñegru a ye truñe ġyoda.

¹¹ Sūge mim a du, dju oje ġütrū šügzügomdo ksuw kaw mütü a kamyoda, sūnda í utsubo kuw lyada, sūnda í keje gudow magudzufiwbi.

¹² Jisu í hohuñe balayeñe, che, “O mimya, ba bá hamalyiw yo kahua-jemme.”

¹³ Sūnda í ūgzū í udru ge ve, sūnda í djeañe gudow lyajebi, sūnda Tawgyew í troküleyebi.

¹⁴ Hado chemeje Jisu í ġyogow ñeto sehu dagyoda, mūgaw na seyo nugobraw na nūna na che, “Ñegi ġe duw me, sa yo sa chiġa dajo dawwe, seyo se ñeto ye jikuñe dagyojo dabuwe; séso Sabat ñeto ge djudawe.”

¹⁵ He í dzūhulye Tawgyew í che, “Loğa-loğe nūna nawa, ġyogow ñeto sehu djo djó nudzo fulhu seyo giġá na ñe tashalyeñe hu tuw lañe majikewma?”

¹⁶ Seyo ha ye madafijo cheña, he mim Abraham ūsam djuso ge oje ġütrū šügzügomdo mütü ye pyogodama, se í ġyogow ñeto ye vogodaw í kihuaġo?”

¹⁷ Ná he ñu na chewñe, í ubo mauw dai na ñimtchũñ lyatsü, seyo vyow upu na se uw chiğa dadaw ubo lüshütsü.

Pemdu üsü seyo pa í shipyew

¹⁸ Sündä Jisu í chetcho, “Tawgyew í ğadzü dju veduda? Seyo no í ha shipyew üdra djüsejowa?”

¹⁹ I pemdu üsü a veduwbame, djú nüna na lañe ná vi ge trawma; sünda i shülyiñe shoñ lya; sünda ñedzü go musu na ufotsa ge guñe ğyow.”

²⁰ I sünda chetcho, “No Tawgyew í ğadzü í dju vedu dañe vejowa?”

²¹ I pa vedudame, djú mim a ye lañe oje ulumo tola dzü ge gülüşüĝia, sünda ñu-ñuñe oje ulumo ye pa lya.”

Ñegüdrüşü imisa

²² I ñetrü-ñetrü jiñe dadrüşü Yarusalem ge ji.

²³ Sündä djudamje a í che, “He Tawgyewa, nüna mesame basüafijobama?” I í che,

²⁴ “Ñegüdrüşü imisa yo jimyojodawe, hado chemeje no djo trungkoime, şüpo nüna na jimyojoñe dajome, se majimyoñijome.

²⁵ Ñe ubrow gudzülyiñe ñegüdrüşü dugoahuñe, seyo ba ñepsü ge gudzüñe ñegüdrüşü düñe che, ‘He Tawgyewwa, nobo vojodawe,’ sünda i sügow no ba madanghume, ha hanggowa?”

²⁶ Sündawñe ba chejo, ‘No ba how ge tsa-tuw sünda ba ñi bodzaĝ ge dadrüda.’

²⁷ Séšo í chejo, no djo chengkoime, ‘No madanghume djo hanggoma. Mütü chiğa daw nüna nawa, djo vyow no yo üĝa ğyododawe.’

²⁸ Süĝe ksew seyo utu trashügrüjome, ba Abraham, Isahak seyo Yakub seyo vyow ñihow truw ná Tawgyew ge ğadzü ge ğyodaw hohuñe nudzo í ñepsü kahuahuw hohujome.

²⁹ Sündä druguw seyo drulyiw; tchüsa seyo müdza go nüna na jikuñe Tawgyew í ñetrüĝüfo ge dusejome.

³⁰ He í danghulajo daw, küña ná fum ge duma, na uvro ge dujome, seyo küña na uvro ge duma, na fum ge dujome.”

Herod í vyeñiw na

³¹ Sa yo sa küña Farisi na jikuñe í chejea, “Ayogo kahuañe kajo daw; hado chemeje Herodes í ba shijoñe vedame.”

³² I ná che, “Kañe se şelü í trujodawe, howe, no yow je seyo draha je uĝulo na lahuañe seyo usso naw na dagyojolume, sünda ñegi dzü ye no chiğa damdzoajome.

³³ Sedamje no yow, draha seyo pülha kuw jijome, hado chemeje dju ñihow truw na Yarusalem í ñepsü ge madzüñijome.

Yarusalem ubo duhu

³⁴ “He Yarusalem! He Yarusalem! Ba se ñihow truw ná shiye, seyo bachi ge dju kiima ná kunu yo trümoahiye; no ana veduw küña tsüda, joñi í üsa ná utupro ulung ge küna tchelaima, sünambo noje basa ná lakeĝiajoñe daw, sé ba he í matsü.

³⁵ Howe, bañe babo kabra-kasaĝijjome, sünda no djo chengkoime; ba ‘Ná üdrü-ulu yo uw cheime, se nüna ye gaĝüzü dume dju Tawgyew iñiñi yo lañe kakuima,’ machemdolu ba nó keje mahohujome.”

14

Ġyogow ñeto ge dagyow

¹ Sūnda í Ġyogow ñeto sehu djudamje Farisi nágo nugo a í ñe ge odje tsaw ji: sūnda ná í usu yo hopasa.

² Süge í veduw muhu a du, dju usso dalfuñe nada.

³ Jisu í Farisi seyo shotuko-kunu damivro ná che, “Ġyogow ñeto ge dagy-omeje ujo ma mow ma?”

⁴ Sé na madañda ġyo. Sündawñe Jisu í í ügzü kiñe dagyo, sūnda kadügye. Sūnda í í ügzü kidüñe dagyo, sūnda kadügye.

⁵ Sūnda í ná che, “Djongko ye dju duwa, djusa seyo fulhu ye kalü ulung ge gamyoa sūnda ġyogow ñeto ye kutcho malahuajo.”

⁶ Sé ná he ñu ge haje machefibi.

Tumowna ná hovow

⁷ I hobanda, tumona baladaw na uw uw buġo tsatchüñe lai sūnda í se ná hoñe zeġaw ze,

⁸ “Djuma djo ġü ge balai ye, buġo dyew tsatchüñe djuġyodawe, asha baje dyewfo tumona baw je dufijome.

⁹ Sūnda dju ije seyo baje badama, bá jikuñe ana chemeje, ‘í buġo djüjo dawwe,’ sündawñe ba ñimtchüñ lyañe ülafo buġo ge ġyow dujobamme.

¹⁰ Sé bá bawñe, ülafo buġo ge jiñe ġyoyo dawwe, bá badaw nūna ye jikuwñe, bá ana che ‘Drawa, uvro ge kalyiñe ġyoya,’ sündawñe badra a ġyosadaw navro ge udru kalyijome.

¹¹ Hado chemeje dju nudzo yo dyew dalaima, se ye imisa lyajome; seyo dju nudzó í imisa dalaima, se ye dyew lyajome.”

Dakülyew

¹² Sündawñe Jisu í í baladaw naje che, “Djo ñeto ge damje ñegi ge damje ava tsaw ge, nudzo draw, ayo-ñuw, ñešü seyo nugo ná djubajodawe, ana dañeme, naje djo balañe daġuñeme.

¹³ Sé ba ava tsakelai ge sapse, hamalyiw, üshilyew seyo iñiġew ná bajo dawwe.

¹⁴ Sündawñe ba gaġüzebamme, hado chemeje nachi ge djó djüjo haje ñiwme, sešo djó ná güdraw yo üshükülyejo go kügüijome.”

Tsaw-tuw dyew go shipyew

¹⁵ Üdra ava tsasangkoi go nūna a ye he ñu ná dzühulyeñe che, “Gaġüze nadra dujome, dju Tawgyew í ġadzü ge odje tsaima.”

¹⁶ Ná í che, “Djudamje nūna a ye ava dyew tsakeñe seyo sūnda šüpo ná ba.

¹⁷ Tsaw-tuw dafihuñe, í í kulo ná tumona baladaw ná cheñe ki, ‘Age djebe; tsaw-tuw dafiadamme.’

¹⁸ Sé vyow na chetsü, ‘uvro go ye í che, no vi a prülawme, sūnda no se í hojo dume; no ba chengkoime, no maf daijo dawwe.’

¹⁹ Utro a ye che, ‘No fulhu fulshi pom lawme, sūnda no he na dañe how jingkoime; no ba chengkoime, no maf daijo dawwe.’

²⁰ Sūnda a ye che, ‘No gzü dawme, sündada no majikufijome.’

²¹ Se kulo ye jekuñe í ñe übraw í he ñu ná trutsü. Sündawñe se ñe ubraw ye lusuvyulalye í kulo í che, ‘ñetriü go bozaġ seyo ġabo ge kutcho jeñe sapse, kiġi, üshilyew seyo iñiġew ná age lañe kakuwe.’

²² Kulo ye che, ‘O übrawa, ba kūna chedama, sūna damme; sé yaje buġo ufo dulumme.’

²³ Ûbraw ye kulo í che, ‘Ġabo ge seyo fûta duw ge djeñe nûna ná kûnadamje lañe kakujodawe sündameje noñe gujome.’

²⁴ Hado chemeje no djó trungkoime, se tumona badaw ná no tsaw-tuw í tsapûñeje matsapûñeje.”

Dju Jisu í kulo lyafijowa?

²⁵ Sûnda upu na ufum kasawñe, sûnda Jisu i fum ge tchoñe ná che.

²⁶ “Djudamje nochi ge jikuñe, seyo nudzo awu, añ, ufum, agü, ñu seyo ñum seyo nudzo shüw-duw naje mahosübammeje, í no shürhaw mowme;

²⁷ Seyo dju nudzo shokru íje magilama; sûnda nofum makameje; se je no shürhaw madafijome.”

²⁸ “Djomko ye dju post dzuğoñdama, seyo uvromsahü bo küña kajoma, damdzojo kuw nochi ge duşoma ñima mahow?

²⁹ Ana dawñe, i shobo dzugoñe ñekru makrufiwn, sûndawñe hovow nûna na vyow í tchügojoşo,

³⁰ ‘He nûna ye damyowbo damyodaşowa, sé madamdzofiwa?’

³¹ Mo dju ñubyu duwa, utro ñubyu nadra tumo daw jiw, sûnda uvromashü gyoñe mavemchevzüme, se hadza büsha kulo lañe nodrü ge tujovodawye no hadza ġu lañe üdra dağufijoşoma no mowma?

³² Mowmeje üğa gyodamje, mukow kiñe ñu ġüdzüagyefijo.

³³ Ana veduw djo nudzo ichi küña duma ná nobo matrafimeje, se ye no shürhaw malyafijome.

Tsamtsalyow ġu

³⁴ “Ġu bo udame, sé ġu tsamġüw lyameje, se í ha yo ġu lüw dajowa.

³⁵ Se ye no ubo je seyo nobi ubo je chiğa ge makakujomme: se í nûna na ñepsü ge joajohubamme. Djuchi ge dzüjo ufu duma dzülasajodawe.”

15

Fugulu moahuw i shipyew

¹ Vyow patso-law na seyo lalo ubraw ná ichi ge dzüw jikuw.

² Seyo Farisi na seyo shizew-ñuzew na dubyoğunguñe che, “I bó lalo ubraw ná túvañe seyo nadra ava je tsasai.”

³ Sündawñe i ná he zeğaw í tru:

⁴ “Djongko ye djuwa djuchi fugulu fuğua duma, sûnda namko sa a moahuñe se sütü ġütrü sütü ná nodo ge tralye, se a moadaw í matchüلالu kuw tchü gyo?

⁵ Sûnda tchülawñe, i şüpo lüshüw upostu ge trütalañe ka.

⁶ Sûnda ñe ge kakuñe draw seyo ñeşü na bakeğiañe che, ‘Nodra lüshüsawe, hado chemeje nochi fugulu moadaw ye tchüladamme.’

⁷ No djo truime; ana veduw ñedzü ge je lalo a dju vyegudoladama ubo lüshüjome, küñambo sütüğütrü sütü nûna ġüdraw dju ulu mavegudojo duma nabo madama.

Bosüñ moahuw i shipyew

⁸ “Ana mim dju dujowa, djuchi ge bosüñ ġü duw, sûnda namko ye bosüñ a moadabi; sûndawñe i matchü uw mütrü tchühoñe seyo ñe na süñe, dju uw yo matchüjowa?

⁹ Sûnda tchülawñe, i üdram na seyo ñeşü ná balañe che, nodra lüshü-lübasawe nochi bosüñ moadaw ye tchüladamme.

¹⁰ No djo truime; ana veduw, lalo nūna a í ulu vyegudolaw ge Tawgyew í sorgomuko ná ana lūshūjome.”

Saw tsaḡudroahuw í shipyew

¹¹ Sūnda Jisu í che, “Nūna a ichi saw ksü duw.

¹² Naksümko ye kiḡiw ye uyow í che ‘Awa, nobo go bo-luko duw ye, no djūjo dawē.’ Í í ichi bo-luko na haḡiag.

¹³ Sūnda ñegi aña makulu fum ye ūsaw kiḡiw ye vyow dashütrü lalyeña ñetrü ūḡa a ge katrükralye, sūnda süge bo-luko duw na vyow tsaḡudroamdzoag.

¹⁴ I vyow damdzoahuña, se ñetrü ge nokrow kaku, sūnda í usso ufobūla lya.

¹⁵ Sūnda í se ñetrü go nūna a ichi ji, se nūna ye í í vi ge vo na ava gyew ki.

¹⁶ Sūnda í ve uluhu í gudugyejoña se votsa pago go vo na tsa; hado chemeje í djuje haje madjü.

¹⁷ Í vepalawña, sūnda che, ‘No awu ichi kūña vi daw ná tsaw-tuw aña paw, seyo no age luhuśūw yo dzüankoibi.

¹⁸ No gudzulyiña no awu ichi kaña í chejo, awa no ñedzūña ba how ge lalo datroadaśomme.

¹⁹ No basaw chejo haje matramme, no ba vi daw a veduw vejodawe.’ ”

Saw tsaḡudroahuw í kakutchow

²⁰ “Sūnda í gudzulyiña, i awu ichi ge ji: uḡa gudzudalu sa a uyow i í hoña nūlwo veag, sūnda gyojeña í krumogo lag, seyo šüpo chuma tsa.

²¹ Ūsaw ye í che, ‘Awa, no ñedzū í hovow seyo ba how ye lalo dadamme; sūnda hesalu basaw chejo go ñimme.’

²² Sé uyow i í kulo ná che, ‘Kutcho shedra uw yo je uw laña í sheijodawe, sūnda ūḡzūtsü ge ḡütsülye lyeijo dawē, seyo ishi ge shita duijo dawē,

²³ Sūnda rhano a dajo dawē, sūnda me ñi tsa-tuñe lūshüfijobi.

²⁴ Hado chemeje nosaw ye dzüwmme, sūnda ūshükülyedamme: moahumme, hesalu tchülatichodamme.’ Sūnda í lūshü-lübaw da.”

Saw nugow í shipyew

²⁵ “Sé ūsaw nugow ye vi ge du. Sūnda í kaña ñe kakulai ye, i nuḡuw dagruw seyo ñuksu daw dzühu.

²⁶ Sūnda i kulo a í balaña dzü, ‘He ha dangkoiya?’

²⁷ Í í che, ‘Ba ñuw kakudamme, sūnda ba awu í tsa-tuw dyew vedame, hado chemeje í í nūna uw hohuda.’ ”

²⁸ “Saw nugow ye he í dzühulyeña i lusuvyumfoag seyo ñe ulung makamyogñ lyag: séšo uyow í ñepse ge jihuaña í nū.

²⁹ I uyo í che, ‘Howe; no aña ojegomdo bá ḡaksüña ḡyow, sūnda ba chew keje madzūgaahuw, nodraw nadra lūshü-lübaw dajo, ba no yow kuw kūsūsa ūsa adamje madjülu.

³⁰ Séšo he basaw ye ba bo-luko ná utroñiw mim nadru ge djoaña kakuwña, ba ubo aña dyew tsaw-tuw daña gyew.’

³¹ Í í che, ‘Sawwa, ba shüwduw nodra dusaw; seyo nochi ha duma se vyow bachihamme.

³² Séšo hesalu lūshü-lübajodume hado chemeje he ba ñuw ye dzüña ūshükülyetchodabi; moadabi, se hesalu tchülatichodabi.’ ”

¹ Sūnda Jisu je í shürhaw ná che, “Nugo a ichi ge hokrügiw a duwme, sūnda nūna na í howye se hokrüw í i bo-luko ná tsağudroahime cheñe usso ge trutchoañe ve.

² Sūnda nugo ye í balañe che, ‘He hawa no babo go ñu dzühuiye? Ba hokrüşo cheñe shewe; momeje ba hokrügiw ge mağyofijome.’

³ Sündawñe hokrügiw ye vemchepñe, ‘Hesalu no hadajobya? Hado chemeje no übraw ye hokrügiw go no lahuangkoibi: noje no machifi; seyo no tsatuğujoje şüpo ñimтчüñ vei.

⁴ No danghudaba no ha dajoma: nó hokrügiw go lahuahuwñe nūna na nó nañe ge lajo.’

⁵ Sūnda í übraw í chi gudzüdaw ná a a balañe dzüpñe, no ubraw ichi ge ba küña dojo duwa?

⁶ I che, ‘Fuğua tsow psüw tel du,’ sūnda í í che, ba kutcho gyoañe kako ge pomğü gjo dawe.

⁷ Sūnda í utro a í dzütcho, ‘Bachi küña dojo duwa?’ I che, ‘Pu ulumo fuğua tsow dume,’ sündawñe í í che, ‘Bá kako lañe şüzgüzü gjo dawe.’ ”

⁸ “Übraw ye se machiñiw hokrügiw í tro, hado chemeje í budzu yo chiğa dadabi; hado chemeje he druguw-drulyiw go nūna na ná ñeto go nūna nadra chiğa dasaw ge, müsaw go nūna ná fow budzu du.

⁹ Sūnda no djo cheime, mauw go bo yo ba nudzo ubo üdra dalajo dawe; hado chemeje í kaahuñe, bá na shüwa-shüw lüshüw ge lamyosajo.

¹⁰ Dju imisa yo je imisa ge usuima, ná aña ge je usujobamme: seyo dju imisa yo je imisa ge usu mowma: se na aña ge je usu mojome.

¹¹ Sündada ba he druguw-drulyiw ayo bo-luko ge usu mowbammeje, bo umso dju djújowa?

¹² Sūnda ba tuğuda-ğuvodzü í bo-luko ge je usu mowbammeje, ha ye bachi ma, se í dju djújowa?”

¹³ “Dju kulo ye je übraw ksü í mağaksüfijome hado chemeje í a í mahoğon dajo seyo a í nülvo dajome; mome a udra gaağijo seyo a üdra magağijo: ba Tawgyewñe bo-luko naksü í mağaksüfijome.”

Tawgyew í gadzü í go

¹⁴ Farisi na, dju tsağotüdama, he na dzühulyeñe Jisu í maw-uw zekülye.

¹⁵ I ná che, “Djobó nūna na how ge uw dañe she, séso Tawgyew í djodru djolu ná danghuwme, hado chemeje ha gañ ye nūnan na how ge dyew dama, se ye Tawgyew í iñigzü ge imisame.”

¹⁶ Yohañ í kakuw kuw, shotuko-kunu seyo ñihow truw naje ná chiğa daw. Sehu ñetogomdo Tawgyew í ñetrüğüfo go shi-ñu truñe kaw, sūnda vyow nūna na sūna datsü.

¹⁷ Ñedzüñe no naksü í kabrağiahu ye shotuko ütra a yo lyajobame.

¹⁸ “Dju nudzo ufum udra brağilyeñe utro nadra gzü daima, se na lalo dawme, seyo dju brağiñe gğodaw mim í gzü daima se ye lalo dawme.

Nugo nūnañe sapse Lajar

¹⁹ “Nugo nūna a duw dju düw rong seyo gye uw shewma, seyo shüwa-duwa lüshü-lübwaw dañe gğonggudruw.

²⁰ Sūnda Lajar iñiñ yo sapse seyo tsadu yo guñe í molgi ütrü toi tralye.

²¹ Sūnda í vew, nugo í tsamyew djoadaw yo uluhu í tsaşelajo; momeje şulyo na je í tsadu í kañe tsalowba.

²² Sündä se sapse ye dzütrükrälye, sündä sorgomuko na í Abraham ichi laku. Seyo nugo ye je dzüdañe zuadabi,

²³ Sündä noğu üšü ge šüpo naw yo iñi voañe üğa go hobanda, Lajar í Abraham í udru ge ggyodaw hohu.

²⁴ Sündä i ġuksuñe che, ‘He Awa Abrahamya, no nülvo veñe, Lajar í kiñe, ügzütsü üdza ge hu pagzüñe nozelbula í ngüadügyejo dawe, hado chemeje no he mi ulbu dzongkoige dzahiimme.’

²⁵ Séšo Abraham i che, ‘Sawwa vehujodawe, ba bá shülye ge gye-ġuvo uw shehulyewme, sünambo Lajar i gye-ġuvo mauw, sešo i hesalu age güdzüw pangkoimme, sündä ba namoahibi.

²⁶ Sündä he ñu na traañe no seyo ba, ñiksüngko ye ġo dyam a dzühadame, ago dju bachi ge jilaġoñ dama, na majilafijomme, seyo sügo dju age nochi ge jikuġoñdama na majikufijomme.’

²⁷ Lajar i che, ‘He awa, no ba chengkoime, ba no awu iñe ge kiyajo dawe,

²⁸ Hado chemeje no ñu pom duwlume, i na hovrow ge he ñu na trume ujome, mowmeje na he anambo ñiku-ñisüw no ge kakuñeme.’

²⁹ Abraham í i che, ‘Nachi ge Musa seyo ñihow truw ná kako duwbase, na se í chew büdzüda.’

³⁰ I che, ‘Awu Abrahamya, mowme; nuna dzüw a nachi ge jikülyameje, na nadrü-nalu vyegudoġijome.’

³¹ I che, ‘Na Musa seyo ñihow truw na chew maje madzübi se í, nuna dzüw namko yo djudam üshükülyeñe jiadamje, na madzüjomme.’ ”

17

Zehaw

¹ Sündä Jisu í í shürhaw ná che, “He ye umsoma ha ñu ye lalo yo ma, se ye kakujome, séšo se nuna í lalome dju yo kakuima.

² Dju he ġato kunu namko ye djudamje a í dügaima, ibo shedra psüm yo udum ge pyogolyeñe, huġi ge djoahuye ufojobamme.

³ Vemcheñe ġyododawe; bañuw datrulaimeje, zehajodawe, seyo vepalaimeje í muchoaijo dawe.

⁴ Í ahua ye ülye mro datrudamje bachi ge ülye mro jikuñe che, no datru-dašomme, sündawñe ba í datrudaw í muchoaijo dawe.”

Bá veksüw küña dyewda?

⁵ Sündawñe í shürhaw na Tawgyew i che, “Ñí veksüw í damñeijo dawe.”

⁶ Prabu i che, “Bachi ge pemdu üsü ütraña kuwdamje veksüw dumeje, ba he kumtchü iyañ í ükrügomdo taprülañe huġi ge shüwe chejo, sündameje i ba chew dzüjo.

Chiñiw kulo

⁷ “Sé djomko ye ana dju chejowa, dju kulo ye no chi momeje fugulu ná saw, sündä í vi go kakuwñe, sündä í che, ‘Kutcho age jeñe ġyoñe ava tsabe?’

⁸ Haña í ná machejoma, no ava dashütrübe: no tsangko tungkolui kuw toi bašümpe í kidzagolalyeñe no hoiwe; sündä se fum ye baje tsa-tuwe.

⁹ Haña í se kulo í ulu yo vejoma, hado chemej í í dügyedaw chiğa í aka dabada?

¹⁰ Anambo ba je, se vyow chiğa dügyedaw ná damdzoahuñe, baje chewe, ‘Ñi machiñiw kulome; ñi ha dasajo duma se í aka dabadame.’ ”

Tabüñ naw a í nülvo

11 Sünda ana da, Jisu Yarusalem jiw ge Samariañe Galili ñetrü yo jipseañe ji.

12 Sünda ñetrü a ge jimyongkoi ge í súdzüm gû gôgô nadaw na tüva, dju na üga gudzudama.

13 Sünda i üga ge gudzüñe, gó yo che, “He Jisu, he dadrüwa, no nülvojo dawel!”

14 Jisu i í hoñe che, “Jebe; sünda bá nudzo í mûgaw ná shejo dawel.” Seyo kabyo-kağyowñe güdrajebi.

15 Sündawñe namko yo a ye hoñe dagyolagdabi, gow yo Tawgyew í troñe katrükralye.

16 Seyo Jisu ishitrüge gaañe ukrumro yo ishi ge drüñe, ulvyu yo uw che; sünda í nüna uw.

17 He íbo Jisu i che, “Haña na gû güdraw malyama, nameje se sütü ye hanga?”

18 Haña he tuğuda-ğuvodzü í tralyeñe dju ñimma Tawgyew í trojo?”

19 Sündawñe i í che, “Gudzuñe kabi; ba veksüw ye bá dagyodamme.”

Tawgyew í ġadzü kakülyahuw

20 Farisi namko yo a í Tawgyew í ġadzü ke kakülyajowa che dzüñe, Jisu ná che, “Tawgyew í ġadzü ana holaw dañe makakülyajome.”

21 Sünda nüna naje ana machejome, age howe, age dume, süge dume. Hado chemeje, Tawgyew í ġadzü djumko ye dume.

22 Sündawñe i shürhaw ná che, “Sé ñeto je kakujome, hai ba nüna üsaw í hoğofñiw dzüajo, sé mahohujome.

23 Nüna na ba chejome, ‘Howe, süge dume!’ Mome ‘Howe age dume!’ Séšo ba djujejo dawel sünda nafum je djudajo dawel.

24 Hado chemeje ñedzü-lüğaw ye ñedzü üdza a yo utro üdza ge kuw müsakumbo, nüna üsaw ye je í ñeto kuwñe kakülyejojome.

25 Séšo uvromashü i şüpo ñiku-ñisüw gilajome, seyo he shülyiw yo nüna na í matsüñe chejome.

26 Nuha i ñeto ge küna dadama, sünambo nüna üsaw i ñeto ge je dajome.

27 Nuha i lü ulung ge magyomyolu kuw, nüna na tsa-tu ġyo, seyo namko ye gzü dañe ġyo; sündawñe hulüşü kaküñe vyow mauw damdzoa.

28 Seyo Lut i ñeto ge dambo veduw, nüna tsa-tuñe bumdzu dağiw, shobro zuñe seo ñe daw.

29 Séšo ha ñeto Lut í Sodom ge kadama, sehu ñeto ñedzü go mi seyo ecid şükülyañe vyow mauw damdzoag.

30 Nüna üsaw í kakülyahu ge je ana dajobamme.”

31 “Sehu ñeto, dju ñelütsü ge duma; seyo na gañ ñe ulung ge du, na se na law ulung ge djukamyowe, sünda sünambo dju vi ge duma na fum ge djukawe.

32 Lut ufum í vehujodawel!

33 Dju nudzo í ġaksüjoñe veima na mağaksüfijome, seyo dju nudzo şüw í mağaksüfima na basüjome.

34 No djo trungkoime, se ñegi nüna ksü buğo a ye üša dujome, a í latrayemjome, seyo utro a í traalyjome.

35 Mím ksü ye ġato üša ġüjome, a í latrayejo, a í traayejome.

36 [Nüna ksü vi ge dujome, a í latrayejo seyo a í traayejome.]”

37 He ná dzühuyeñe na í dzü, “He Tawgyewwa he na hai dajowa?” I ná che, “Hai ñimo duma, süge kurkukiñ dujome.”

18

Müjemñe mauw zevow

¹ Sündá Jísu í ná he ubo go zegaw a trulyeñe udrü-ulu magaada, mamuduw kügüweñe che:

² “Hange damje ñetrü a ye mukow a gyow; dju Tawgyew ije mağew seyo nuna nabo je mavew.

³ Sündá se ñetrü ye müjem je a gyow: dju ichi ge jikunggudruñe í chenggu-dru, ‘No insaf djüyeñe nobo gaksüijodawe.’

⁴ I üğaluw kuw madzü séso fum ye ulu ge vepüñeñe che, ‘No Tawgyew ije mağew, seyo nuna nabo je mavetunow;

⁵ Sedamje he müjem ye no matraa, sündada ubo insaf djüjo, mowmeje i nochi ge jikunggudruñe no güdzüw mağodügyejo.’ ”

⁶ Tawgyew í che, “Dzüwe, he mağüdraw mukow ye ha cheima?”

⁷ Nameje: haña Tawgyew í í nuna basü ladaw ná mamutchoaijoma, dju ñegiw-ñetow í küğüñe gyowma; seyo í ná üğaluw vejoma?

⁸ No djo chengkoime, i mekutcho ná mutchoijome; sé nuna üsaw kakülyahuñe, i he druguw-drulyiw í umso vefijosoma?”

Dju güdrawñe chejowa?

⁹ Seyo Jísu í shürhaw na dju nudzo í güdrawñe veksüw veima, sündá utro na mauw daima ná ana zegaw che:

¹⁰ “Nuna ksü ñegru ge kügüw ji; a ye Farisi seyo a ye patso-law nuna.

¹¹ Farisi í gudzülyiñe üdrü-ulu ge ana kügü, ‘He Tawgyewwa no ba ulu yo uw cheime, no utro nuna na dambo tsaksu-laksuw, mütü chiğa daw, seyo mim gubuw, seyo he patso-law na dambo nuna mowme.’

¹² No sopta ye ülye ksü tsaw-tuw matsaw gyowme, seyo no bo-luko dalaw gow üchea je djüwme.”

¹³ “Séso patso-law nuna ye üğa gow gudzüñe, ñedzü ge je iñi maholyi dá i ülüjetchü ge güñe che, ‘He Tawgyewwa, he lalobraw no nülvojjo dawe!’

¹⁴ No djo cheime, i ufum yo mowme; séso he nuna ye güdrañe ñe ge kajeme; hado chemeje dju nudzo í dyewñe veima, i imisa lyajome; seyo dju nudzo í imisañe veima, i dyew lyajome.”

Tawgyew í gädzü anagasa na vedumbo

¹⁵ Sündá nuna na na sa naje ichi ge lañe jikeñe nagzü Jísu udru ge vefijoñe; sündá shürhaw na hohuñe ná goha.

¹⁶ Jísu í angasa ná ichi ge balañe che, “Angasa ná nochi ge jigyejo dawe, seyo ná djugohajo dawe: hado chemeje Tawgyew í gädzü he nambo nabome.

¹⁷ No djo umso truime, dju Tawgyew í gädzü í angasa na dambo malama, ná keje süge majimyofijome.”

Nugo nuna a Jísu í ñu dzü

¹⁸ Djadamje dümbraw a ye í dzü, “He uw übrowa, no shüwa-shüw shüjo ye küna dameje ujowa?”

¹⁹ Jísu í í che, “Ba nó hado uw chewwa? Djuje uw mowme, nuna a akasa uw bame, se ye Tawgyewme.

²⁰ Ba shotuko-kunu í bo danghušo: ‘Mim dju gubuwe, djushiwe, djut-saksuwe, mülaw-mütraw djutruwe, nudzo awuñe nudzo añ naksü í chew dzüwe.’ ”

²¹ I che, “Nobo he ná vyew angasa ulvyu ladañe vewbame.”

²² He í dzüwe, “Jisu i ná che, bachi ge yaje ñu a ñilumme, bachi vyew ha duma ná draatsülyeñe sapse ná hatsüwe; sünda bá ñedzü ge luko pajome, sünda kakuñe nofum kasajo dawe.”

²³ He í dzühulyeñe í šüpo duhu da, hado chemeje í šüpo nugo.

²⁴ Jisu í í holyeñe che, “Bo-luko duw na Tawgyew ichi ġadzü ge šüpo ataġa yo kamyofijobame.

²⁵ Tawgyew í ġadzü ge bo-luko duw na kamyoyo í bo ut í sütrü üšü yo kamyow je ufojomabe.”

²⁶ Sünda dzühu daw na che, “Nameje djú basüafijowa?”

²⁷ I che, “Haye nuna yo madañima, se ye Tawgyew í dafijome.”

²⁸ Patras í che, “Howe, nobó ñe-vi je tralyeñe bafum kasawme.”

²⁹ I í che, “No bá umso truime, ana djuje ñime, dju Tawgyew í ġadzü ubo, ñe, mim-kiġi, ñu, awu-añ seyo saw-sam ná trahuw.

³⁰ Sünda sa yo sa a na haje añe djupawe; seyo dzüwñe druguw-drulyiw ge šüw lüshüw pajodawe.”

Dzüñe üshü lyajo go ñihow

³¹ Sünda Jisu na ġüyo ksü shürhaw ná üdra lañe ná che, “Ñi Yarusalem ge jingkoime, sünda küña ñu nuna üsaw ibo ñihow truw na ġi vedama, se na vyow datsüjome.

³² Hado chemeje í tuġuda-ġuvodzü nagzü ge djüjome, sünda na í tchüġoñe-hoġojome, sünda zehu je müdrüdzajome.

³³ Sünda na í ġüjome, sünda shijome, sünda í ñegi dzü ye üshükülyetchojome.”

³⁴ Sünda na he ñu namko ye haje madzüsü sünda he ñu na namko ye müšütsü, sünda ha trudama se ye na madzüla.

Iñi ġew í iñi

³⁵ I Jeriko ñetrü ütrü üñisa jikulai sa a, iñi ġew a ye üdza ge tsatuġuñe ġyoda.

³⁶ Sünda í upu na dügrü jiw dzühuñe dzüpüñe, “Ayo a ha dangkoia?”

³⁷ Na í tru, “Jisu í Nasri ge jingkoime.”

³⁸ Sündawñe í ġuksuñe che, “He Jisu, Dawud í üsaw, no nülvojjo dawe.”

³⁹ Dju vro-vro jeima, na í madañda ġyo cheñe ze, sé í umsow šogzukülye, “He Dawud üsawa, no nülvojjo dawe.”

⁴⁰ Sündawñe Jisu í gudzulyiñe í ichi ge lañe jikuwe che, sünda í iñisa jikuwñe, í í dzü,

⁴¹ Bá ha tsüda, “No babo daijome?” I che, “He Tawgyewa, nó hofidügyewe.”

⁴² Jisu í í che, “Hojodabe, ba veksüw ye ba dagyojemme.”

⁴³ Sünda í djeañe hohu; sünda Tawgyew í troñe, ufum kase, sünda vyow nuna na hohuñe, Tawgyew ibo trotsü.

19

Jisu Jakariya ichi ñe ge

¹ Jisu Jeriko ge jimyolye jimkoi sese.

² Süge Jakkai cheñe nuna duvo, í patso-law go mukyew sünda nugo je nugo.

³ I Jisu í hoġoñ vyew í djuma cheñe? Sešo upungda sese mahofi. Hado cheme í üchesada.

⁴ Sese í í hoġoñ vye uvro ge gyo djeñe lufuje shoñ udru a ye lyilyig, hado cheme Jisu í se ġabo kajoda.

⁵ Sese Jisu se a jikuñe, udru ge hotrolyiñe í che, “He Jakkai, kutcho lyiga; hado cheme yow no bá ñe ge ġyojo dume”.

⁶ I kutcho yo lyigalye lüshüldzulalye í ichi ñe ge la kake.

⁷ He í hohulyebi nüna na zeği, “I bó se lalo nüna ichi ñe ge jijebe.”

⁸ Jakkai í gudzuñe Tawgyew í che, “He Tawgyewwa, No nó bo-luko üchea ye ñiw ná djújome, seyo üchea ye sena djújome djuchi go no lağamüñeda ma se na no psüingua fow djüpyojome.”

⁹ Sese Jisu í í che, “Yow he ñe a muchoahuw jikudame, sündada he í je Abraham ichi sawhamme.

¹⁰ Hado cheme nüna üsaw ye moadaw ná tchüw seyo ná basüaijo kakuwme.”

Bosün uvyu ġü

¹¹ Sese í he ñu ná dzümkoi sese, í zeğaw a ze, sündada chedawa í Yarusalem ütrüañ a duda, seyo í vyesüw je vyesüw, se Tawgyew ichi ġadzübraw ye hesahe kakudalaibiñe.

¹² Sünda: I che, “Nüna nugo a ye ge ñetrü üğa ge ka sügo nugo pafiñe kakutchofijo.

¹³ Seyo í í kulo naği yo ġü ye balalye ná bosün uvyu ġü djü, seyo ná che, ‘No kakuw kuw bumdzu davojo daw.’

¹⁴ Sešo í ñetrü ge ġyodaw na í mahogoñ daw, seyo ífum ge muko kiñe ñu che ki, se í ye no matsüme, se í ñidru ge ñubyu dañjo.”

¹⁵ “I ñubyu lyibiñe kakutchow sese, í ana a da, ichi se kulo ġü ye dju í bosün uvyu ġü djülyedama, se na itrü a balaku sünda danghujoñe vyeñe se na se í yo küña ha ha dashaladama.

¹⁶ Sese uvromashü yo a ye jiku che, He übrawwa bachi djüdaw bosün uvyu ġü yo dañe ġü müñew damñeladame.

¹⁷ I í che, ‘He kulo ülüksüfowwa, bá šüvzüw me, ba šüpyo mesame sese ba umsowda kakülyeda, ayo ba ñetrü ġü yo übraw dabei.’

¹⁸ Sefum yo a ye jikuñe che, ‘He übrawwa, hošoa, bachi bosün yo uvyu pom dashamüñewme.’

¹⁹ I í chetcho, ‘Ba je ñetrü pom yo übraw dabei.’

²⁰ Sefum ye a ye jikuñe chetcho, ‘He übrawwa, hošoa, bá bosün ye he duw ye, he í no nó gye ġüpaw üdza toi pyogoñe vyedaw he.

²¹ Hado chemeje no bá ġedabi.’

²² I í che, ‘Mauw kuloa, no bamdzu yo bá no trudañe chei he me.’ Ba nó danghuwbi nüna mügzütcüwñe, ha ye no ma vyema se í dzula, seyo se no ma zuw, se í djoahuwme;

²³ Ba nochi bo ye bo dashabraw ná hado madjüña, se í no kakuñe sashadaw ye lakeğijobi?

²⁴ Seyo dju nüna na üñisa gudzudama, se na í che, ‘Se bosün ye ichigo lachojodawe, seyo djuchi ge bosün ġü duma se í djüpyojo daw.’

²⁵ Na í che, ‘He übrawwa, ichi bosün ġü bó dušo.’

²⁶ ‘No bá chemkoime, se djuchi ge duma, í seyo djüpyojoluwe; seyo djuchi ñima ichi go se í je lajodawe se ichi ha dusama.

²⁷ Sešo nochi se fugulu ná se vyeñidaw na se no nadru ge ñubyu dame, se na age lakuñe noñisa a shiwe.’ ”

Jerusalem ge fojelübzüw kakuw

²⁸ Jisu í he ñu na chelye í Yarusalem ge navro-navro ka.

²⁹ Seyo se í Jetun üñiñi yo pu sa a Betfage ñe Betniyah üñisa ge jikuwñe, sese í í shürhaw naği yo ksü ye ana cheñe ki,

³⁰ “Üñisa yo ñetrü ge jijo dawé, seyo süge jikubyo jikuğyoñe giğe ichi üsa a udru ge djusa je magyoluw, pyogo vyedaw bá pajome, se í tashalye lakuwe.

³¹ Seyo djudamje bá dzülaimeje, hado tashamkoiya chemeje, se a ana chejodase, se Tawgyew i he í tsüdame.”

³² Se kidaw ná, na jikuñe i ná ha chesedama, süna pabadabi.

³³ Se na giğe üsa ye tashamkoi se, ichi übraw ye ná dzü, “He üsasa ye hado tashamkoiya?”

³⁴ Na che, “Tawgyew í he í tsüdame.”

³⁵ Na í Jisu ichi ge la kaku seyo nudzoğ gye ye tapualye se udru a ñeilye Jisu í giğe udru ge gyodügye.

³⁶ Sünda na kamkoi sese, na nudzoğ polu ye ġabo toi ñevoñe ji.

³⁷ Seyo üñisa kakulye se i Jetun pu i ġo ge kaku, sese şürhaw na vyew upua na vyemoñe chiğá dadaw ibó i hohuda na, lüshüldzuañe gow yo ñu zeñe Tawgyew ibo trokülye:

³⁸ Şüvzüwme se ñubyu ye, dju Tawgyew iñiñi yo jikuma!

Sorgo ge ġüdzüw seyo ñedzü ge lüshüwme!

³⁹ Sese upu na yo süña Farisi na í chengkoibi, “He Danghubrawwa, bá şürhaw ná zea.”

⁴⁰ I ná chetcho, “No djomko a chemkoime, he i maziw ġyome, kunu na şogzukülyejome”.

Jerusalem ibo ksew

⁴¹ Se Jisu üñisa kakuñe se ñetrü í holye ubo kse.

⁴² Sündalye che, “Ha ye ujowa, he ba; am, ba bába, he ñeto ai lüshüjo ñu danghudama, sêso se i yabó bañisa yo muşuadabi.

⁴³ Hado cheme se ñeto ye badru ge kakujo se bá vyeñiw na sülyeñtchü pyogoñe bá djetuğujome, seyo djetuğulye bá ñujome.

⁴⁴ Seyo bá seyo badra ayo a ná bachi angasa ná, nogüdzü nadra gülyajome, seyo badru ge kunu yo je kunu matrújome; hado cheme ba süna dajo ye kye badru ge nülwov vyeñe hojema sei madanghuje”.

Ñegru í dagudrahuw

⁴⁵ Sese Jisu i ñegru ge drüñe ġyodaw ná nopsü ge lahuatsü.

⁴⁶ Seyo ná che, “Ġidame; ‘Nochi ñe ye küğüw ñejome,’ sêso djo he í tsağá-lağaw nachi ñe da joadamme.”

⁴⁷ Seyo i muhu-muhu ñegru ge shi-ñu truñgudru: seyo se müga sawlyiw na seyo shizew-ñu zew na vyew djekeğiñe i shijoñe tumuñgudru.

⁴⁸ Séso haje ġabo matchüla; he í küna dañe dajojema, hado chemeje vyew na dru-lu djübyo djügoñe ichi ñu dzüñgudru.

20

Yahudi na Jisu í ñu dzüw

¹ Ahua ye ana a da, jisü i sese ñegru ge shi-ñu trumkoi sese, mügaw dew seyo shi zew-ñu zew kew nadra jikuñe sese gudzu.

² Seyo chemkoibi, “Ba ñí truwe, ba he chiğá ná dju dadügyedañe dawdo dañá, seyo se i djua, dju bá he i daweñe dügyedaye?”

³ I ná trutcho, “No je djó ñu a dzüjome; nó trujo dawé

⁴ Yohañ ichi Baptisma djüw ye Soğgo go ma mo nüna yo ma?”

⁵ Sündawñe nağüтчü zeği, “Se ñí chebammeje, ‘Soğgo gobabi,’ süñchewñe i chetchojo; ‘Sünameje djo idru ge hado umso mavyeña?”

⁶ Seyo ñi chetchojobi, ‘Nüna yo me chetchobamme,’ se vyew na ñidru ge kunu trüjobi, hado cheme i umsow go danghudabi, Yohañ i ñihow cheñe.”

⁷ Dañdañlye na tru, “Ñi madanghume, se i djuchi go jema.”

⁸ Seyo Jisu i ná che, “Nameje no je djo matrujome no he chi ná dju dügyeñe dadama.”

Bolu mau vi daw nüna i lağüşhi truw

⁹ Sese i se nüna ná he ana zeğaw go tru, “Nüna a ye anggur zugua, sündalye vi daw ná howeñe bo ve seyo šüpo uwalaw kuw utro ñetrü ge jitrükralye.

¹⁰ Bomdrü sese i vi daw nachi ge kulo a ki, se vi yo kakülyedaw anggur üje ibó je djüweñe cheñe k, sé vi daw na í gümoamdo gümoañe ufo kadügye.

¹¹ Sündawñe i kulo a ye kitcho, sé na se í je gütholyebi zeaše zeameñe ügzü ufo kikutchu.

¹² Sündatchowñe i ülye dzü kitcho, seyo na se í je dzütchüzew gimoañe lahuag.

¹³ Sündawñe se anggur go vi übraw ye che, ‘No há dajobabya? No nó saw í kijobaba, asha na í chew dzüw dujoješoma.’

¹⁴ Sese vi daw na i hohulyebi nağütchü poği, ‘He i bó üsaw ye ba; age djebya, ñi i shibow, sündañe he na ñichi lyajobi.’

¹⁵ Seyo na í se anggur vi yo lahuañe shiag: sündada vi übraw i nadra ha dajobabya?”

¹⁶ “I kakuñe se anggur vi daw nüna ná damütrajo, seyo vi ye utro ná djüjo.” He í dzühulye na che, “Tawgyewwa ana djuda.”

¹⁷ I nachi ge hulye che, “Se he ye ha ġida:
‘Ha kunu ye ñe dasüw na ha madağiwñe süñeadama,
Se i ukutru go dakrükye se i lyada.’

¹⁸ “Djudamje se kunu ge gaahima se i ganüajobamme, seyo djudru ge i gahima, se í ġünü-ğüğajobamme.”

Shi-ñu zekyew nañe Mügaw sawlyiw na lütsa

¹⁹ Sešügudo ye Shi-ñu zew nañe seyo Mügaw dew na í külyijoñe vye, hado cheme danghula dabi, i nabó magow ñu zeğaw yo tru, sešo í ná büğedañe vye.

²⁰ Seyo na í hokrübabiñe seyo ichi ge hotumuw ki, se hadowo cheme i alyamo alye ye shi-ñu trutroameje sese ñustu kigojoñe, se í nugo ichi ge trutroadame che djüfijoñe.

²¹ Na í ana dzü, “He dadrüwwa, ba mülaw truiñe ñi danghudame, Seyo dadrüw je darüi, Seyo djubó go goñeje mache; Semome Tawgyew ichi ġabo ye umsow trufijo.

²² Hawa ñi Kesar í patso djümeje ujoma, mo mowma?”

²³ I ná budzu yo dzüi ye dzüsülye che,

²⁴ “Bosüñ a nó shejo daw. He a djuchi ġiğe düdama seyo dju ñiñ duma?” Na che, “Kesar ichi.”

²⁵ I ná chetcho, “Se Kesar ichimeje í djüwe, seyo Tawgyewchimeje í djüwe.”

²⁶ I nüna ñisa a se ñu ye madzüsüla, semome ichi ñu hutrodaw se i yo mavyenghuatsü.

Güdrakosküwñe gzü

²⁷ Sündatcholye Saduki i chew ye, nüna dzüw na kenghuañe maüşhüjome, naği yo nüna üchea na ichi ge jikuñe dzü.

28 “He dadrüwwa, Musa i ñibó ana ġidawa, ‘Se djuchi damje üyalyo a ichi ufum ye saw-sam malaluye dzütrükrallyemeje se üñuw ye se mim üyañedra i gzü datchowe, seyo üyalyo íbó agü mulo sakülyewe.’

29 Sündä ye alyoñuw mro duw, üyalyo nugowfow ye agü je masakülyelubi ye dzütrükrallye.

30 Sefum yo ye je,

31 Seyo seladzü kiġiw ye je se mimdra í gzü daladabi. Se ana dadañe namro mamro agü masakülye dzümdzoaha.

32 Se nafum se mim ye je dzüase.

33 Se a na üshükülyemeje se mim ye djufum lyijowa, hado chemeje i na mro mamro üdra gzü datsüwdabi.”

34 Jisu i ná che, “He ñefo go shüdaw agü na gzü daibi,

35 Se dju nuna damje ana lyifikülyemeje, sé ñeto go dzüdaw nuna na üshükülyetchojo lyifime, namko ai gzü madafjo.

36 Se i dzü je madzjö; hado cheme i sorgomuko vyedujo, seyo güdrakošksüw yo agü üshükülyemeje Tawgyew ichi je agü lyijo.

37 Sešo he ñu ye dzüdaw na je üshütchoi, Musa je shoñ ge süna folakülyeda, i Tawgyew í ‘Abraham üsa, seyo Isahak üsa, seyo Yakub üsa ana chelyew.

38 Tawgyew ye dzüw nachi mow séšo üshü nachi Tawgyew: hado chemeje ubo yo vyew na üshütsü.”

39 Sese na se í dzühulye Shi-ñu zekew küña duma na che, “He dadrüwwa ba uw chejejeba.”

40 Seyo bó na í ha madzülofibi.

Jisu Dawud üsawma mo Dawud ichi Tawgyew ma?

41 Sündatcholye Jisu ná dzütcho, “Masi í Dawud üsaw cheñe kúndañe cheña?”

42 “Dawud i üsaw Masi i kako ge cheda:

‘Tawgyew i nochi Tawgyew í cheda,

Nochi südzüvopsügi ge ġyowe,

43 No bá fugulu ná bashitrü ai malakyeġitsülü kuw.’ ”

44 “Dawud bó í Tawgyew chew; se sünameje i í üsaw kúnda cheña?”

Shi-ñu zekyew nuna zew madzjüw ná Jisu í trüdrü

45 Vyew na dzümkoï sese, i í shürhaw ná che.

46 “Shi-ñu zekyew na yo hochiġiwe, dju shedra psüw sheñe kahi wuw vewma, seyo ná bodzaġ ge gaga daw, seyo küġüw ñegru ge psüga dew ge ġyojo uw vyejome.

47 Na müjem nachi ge tsaw jiñe seyo bühodañe uwalaw kuw küġüw dawme, he na šüpyo mau ñe ge gajome.”

21

Haje ñiw müjem ichi umsow lapsü djüw

1 Sündatcholye Jisu i íñi yo lapsü dzüw nuna na nudzoġ nudzoġ lapsü í lapsügyebyo ge trümkoi hohu.

2 Seyo i haje ñiw müjem a ye je i sayo sa a bosüñ ksü trümyoajew hohu.

3 Sese i che, “No djó umsow chejome se i ye he haje ñiw müjem ye fow trümoabajeme.

4 Hado cheme nabó nachi nudzoġ nudzoġ lapsü yo me trüje, sešo i í shüda yo küña dusama vyew trümdzoajebi.”

Ñefo i mudzoajo go hosüw daw

⁵ Küña nüna na ñegru ufo go chemkoi ye, se i küña kunu howsa yo seyo gañ yo chibra daida, se i che,

⁶ “Süna ñeto je kakujome, sese he na he i ba hohui na, namko ye ha yo ha a kunu udru ge kunu je matrajome.”

⁷ Na í dzütcho, “He dadrüwwa, he na kye dajowa? Seyo he ñu na dajobi sese, ha chi hosüw dujowa?”

⁸ I chetcho, “Chitchügíwowe, dju dzüſeawe, hado chemeje šüpyo nüna na nó ñiñi lañe chejome, no se ibamme; seyo he i damdrü kakudamme: djo se nafum djukasejo dawe.

⁹ Seyo djo psegi-luği daw süna nafo go dzühulaimeje, dju ġejo dawe; hado cheme he na uvmomashü davzújowbamme; sešo se ñeto kutcho mamütrajome.” Süna ñeto je kakujome, sese he na he i ba hohui na, namko ye ha yo ha a kunu udru ge kunu je matrajome, Süna ñeto je kakujome, sese he na he i ba hohui na, namko ye ha yo ha a kunu udru ge kunu je matrajome,

¹⁰ Sündawñe i ná che, “Ġübye yo ġübyeġütchü seyo ñetrü yo ñetrüġütchü pseġijome.

¹¹ Seyo ñeġüzüw je dew dew dajome, seyo ñetrü ñetrü sapseañe seyo ġañemu kajome, seyo ñedzü ge ñiġeñiw ñu seyo dew dew chi shejome.

¹² Séšo he ñu na madaluye na uvro nó ñiñi yo kigovzújome, seyo maw-uw ze dajome, seyo ñegru ge djújome, seyo pache ge shújome, seyo ñetrü ge ñetrü ñubyu natrü ge lajikujome.

¹³ Se he na babó ñu truvomdrü kakülyejome.

¹⁴ Sündada nudzoġ nudzoġ drü-lu ge pyogo vyejo dawe, no vrogomdo trufijo se í duhu madadañe.

¹⁵ Hado cheme no bá ana chejo seyo ana budzu djújome, se bá mau zeñe zeaše zeame dai na madafijo.

¹⁶ Seyo bachi awu-añ seyo ñuw-ñum seyo ñešüġ-ñepyeġ, seyo draw na je tsüladügyejobamme; aña kuw dajome, djomkoye šüpo na dzüdügyejome.

¹⁷ Seyo no ñiñi yo badra mau dajome.

¹⁸ Séšo bakyetrü umu a je matrüafijome.

¹⁹ Ba nudzoġ drü-lu ye ġüdzüw yo shütrüñe vyejo dawe.

Jerusalem í mütrüw

²⁰ “Ba kyedamje Yarusalem í rhünokew na yo jiġshiġiahuw hohume, sese ichi mütrüjo üñisabammeñe danghujo dawe.

²¹ Sese dju Yahudiya ñetrü ge duma se na pu udru ge djetralyewe, seyo dju Jerusalem ulung ge duma se na djehuaajo dawe; seyo dju ñetrü ge duma se na süge djujijo dawe.

²² Hado che se i dutruġijo ana ñeto kujome, sese ñu ġiñe vyelyedaw na vyew lyitsüjobamme.

²³ Se ñeto ge dju agü ñiw seyo agü apu tudügyeima, se nabó tui! Hado cheme se ñeto ge no naġütchü daġijo seyo se a ná šüpyo ñiku-ñisüw lyijo.

²⁴ Na vyetsü ürhü yo süġüajome, seyo vyew ñetrü drü-drü ge mubyo na lakuġiatsüjome, seyo utro sama nachi ümdrü vyew makulu kuw, sese Yarusalem í utro sama yo dashiġajome.

Jisu i kakutchojo chitruw daw

²⁵ “Seyo dru seyo hubye seyo lütsü se na ge chi shejome, seyo nomñew ñetrü a je, ñetrü drü-drü go nuna ná chitruw dajome; hado cheme na sütügülü ichi hu rhaw yo lamo ġetsüjome.

²⁶ Seyo ġew yo druguw-drulyiw a trüw kakujo se í hohuñe nuna üshüjoñe je mavyejome, hado cheme ñedzü go gokew ye je ġüdü-ġüdüjome.

²⁷ Sese na nuna üsa í lüshüw-lübaw mumudrü ge gow kalai hohujome.

²⁸ He ñu ye trumkoi sese, ükye ye gudow dañe udru ge hotrojo dase; hado cheme bá solutoajo üñisame.”

Tawgyew ichi ñetrü ñubyu üñisabamme

²⁹ I ná zeġaw je a tru, “Lufuje üyaññe vyew shoñ na howe.

³⁰ Ichi übatra kakülyebyo kalyeġyowñe, se í ba hohulyeñe balvyo danghulaibi ñeshü kalaibiñe.

³¹ Sünambó vyeduw ba he ñu na kye hohuima, sese danhulababise Tawgyew i ñetrüġüfo kakujo üñisababiñe.

³² No bá umsow trujome, he ġhei ñu na madalu kuw he ñefo ayo shüdo nuna na kyeje lüshüw mapajome.

³³ Ñedzüñe No naksü kaltruġidamje, sešo nochi ñu kye je makatrujome.”

Shüwa Dashütrüvojo dawe

³⁴ “Sündada ufu je ksü üñi je ksü da ġyowe, ya ba badrü balu ye he druguw drulyiw ayo dashüw ge daśea kiśeañe, shüjo djojo ge vyeśeañe da ġyomkoñbai ye jia, ñe se badru ge kyegüdü-ñiġi kakugme.

³⁵ Hado chemeje i he añawa nomñew ñetrü ayo ġyodo nachi ge ana vyeduw dañe kakujobabi.

³⁶ Sündada chiġiñgudrujo dawe seyo küġüñgudrujo dawe, he ana a kyegüdü-ñiġi kakudamje ha madaw ġaksüfisejoñe, seyo nuna üsaw i vro a gudzüfiwjo lyijo dawe.”

³⁷ Seyo se ñeto ge ñegru ge shi-ñu tru süna dawse; Seyo ñegi ge i nopsü ge jihuañe Jetun pudru ge ġyoñgudru.

³⁸ Seyo na je šüzüw ye tralye ichi ge jikuñe shi-ñu truw ye dzüjoñe ñegru ge jikuñgudru.

22

Jisu i shijo go küla

¹ Odje oġüme se i na ofo rhano chew, üñisa dabi.

² Seyo müġaw dew nañe shi-ñu zew naksü shüwa í kundañe shijoma se í kadang hotumu, sé na nuna nayo ġew.

Yahuda Isküriya ichi umsokulyu

³ Seyo mütü Yahuda ge kamyoa, djú Iskariyoti chew sünda í shürhaw ülgü ġü yo ksü namko ge i je duw.

⁴ I jiñe Müġaw dew ñe kulow kyew hotumuw nadra chitru, Tawgyew í kunda lüġyelajoma sena.

⁵ Na lüshülag, Seyo í na bo djüjome cheñe müdaa.

⁶ I je embi che, sündalye hotuma-hotumuhi, se í usso ge ñu majodügyew lüġyeladügyejoñe.

Fasa í dashütrüw

⁷ Sese odje oġüme daw ñeto kakudabi, sese Fasa ge fugulu üsa ye che küġüw kijobabi.

⁸ Sūnda Jisu í Patrasñe Yohañ naksü í ana cheñe ki, “Djeñe ñibó Fasa ge tsajo-tujo dashütrüvowe.”

⁹ I í dzütcho, “Ba nó hange dashütrüvoweñe tsüda?”

¹⁰ I ná che, “Howe, ñetrü ge kaakubyo-kakuğyowñe nūna a ye hu guw kolo lodow tüvajome, dju ñe ge í jihima; ba ífum jisajo dawew,”

¹¹ Seyo sé ñe go übraw í chewe, ‘Dadrüwwa bá chemkoime; se tumóna ná ñe hagewa sa a no nó shürhaw nadra Fasa tsajo ye?”

¹² Bá í howsa yo dagüdravodaw üğüñ dew a shejome; süge dashütrüvowe.”

¹³ I jikubanda, í kūna chedama sūnabyo-sūnağyo duvobi, sūnda í Fasa í dashütrüvo.

Tawgyewchi müliñ drüpsü

¹⁴ Damdrü kuwñe, Jisuñe í shürhaw na nadra tsajobiñe gyo.

¹⁵ Sündalye í ná che, “No nolu ge şüpyo ana vyewme, duhu makakulu kuw djodra ye ũlya ana ũša gyoñe ava tsajoñe vyewme.

¹⁶ Hado cheme no djó chemkoime, he í Tawgyew ichi nogo ge vyew makulu kuw no se í keje matsajome.”

¹⁷ Sese í bekasa lañe dru-lu yo şüvzüw gañe che, “He í lalyeñe djoğütchü ge habrağijo dawew.

¹⁸ Hado cheme je no djó chemkoime, Tawgyew ichi gädzü madalu kuw no ayo dalalye keje he shejehu matujome.”

¹⁹ Sündatcholye í odje la, seyo üdrü-ulu yo küğüñe takuğia, seyo ná ana cheñe djü, “He í nó usso me, ha yé djobo djüwma: nó vyehuñe he ana dajo dase.”

²⁰ He ana dambo í tsaw tsafalye bekasa je ana cheñe la, “He í nochi sé şü yeme he í djóbó fuadaw yeme ñu ũkünüme.

²¹ Sé hojo dawew, nó kigoladügyejo ichi ügzü ye nodra a dume.

²² Hado chemeje nūna ũsaw ye bó ibo kūna dawewñe dadama, sūnambó dajobabi, séšo tui se nūna idru ge, djubó sa a í kigoladügyejoma!”

²³ Sündawñe na nağütchü dzüği-hoğingkoibi, “Ñimko a djuwa, he chiğa dajo ye?”

Djú dewñe vyefijowa?

²⁴ Namko a ana ñu che zeği; ñimko a dju dew vyefijowa?

²⁵ I ná che, “Utro sama nago nugo na nadru ge shotuko joi; seyo dju nadru ge shotuko jofijo daima, se ná povow nūna chewme.

²⁶ Séšo ba ana djulyiwe; mowme djomko a dju nugow dama, se í angasa vyeduw seyo dju ye ñubyu ma se í kulo vyeduw lyiwe.”

²⁷ Hado cheme dyew ye djuwa; se í buğo ge gýodaw yeme, semome se chiğa damkoi yema? Hawa se í je mowma se tsawdra gýodaw ye? Séšo no djodra a kulo vyeduw bame.

²⁸ “Sešo djo se na me, dju nodra ñiku-ñisüw ge je nodra duwsaw na me;

²⁹ Seyo sūnambo vyeduw nochi Awu í nóbó ñetrü ũkūn a davyedama, sūnambo no je djóbó daveijome.

³⁰ Se í ye hadowo cheme djo nodra nó buğotrü ge tsawe-tuweñe; se psüğa a gyoñe Israyel nachi go gýbye gýyoksü í zegüdralawe.

Patras í hujonoğyow ñihohuw

³¹ “Simon, oi Simon, djó mütü ye prüdame pu í dambo gýjoñe.

³² Séšo no djóbó küğüwme, djódrü-djolu go umsowñe vyedaw ye kyeje mañoajo seyo djo kakume djó nudzoğ alyo-ñuw na je güdükewe.”

³³ I í che, “He Tawgyewwa, no badra pache ge damje kasejo semome dzüjoge dzüfjobame.”

³⁴ I che, “Oi Patras no bá chemkoime, yow jo külyiwñe sese ba nó ülye dzü mahosüw chejome.”

Duhu gijo ye dashütrüvowe

³⁵ Seyo i í che, “Bá no dzulngasa seyo kapüga seyo shita je ñiw ufobüla kinkoi ge ba hama a mapu mavyaw dadama?” I chetcho, “Ha chi go mowme.”

³⁶ I í che, “Séso djuchige dzulngasa duma se na se i lawe, seyo sünambo kapüga í je, seyo djuchi ge kyeği ñima ná nache gye na damje drütülälye lawe.

³⁷ Hado cheme no djó chemkoime, he gido ye, ‘Se i truw nüna ge ngüjobamme,’ se i nódrü ge dajoye krükrüwbamme; hado chemeje nogru ge küna dajoñe dadama se na datsüjobamme.”

³⁸ Na che, “He Tawgyewwa, howe, he a kyeği ksü duwa.” I ná chetcho, “Šüpyo dume.”

Jetun pudru ge Jisu i kügüw

³⁹ Sese na ñepsü ge jihuañe na dadaw basha yo na ge Jetun pudru ge jitsü, seyo shürhaw na nafum jisa.

⁴⁰ Süge jikuñe i ná che, “Kügüjo dawwe, djo zeğaw ge magajoñe.”

⁴¹ Seyo i na yo utroga kunusa a josajombuaña ge jiñe, seyo üshipyu dugoñe kügümyomkoibi.

⁴² “He Awua ba tsübageje he bekasa ye notrü yo latrülyewe, sedamje nó husü yo mow bá husü yé dadzowe.”

⁴³ Sese soğgo go sorgomuko a í sa yo sa a hohu dju í zego dawma.

⁴⁴ Seyo babiye i šüpyo vyemülüañe vyemoañe kügükülyejebi; seyo ichi úfu ye no ge šü fuw vyeduw tra tra dzuamkoi.

⁴⁵ Sese i kügüfialye gudzulye ichi shürhaw nache ge kakuñe hoholye vyew na drumutsüdaw hoñe duhu da.

⁴⁶ Sündälye i ná che, “Hado drumuiya? Pülyibya, kügübya, na zeğow ge magajoñe.”

Jisu í tsülaw

⁴⁷ Jisu i süna chemkoi sese, howe upu a djelai ná, seyo se gü yo ksü namko a ye dju ñiñi ye Yahuda chewma i uvro uvro djekelaibi, i Jisutru ge djeku, i bubu dajoñe.

⁴⁸ Sé Jisu i í che, “Oi Yahuda, hawa ba bubu dañe nüna üsaw í kigo-ladügyejoma?”

⁴⁹ Idra yo na idra ha dajoma í hohuwñe, sünda che, “He Tawgyewwa, ñi keği dzofijoma?”

⁵⁰ Seyo namko ayo a ye müğaw dew ichi kulo nadru ge keği yo dzohiñe ufu fuvo go dzoga.

⁵¹ Sé Jisu i che, “Sayo sa a damudoabe.” Seyo sa a ichi ufu ye kiñe dagyoi.

⁵² Sese Jisu i müğaw dafow na seyo ñegru ge hokrüvw go mükyefow na seyo kew se na idru ge lyikülyedaw ná che, “Hawa djo nó ñiguduñe danghuñe keği ñe shalbo ñe lañe jikuma?”

⁵³ No djodra ñegru ge muhu-muhu djodra duw sa je sesüge djo nó gzü a je maki; sé hesahe djochi ümdrübamme, vatağüsagiahuw yo vatağüsagiahuwme.”

Patras ichi hujonoğyow

⁵⁴ Sündatcholye í na tsúlalye la kakye, seyo mŭgaw dafow saw-lyiw ichi ñe ge lañe kaku seyo se Patras i ŭga-ŭga djega djegañe ifum-ifum djese.

⁵⁵ Seyo na nopsŭ ge mi pyeñe tchŭ ŭša ġyomkoi sese Patras je namko a ġyoa.

⁵⁶ Seyo se a kulom a ye í mi mŭsaw ge ġyokŭlyedaw hohulye seyo í usu yo hopafi hopañe chemkoibi “He i je ŭdra yo baba.”

⁵⁷ Séšo i ana che hujonoġyoa, “O mimya, no í madanghuwe.”

⁵⁸ Me uwalatchowñe utro a ye hotcholye chetcho, “Ba je nadra yo baba se.” Patras i che, “Oi nŭna, no mowhoje.”

⁵⁹ Me uwalatchowñe nŭna a ye dŭgago hoñe chengkotchoibi, “He i je nadrayobabiša; umsow cheme he i Galilibabi.”

⁶⁰ Sé Patras i che, “Oi nŭna, no madanghuwa ba cheijema.” I sŭna chemkoi sese jo je kŭlyije.

⁶¹ Sündawñe Tawgyew i tcholtruġiañe Patraschi ge ho, sündawñe Patras i Tawgyew i ñu chedo ye vyehu i ha chedama, “Yow jo makŭlyilu uvro ge ba nó ŭlye dzŭ kuw madanghuw cheñe hujonoġyaojome.”

⁶² Seyo i ñepsŭ ge kahualye šŭpyo ku ku kuw kse.

Jisu i mŭlakulyuw

⁶³ Dju nŭna ye Jisu í kigo dama, na í mŭlakulyuñe ġŭmyomkoibi;

⁶⁴ Seyo ichi iñi ye pyelyeñe í dzŭ, “Ñiholye trubyá bá dju ġŭima.”

⁶⁵ Seyo ana šŭpyo nomñew zeaše-zeameñe í maw-uw ze.

Kyew nañe seyo melye dew gzu

⁶⁶ Ñetoahuwñe naġi yo kyew seyo mŭga dew shi-ñu zekyew-kikyew se na vyew keġitsŭ, sündalye í na melye dew gudo ge lakuñe chi dzŭ,

⁶⁷ “Sŭnameje ba Masimeje, ñí trujo dawel!” I ná che, “No djó trumsome djo nó umsow maveyeme.”

⁶⁸ Seyo dzŭdamje, matrufijome.

⁶⁹ Sešo ayo dalalye nŭna ŭsa no sawlyiw Tawgyew ichi upo sŭdzŭgo gow dañe ġyongudrujobi.”

⁷⁰ Sŭnchewñe vyew na chetsŭ, “Sŭnameje ba Tawgyew ŭsawma?” I ná che, “Djo cheñšoiwa, hado chemeje nobabi.”

⁷¹ Sese na che, “Yabó no truvoirjoje ha matsŭbi; hado cheme no bó nobyo no dzŭhuladabi.”

23

Pilatus i Jisu í ñu dzŭw

¹ Sese vyew keġidaw nŭna na gudzutsŭñe Jisu í Pilatus ichi ge la jiku.

² Sündalye na ana cheñe ídruge kŭlŭ jo, “Ñí i nŭna ná zegow seyo Kesar í patso i madadŭgyew seyo nudzo í Masi seyo nugomeñe chew dzŭhudame.”

³ Pilatus í í dzŭ, “Ba hawa Yahudi nago nugoma?” I í tru, “Sebó ba chešoiwa.”

⁴ Sŭnchewñe Pilatus i mŭgaw saw-lyiw nañe se nŭna ná che, “No he nŭna idru ge ha je kŭlŭ mahohume.”

⁵ Séšo nabó sŭnchewñe seyoje šŭpyo mŭgzŭw yo chemkoibi, “He i Galili yo dalalye age kuw Yahudiya ná vyew shi-ñu tru truñe truġolatsŭdame.”

⁶ Sŭna dzŭhulye Pilatus i dzŭ, “Hawa he nŭna ye Galili ñetrŭ goma?”

⁷ Seyo he í danghula i Herodes ichi shotuko ulungo nŭna dabi, í Herodes itrŭ ge kitcho, hadowo cheme sé ñeto ge i je Yarusalem ge duvo.

Jisu í Herodes ichi ge kiw

⁸ Herodes Jisu í hohulye šüpyo lüshü, hadowo cheme šüpyo uwalaw gomdo í hoğoñiw vye: se i ye hadowo cheme ifogo dzühuda, seyo ichi chi ashama asha ye sheweñe ve.

⁹ I í šüpyo ha ha ñu dzü, se i í ha je matru.

¹⁰ Seyo se müga saw-lyiwñe shi-ñu zekyew naksü ulung ulung ge í ze.

¹¹ Sese Herodes í ichi nuna nadra ye í zeaše-zeameñe zekütso zemürhü, seyo iği ġiguw gye ye sheisalye ge Pilatus ichi ge kitülütcho.

¹² Sehu ñeto yo Pilatusñe Herodes naksü üdraw lya. Ana madalu. Sevro ge naksü mahoğiw.

Pilatus i Jisu í shiweñe düm takyoo

¹³ Pilatus í mügaw saw-lyiw í seyo nuna na balañe ná che,

¹⁴ “Djo he nuna í nuna ná zeğoime cheñe nochi ge lakuda, seyo holaśoa, no djó how a í dzü howśobi, se djo ha ñu yo iso ge külü joima, se ñu yobó no hasaje ichige külü mahohu;

¹⁵ Ge Herodes je mowbi, hado cheme i í nochi ge djültrutchodabi: seyo holaśoa, i düm takyolaje shimdojo ana haje mada.

¹⁶ Sündada no í shidzü trabañebi”

¹⁷ Pilatus i rhanomko a nuna a tsüla vyedaw ye kihuajobabiñe lya.

¹⁸ Sündawñe vyew na šogzutsü, “I damtrüabei, seyo ibó Barabba i trajodawe.”

¹⁹ I ñetrü a ye pseği-luğĩñe, shiw-law dadaw ubo go pache ge shüñe vew.

²⁰ Sešo Pilatus i Jisu í trajoñe vyeñe nuna ná che hopüñetcho.

²¹ Sešo nabó šogzuñe che, “Í kuros ge külyiwe, kuros ge!”

²² I ülye dzü kuw ná che, “Hado cheme i ha mau damdoda? Nobó í düm takyoñe shimdojo lalo daw mahohubei! Sündada no í gidüñe trabañebya.”

²³ Sešo na šogzu-šogzuñe zetsü, í kuros ge külyimdoweñe, sünda ná šozuw ye foajebi.

²⁴ Ha madanghulye: Pilatus i dügyeaha, na ha cheima sei dzülye dawe cheñe.

²⁵ Seyo i se nuna vyesvye-vyemdolalye nuna shido í pache ge shüdaw ye, seyo djú í prüwma í trase; seyo Jisu í na nalu ge ha vyedama süna vyew apyew kuw djüki.

Jisu í kuros ge külyiw

²⁶ Na í lañe kakemkoi sese, Simon cheñe Kureni a ye ñetrü go kanglai sa a, í kigo lalye shokru giñe Jisuchi ge lakuñe ifum ifum la kake.

²⁷ Seyo nuna ye gumtchubabiñe ifum ifum kase: seyo šüpo upu mim na je, dju ibó üldjetchü gü gü kseñe ksekuğiladjew.

²⁸ Jisu í nachi ge tcholtruğialye che, “He Yarusalem ayo sam nawa, nóbo djuksejoda; sešo djo josa seyo djó nudzoğbó ksejoda.

²⁹ Hadowo cheme se ñeto kakujome, seyosa a nuna na chejome, ‘Šüvzüwme se na dju ügüzbümma, seyo dju saw-sam masakülyema seyo dju agü apu manuma.’

³⁰ Se ümdrü ge

‘Na pu naje chejome, ñidru ge gaabe,

Seyo noğüfo yo ñi muşuiwe.’

³¹ “Hado cheme na shoñ djüw nadra ana damkoibi ye, krow nadra küna ha dañjema?”

³² Na seyo nuna ksü ije lalo datruw go idra ye shijoñe la jikye.

³³ Na se Kopri che Noğüfo ye jikuwñe, na sayo sa a í seyo se lalo datrudo ksü ye je, a ye ichi südzü go seyo a ye ichi fuvogo ge süna kuros ge külyiñe vye.

³⁴ Sündawñe Jisu i che, “He Awuwa, ná muchoaiwe, hadowo cheme he na madanghume na ha dangkoima?” Sünda na kako ge ġi veñe i gye í habrağia lastü.

³⁵ Nüna na gudzu-gudzu hoğyo, seyo nugo na je zeaše-zeameñe ze ġyo, “I utro na ġaksülaw, i Tawgyew ichi Masimeje, seyo ichi dzulawmeje, nudzoğ ġaksülaño dawe.”

³⁶ Rhünokyew naje í trow uhu ye í nuñe zeaše-zeameñe che.

³⁷ “Senameje ba Yahudi nachi go nugomeje, ba bá nudzoğ í ġaksüalabyal”

³⁸ Seyo idru ge truw a chedalubi; “He i Yahudi na go nugome.”

Shokru ge dru-lu vyegüdolaw lalobraw

³⁹ Ha lalobraw ye shokru ge külyi suntchadama, namko a yo a ye í zebze-zeğeñe che, “Hawa ba Masi moma? Sünameje ba balvyo ġaksüñe seyo ñiksü i je ġaksüila!”

⁴⁰ Süñchewñe utro a ye í zeñe che, “Hawa ba Tawgyew í je mağewbama? Ba je süna pabaibi,

⁴¹ Seyo ñiksü bó shotukobasha yo pangkobabi, hadowe cheme ñibó ñi chiğá ha dadama süna shishü pangkobi; séšo i haje mau chiğá mada.”

⁴² Sese i che, “He Jisua, ba bá ñetrü kakuwñe nó je dju koşoawe.”

⁴³ I í che, “No bá umsow chemkoime yow yo ba nodra sorgo nogo ge dujome.”

Jisu i lutukyohuw

⁴⁴ Seyo muhumdzu yo dalalye me apyew djüdüalai kuw ye vyew ñetrü na nukuğuatşüdabi,

⁴⁵ Seyo dru müsaw yebó je kañoahibi, seyo ñegru go gyeña bó je ulumko toñe-meñe yo gağaa Jebi,

⁴⁶ Seyo Jisu i şüpyo gow yo şogzuñe che, “He Awuwwa, no nó ġulo ye bagzü ge trahime.” Seyo í süna chelye ulvyu sese lutukyoaha.

⁴⁷ Ģyokrüw nüna ye sa a ha dadama se na holye i Tawgyew í tro, sündalye che, “He nüna ye güdraşobi.”

⁴⁸ Seyo upu na he í hojoñe keğitsüdaw na, he şoboşulyw dadaw í holyeñe nalüjetchü ge güñe kalütrü.

⁴⁹ Seyo ichi hosüw-holüw küña duma vyew, seyo mim na je dju dju idra Galili go jikusedama vyew, üğá ge gudzuñe se na ho ġyo.

Yusuf i Jisu í iyo ġuahuw Arimitiya go nolu ge

⁵⁰ Seyo süge, Yusuf cheñe yo nüna a ye se rhano dew ge du, dju ye uw seyo chi danghuw muhu.

⁵¹ Seyo ichi vyew seyo ichi chiğá daw yo malüşhüw; seyo i Yahudi na ñetrü go Arimitiya ge ġyow seyo Tawgyew ichi nogo ye ġyokrüw nüna.

⁵² I Pilatus ichi ge jiñe Jisu ichi ñimo ye prü,

⁵³ Seyo í lagaalye gyelüdü yo daw gyeña ge vaşüñi, seyo nuğá a ye vye, se i ye kunu ge chido süna; seyo süge keje dju je mavyewlu.

⁵⁴ Se i ye dashüwtrüw ñeto, seyo ġyogow rhano damivrojo ümdrü ge.

⁵⁵ Seyo se mim na dju idra Galili go jikusedama, ifum, ifum jiñe se nuğá ye ho seyo uso je ho í daw basha yo da vyedaşomañe.

⁵⁶ Seyo kakultruñe şowsa chi seyo şonuw dashütrü; seyo ġyogow ñeto ge bó i je daw basha yo ġyogo.

24

Jisu í üshükülyew

¹ Sopta uvro ge, sağa-müğa na nuğu ge şowsa şow gañ-miği lañe jiku.

² Sünda na kunu í ğühuadaw hohu.

³ Sünda ulung ge jemyongkoi ge, na Prabu Jisu usso mahohubi.

⁴ I he ñu yo mavenghuanê ğyoñbaiye, muhu ksü ye lütsü-lütsüw gye sheñe ütrü iñisa ge gudzu.

⁵ I ğeñe, sünda nodo ge ukrumro i pelye; sündawñe i í che, “Ba üshü í dzüw namko ye hado tchüwwa.

⁶ I ayo a ñimme, séso üshükülyedamme. I djo Galili ge ha trudama vehujo-dawe.

⁷ ‘Umsogo je nüna üsa í lalobraw nagzü ge kigo ladügyejobamme, sünda kuros ge tükegojome, sünda ñegi dzü ye üshükülyetchojome.’ ”

⁸ Sünda i í ñu í vehuag,

⁹ Sünda nuğu go kangkoi ye i se ğüyo a ná, sünda utro naje, he vyow ñu ná truzeġiatsü.

¹⁰ Dju he ñu í shürhaw ná trudama, se na Mariam Magdalini seyo Yoana, seyo Yakub üyañ Mariyam sünda nadra ye utro mim naje duw.

¹¹ Séso na ñu trudaw ye ná shipyew truw veduw velada sünda na ná umso mave.

¹² Sündawñe Patras i gudzülyiñe nuğu ge gyo dje, sünda gye ufobüla hohubadabi, sünda hadadama, se yo mavenghulyaha, í nudzo ñe ge kaltrutcho.

Imawus ğabo ge shürháv na how

¹³ Sehu namko ye nüna ksü ye Imawus cheñe ñetrü ge jijnngkoi, Yarusalem yo kilo mitar mro kuw üğa.

¹⁴ Sünda naksü se vyow ñu ná, hadadama se na naksüġüтчü chitruñe ji.

¹⁵ Sünda naksü se ñu na naksüġüтчü ge truġiñe dzüġiñe jingkoi ye, Jisu i iñisa jikuñe naksü üdra jisa.

¹⁶ Séso nañi ye ana veduw mütrüdaw ye í mahosüläfi.

¹⁷ Jisu í ná dzü, “He ha ñuwa, djoksüġüтчü ge truñe jiiye.” I duhu dañe ğudzu.

¹⁸ He í dzühulyeñe, namko ye Kilyupas ñetrü go nüna a ye che, “Haña ba Yarusalem go ba akasa tüvaw jiw nünabamma, dju he ñeto ge hadadama se na se í madanghu.”

¹⁹ I í dzü, “Ha ñu ye wa?” Na í che, “Nazret go Jisu ibo dju Tawgyew seyo nüna nabo chiğa dawma sünda shi-ñu truw go ñihow truw.

²⁰ Sünda müġaw kew na seyo ñi dümbraw dakyew na í kigoladügyeñe, shibeñe dügyeaha; sünda kuros ge sümtchadügye.

²¹ Séso ñi vyeksüwşo, i Israyel í mutchoaijo che, sünda he ñu na tralye, he sobošulyuw dajew ye ñegi dzü kujebi.

²² Sünda jímko ye je mim üchea na ñi mavenghuadügyeda, dju sağa-müğa nuğu ge jidama na.

²³ Sé usso í mahohuwñe, sorgomuko nadra í üshüdame cheñe ñu truw che djekuda.

²⁴ Sündawñe ñimko yo a ye nuğu ge how ji, sünda mim na küna trudama, süna tchülada; séso í mahohu.”

²⁵ Sündawñe Jisu í ná che, “O madzühoave dañe ğyodaw nawa, seyo ñihow truw ná ñu ge üdrü-ulu yo umso dzüngahu nawa!

²⁶ Ana dajo mowma, Masi i duhu gilañe nudzo lüshüw ge kalyitralyejo?”

²⁷ Sündä í ná ibo go kako ge ha ġidama se ye Musa ichi yo dalalyeñe vyow ñihow truw nachi ge ġidaw na, i ná danghudügye.

²⁸ Aña sa a na hange jingkoima, se ñetrü jikujebi, sündä í dawyo na ana danghuda, i ayoje uvro ge ġjolu cheñe.

²⁹ Sé na í ana cheñe ġokrüdügye, “Ñidra ġyosajodawe; hado chemeje djüdu lyañe añe uwaladabi.” Sündä í ulung ge nadra ġyosaw kamyoa.

³⁰ I nadra ava tsajoñe ġyosangkoi ye, i odje í lañe gaġüzü djü, seyo í takuġiañe ná djü.

³¹ Sündawñe nañi hojükylyeñe í hosülag, sündä na iñi how yo müšü.

³² Na naġütchü ge che, “Ñidrü-ñilvyu ge mi madzoma, i ñí ġabo ge kako ge ġidaw ná truñe jomkooi ge?”

³³ I sa yo sa a gudzülyiñe Yarusalem ge katrükralye, sündä i se ġüyo a seyo nadra a yo na üšaka ye keġidaw hohu.

³⁴ Na che, “Tawgyew umsogo je üšükülyetchoda, sündä Simon i hohu.”

³⁵ Sündawñe i ná ġabo ge chitru jidaw na ná tru seyo he je tru, i ná kundañe odje í takuġiañe tsadama.

Jisu i í nudzo shürhaw nadra

³⁶ Na he ñu í trumkoi ye, Jisu í husü yo namko ye gudzükylye; sündä ná che, “Djo ġüdzüw pawe.”

³⁷ Séšo na mavenghuatsüg, seyo ġeatsüg, sündañe na velatsü, ñi mütü hongkoi.

³⁸ I ná che, “Hado mavenghuatsüña? Sündä djulvyu ge hado mavenutsüña?”

³⁹ No gzü seyo noshi na howe, no sebamme; no kiñe hojodawe; hado chemeje ñeġulo nachi uso üġübye ñijo nochi ge hohumbo.”

⁴⁰ Ana chelyeñe ná i ichi ügzü ishi na she.

⁴¹ Ná lüshüw yo seyo umsojemañe veñe, seyo lümashü ve, sündawñe i ná dzü, “Haña djochi ge ava duma?”

⁴² Na í psekwrow tchükro üsüla a djü.

⁴³ I lañe na how sa a tsag.

⁴⁴ Sündä i ná che, “He na no ñu name, no djodra ġyosañe truwme, Musa í shotuko ge seyo ñihow truw kuw na seyo kako ge nobo go ġidaw na umso kakülyejome.”

⁴⁵ Sündä i na ükye-ümüñi í güdraw ñu ġidaw dzüsüdügyeño voiha.

⁴⁶ Sündä ná che, “Ana ġidame Masi duhu gilañe seyo ñeġi dzü ye dzüñe üšükülyetchojome,

⁴⁷ Sündä Yarusalem yo dalalyeñe vyow ġübye geg vetrüw seyo lalo daw na iñiñ yo lañe truzeġiatsüjo.

⁴⁸ Djo he ñu na hohusawme.

⁴⁹ Sündä djuchi trašüġa no awu i dadama, se ná no djo lakülyaijome sündä udru go gow mapamdolu, süña kuw djo he ñetrü ge ġyokrüjo daw.”

Jisu i ñedzü ge katcho

⁵⁰ Sündä i ná Betnyiah kuw ñepse lañe jekülyasa, sündä ügzü i lañe ná gaġüzü djü;

⁵¹ Sündä ná gaġüzü djüşhüñe i na yo utro lya seyo ñedzü ge kalyitralye.

⁵² Sündä na mraañe í šüpo lüshüw yo Yarusalem ge katrükralye.

⁵³ Sündä ná ñegru mamuduw keġiñe Tawgyew í troñe seyo gaġüzüwe.

Philemon iñiñ güdraw Polus üsam

Ġiw

He kako í Ġiw braw ye Polusme. He kako ha a Polus i Filemon í i Unesimus i ichi ge kitchojomeñe che sünda Kulu 4:9 ge Unesimus i Tukikus üddra Kulusse ge jímkoí sese Tulukus i Filemon i Polus ichi kako i djü. He ye šüvzüw ñume Polus i he kako i nudzo ügzü yo Ġidaw ichi gō vyow na shetsüjōñe.

Ġiw übraw ichi dzaga

Oje 60 kuw.

Filemon í he kako ġingkoí ñeto ge Polus i Rom go pache ge shü veda.

Lajovo

Paulus i he kako ye Filemon í ġida, Arkippus í girja ñe ge sünda ñi ñum Apphia í. Kako ġidaw í holyeñe vemeje he kako ye Filemon í ġibadabi.

Ha ma a vew

He kako í Ġiw ge Polus i Unesimus í i übraw ye ichi ge lakutchoweñe ve ġidame (Unesimus ye Filemon ichi kulo tsaksulalye kaksudaw ye) sünda í sojai djudjüwe. (10-12, 17). Sünda sesüyo, Polus i Filemon í kulo veduw mowdaye “nudzo uñuw” veduw veweñe veda. (15-16). Unesimus i yaje Filemon ichi bo-luko ubo go lubi seyo Polus i ubo ġabo davoġoñ ve hado chemeje Filemon í lajovowene veñe. Polus i shi-ñu truw ubo sa Unesimus i Tawgyew í ġaksüla. (File. 10).

Ñustu gow

Kahuahuw.

Udrüla

1. Abiwadan ___ 1:1-3

2. Abarokti ___ 1:4-7

Unesimus ubo ñu chegüdraġiw ki ___ 1:8-22

Damdzualai shi-ñu ___ 1:23-25

Dašüvzüw

¹ Polus ichi go bó, se Jisu Masi ichi pache ge shüdaw nüna, seyo ñuw Timotiyus ichi ve go ñichi nülvo chiġadam Filemon,

² Seyo ñum Afiya seyo ñidra yo shipashi Arkipusñe Filemon ichi ñe go ñešü na ñiñi.

³ Ñichi Tawgyew awuñe Tawgyew Jisu Masi naksü naksüchi vye go ġüdzüw je bá pangdruwe.

Šüvzütroi ñe Küġüw

⁴ No shüwa Tawgyew í šüvzütrojome; seyo nudzo küġülai ge je bá vye-huwme.

⁵ Hado cheme no bachi sé nülvo seyo vyemso chi shi-ñu na dzühulye, se Tawgyew Jisu dru ge seyo vyew güdraw nüna nadra.

⁶ No küġüjome se vyemsodaw ge bachi üdra ayo na hadamje uw ñu ge danghusajo dawe ha ye Jisu Masi ichi yo ñidra dusama.

⁷ Hado cheme noñuwwa, nó bachi nülvo yo šüpyo lüshüw seyo ġüdzüw padame, sündada, ba yo dañe güdraw nüna nadrü-nalu hu je adjüdjüw no je aġimiw pajome, uñuw nawa.

Unesimus ibó kûgûw

⁸ Sündada sedamje noje Jisu ge şüpyo bolu duda, se ha ñu ye udama, se í bá dügyejo.

⁹ Sedamje no vyeduw mukro Polus i se yabó Jisu Masi ibó pache ge gyow nûna babi, se ayoje şüpyo nûlvo yo ibó kûgûjolu.

¹⁰ No nosaw Tawgyew go Unesumus ibó no yo nochi sülyeñtchü ge sakülye dame no yo kûgûime.

¹¹ Se ibó ahuge ha madaği w a ba, se yabó ba ñe seyo nochi dew chiğa tsüwbaba.

¹² Se í ñe seyo dju nolu ge kadama, no se í bachi ge djütülütchowba.

¹³ Í no nochi ge vyejoñe vyehomacha se í bó bachi vye go şüdabi shi-ñu ibó yo sülyeñtchü sumbo, nó datunowe.

¹⁴ Sé no ba mahusüw haje madağon se bachi he nûlvo djüdo ye datüdalüw yo mow lüshüw dawe.

¹⁵ Hado chemeje ha danghuñda i ba yo ksühua dzühua kuw he ibó utro lyadawa şüwa bañisa ge gyoyoñe.

¹⁶ Sešo ayogo kulo mavyeduw, kulo yo je dewfo, seyo ñuw vyeduw gyowe se nochi drü-lü ge duw süna nûlvobó sešo, se yabó usofu ge je seyo gulo ge je, bachi je drü-lu ge sünda Tawgyew ge.

Filemon ichi dügyew dzüw lüshüljow

¹⁷ Senameje ba nó bachi nudzoğ dakyetunowñe vyedameje, se na vyeduw yo shutrolajodawe.

¹⁸ Chemeje se nó bachi ha damje damdalyoama semome sa a bachi ha damje a kakuw, se í nochi üñiñi ge giwe.

¹⁹ Polus no nó gzü yo gijome, se i no bá gijujome; seyo ichi chejoje ha madaği, se no añawa he daado na badru me se i babamme.

²⁰ He no ñuwwa, he lüshüw nó bachi Tawgyewwa nó bachi go pawe, Tawgyew ge nodrü nolu ye hu je adjüdjüw no je ağimiwi daiwe.

²¹ No bachi dügyew dafiw dajo umsow vyyeñe, bá gımkoime seyo he ana danghuwme, se no ha cheima, ba se í foje lübzüw daijo.

²² Seyo he i je, nobó gyoyo buğo dashütrüvowe; no süna umsow vyedame, se bá kûgûw trüdu yo noje no bachi ügzü ge djüjome.

Mülün şüvzüw

²³ İfras se Jisu ge nodra pachesüw ge

²⁴ Seyo se Markus ñe Aristikurs seyo Demas seyo Luka seyo no chiğadam.

²⁵ Nıchi Prabu Jisu Masi nûlvow ye bachi gılodra duwe. Amin.